

# ॥ तैत्तिरीय संहिता ॥

## ॥ काण्डम् ४ ॥

॥ प्रथमः प्रश्नः ॥

॥ तैत्तिरीयसंहितायां चतुर्थकाण्डे प्रथमः प्रश्नः ॥

युञ्जानः प्रथमम्मनस्तत्त्वाय सविता धियः। अग्निं  
ज्योतिर्निचाय्य पृथिव्या अध्याभरत्। युक्ताय मनसा  
देवान्त्सुर्वर्यतो धिया दिवम्। बृहज्ज्योतिः करिष्यतः सविता  
प्र सुवति तान्। युक्तेन मनसा वयं देवस्य सवितुः सुवे।  
सुवर्गेयाय शक्त्यै। युञ्जते मन उत युञ्जते धियो विप्रा विप्रस्य  
बृहतो विपश्चितः। वि होत्रा दधे वयुनाविदेक इत्॥१॥

मही देवस्य सवितुः परिष्टुतिः। युजे वाम्ब्रह्म पूर्वं  
नमोभिर्वि श्लोका यन्ति पथ्येव सूरः। शृण्वन्ति विश्वे  
अमृतस्य पुत्रा आ ये धामानि दिव्यानि तस्थुः। यस्य  
प्रयाणमन्वन्य इद्ययुर्देवा देवस्य महिमानमर्चतः। यः  
पार्थिवानि विममे स एतशो रजांसि देवः सविता  
महित्वना। देव सवितुः प्र सुव यज्ञम्प्र सुव॥२॥

यज्ञपतिम्भगाय दिव्यो गन्धर्वः। केतपूः केतं नः पुनातु  
वाचस्पतिर्वाचमद्य स्वदाति नः। इमं नो देव सवितर्यज्ञं  
प्र सुव देवायुवः सखिविदः सत्राजितं धनजितः  
सुवर्जितम्। ऋचा स्तोमः समर्धय गायत्रेण रथन्तरम्।  
बृहद्गायत्रवर्तनि। देवस्य त्वा सवितुः प्रसवेऽश्विनोर्बाहुभ्यां  
पूष्णो हस्ताभ्याम्गायत्रेण छन्दसाऽऽददे ऽङ्गिरस्वदभिरसि  
नारिः॥३॥

असि पृथिव्याः सधस्थादग्निम्पुरीष्यमङ्गिरस्वदा भर  
त्रैष्टुभेन त्वा छन्दसाऽऽददेऽङ्गिरस्वद्वभिरसि नारिरसि त्वया  
वयः सधस्थ आग्निः शकेम खनितुम्पुरीष्यं जागतेन त्वा  
छन्दसाऽऽददेऽङ्गिरस्वद्वस्त आधाय सविता बिभ्रदभिः  
हिरण्ययीम्। तया ज्योतिरजस्रमिदग्निं खात्वी न आ  
भरानुष्टुभेन त्वा छन्दसाऽऽददेऽङ्गिरस्वत्॥

इद्यज्ञं प्र सुव नारिरानुष्टुभेन त्वा छन्दसा त्रीणि च॥१॥—————[१]

इमामंगृभ्णन्नशनामृतस्य पूर्व आयुषि विदथेषु कव्या।  
तया देवाः सुतमा बभूवुर्ऋतस्य सामन्त्सरमारपन्ती।  
प्रतूर्तं वाजिन्ना द्रव वरिष्ठामनु संवतम्। दिवि ते जन्मं

परममन्तरिक्षे नाभिः पृथिव्यामधि योनिः। युञ्जथा५  
 रासंभं युवमस्मिन् यामे वृषण्वसू। अग्निम्भरन्तमस्मयुम्।  
 योगेयोगे तवस्तरं वाजेवाजे हवामहे। सखाय इन्द्रमृतये।  
 प्रतूर्वन्न॥५॥

एह्यवक्रामन्नशस्ती रुद्रस्य गाणपत्यान्मयोभूरेहि।  
 उर्वन्तरिक्षमन्विहि स्वस्तिगव्यूतिरभयानि कृण्वन्। पूष्णा  
 सयुजा सह। पृथिव्याः सधस्थादग्निम्पुरीष्यमङ्गिरस्वदच्छेह्यग्निम्  
 ऽग्निम्पुरीष्यमङ्गिरस्वद्वरिष्यामोऽग्निम्पुरीष्यमङ्गिरस्वद्वरामः।  
 अन्वग्निरुषसामग्रमख्यदन्वहानि प्रथमो जातवेदाः। अनु  
 सूर्यस्य॥६॥

पुरुत्रा च रश्मीननु द्यावापृथिवी आ तंतान। आगत्य  
 वाज्यध्वनः सर्वा मृधो वि धूनुते। अग्निः सधस्थे महति  
 चक्षुषा नि चिंकीषते। आक्रम्य वाजिन्पृथिवीमग्निमिच्छ रुचा  
 त्वम्। भूम्या वृत्वाय नो ब्रूहि यतः खनाम तं वयम्।  
 द्यौस्ते पृष्ठम्पृथिवी सधस्थमात्मान्तरिक्षः समुद्रस्ते योनिः।  
 विख्याय चक्षुषा त्वमभि तिष्ठ॥७॥

पृतन्यतः। उत्क्राम महते सौभगायास्मादास्थानाद्विणोदा

वाजिन्। वयः स्याम सुमतौ पृथिव्या अग्निं खनिष्यन्तं  
 उपस्थे अस्याः। उदक्रमीद्वविणोदा वाज्यर्वाकः स लोकः  
 सुकृतम्पृथिव्याः। ततः खनेम सुप्रतीकमग्निः सुवो रुहाणा  
 अधि नाकं उत्तमे। अपो देवीरुपं सृज मधुमतीरयक्ष्माय  
 प्रजाभ्यः। तासां स्थानादुज्जिहतामोषधयः सुपिप्पलाः।  
 जिघर्मि॥८॥

अग्निम्मनसा घृतेन प्रतिक्ष्यन्तम्भुवनानि विश्वा।  
 पृथुं तिरश्चा वयसा बृहन्तं व्यचिष्ठमन्नं रभसं  
 विदानम्। आ त्वा जिघर्मि वचसा घृतेनारक्षसा  
 मनसा तज्जुषस्व। मर्यश्रीः स्पृहयद्वर्णो अग्निर्नाभिमृशे  
 तनुवा जर्हृषाणः। परि वाजपतिः कविरग्निर्हव्या  
 न्यक्रमीत्। दधद्रत्नानि दाशुषे। परि त्वाग्ने पुरं वयं विप्रः  
 सहस्य धीमहि। धृषद्वर्णं दिवेदिवे भेत्तारम्भङ्गुरावतः।  
 त्वमग्ने द्युभिस्त्वमाशुशुक्षणिस्त्वमद्भ्यस्त्वमश्मन्स्परि। त्वं  
 वनेभ्यस्त्वमोषधीभ्यस्त्वं नृणां नृपते जायसे शुचिः॥९॥

प्रतूर्वन्सूर्यस्य तिष्ठ जिघर्मि भेत्तारं विश्वं॥२॥ [२]

देवस्य त्वा सवितुः प्रसवेऽश्विनोर्बाहुभ्यां पूष्णो

हस्ताभ्याम्पृथिव्याः सुधस्थेऽग्निम्पुरीष्यमङ्गिरस्व-  
 त्वं नामि। ज्योतिष्मन्तं त्वाग्ने सुप्रतीकमजस्रेण भानुना  
 दीद्यानम्। शिवम्प्रजाभ्योऽहिंसन्त- म्पृथिव्याः सुधस्थे-  
 ऽग्निं पुरीष्यमङ्गिरस्वत्वं नामि। अपाम्पृष्ठमसि सप्रथा  
 उर्वग्निर्भरिष्यदपरावपिष्ठम्। वर्धमानम्मह आ च पुष्करं  
 दिवो मात्रया वरिणा प्रथस्व। शर्म च स्थः॥१०॥

वर्म च स्थो अच्छिद्रे बहुले उभे। व्यचस्वती सं  
 वसाथाम्भर्तमग्निम्पुरीष्यम्। सं वसाथां सुवर्विदां समीची  
 उरसा त्मना। अग्निमन्तर्भरिष्यन्ती ज्योतिष्मन्तमजस्रमिह।  
 पुरीष्योऽसि विश्वभराः। अथर्वा त्वा प्रथमो निरमन्थदग्ने।  
 त्वामग्ने पुष्करादध्यथर्वा निरमन्थत। मूर्ध्नो विश्वस्य वाघतः।  
 तमु त्वा दध्यङ्घ्रिषिः पुत्र ईधे॥११॥

अथर्वणः। वृत्रहणम्पुरन्दरम्। तमु त्वा पाथ्यो वृषा  
 समीधे दस्युहन्तमम्। धनंजयं रणेरणे। सीदं होतः  
 स्व उ लोके चिकित्वान्त्सादया यज्ञं सुकृतस्य योनौ।  
 देवावीर्देवान् हविषा यजास्यग्ने बृहद्यजमाने वयो धाः। नि  
 होता होतृषदने विदानस्त्वेषो दीदिवां असदत्सुदक्षः।

अदब्धव्रतप्रमतिर्वसिष्ठः सहस्रम्भुरः शुचिंजिह्वो अग्निः। स॑  
सीदस्व महा॑ अ॒सि शोच॑स्व॥१२॥

दे॒व॒वी॒त॒मः। वि धू॒म॒म॒ग्ने अरु॒ष॒मि॒ये॒ध्य सृ॒ज प्र॑शस्त  
दर्श॑तम्। जनि॑ष्वा हि जे॒न्यो अ॒ग्ने अ॒ह्ना॑ ह॒तो ह॒तेष्व॑रु॒षो  
वने॑षु। दमे॑दमे स॒प्त रत्ना॑ दधा॒नोऽग्नि॑र॒होता॑ नि ष॑सादा  
यजी॑यान्॥१३॥

स्थ ईधे शोच॑स्व सप्तविंशतिश्च॥३॥ [३]

सं ते वा॒यु॒र्मा॒तरि॑श्वा दधातू॒त्ताना॑यै हृद॑यं यद्वि॒लि॒ष्टम्।  
दे॒वानां॑ यश्चर॑ति प्रा॒णथे॑न॒ तस्मै॑ च दे॒वि व॑ष॒डस्तु॑ तुभ्य॑म्।  
सुजा॑तो ज्योति॑षा सह शर्म॑ वरू॒थमा॑सदः सुवः॑। वासो॑ अ॒ग्ने  
वि॒श्वरू॑प॒सं व्य॑यस्व विभाव॑सो। उदु॑ तिष्ठ स्वध्व॒रावा॑  
नो दे॒व्या कृ॑पा। दृ॒शे च॑ भा॒सा बृ॑हता सु॒शुक्निरा॑ग्ने याहि  
सुश॑स्तिभिः॥१४॥

ऊ॒र्ध्व ऊ॒ षु ण॑ ऊ॒तये॑ तिष्ठा दे॒वो न॑ स॒वि॒ता। ऊ॒र्ध्वो  
वाज॑स्य॒ सनि॑ता॒ यद॑ञ्जिभिर्वा॒घद्विर्वि॑ह्वयामहे। स जा॒तो  
गर्भो॑ अ॒सि रोद॑स्यो॒रग्ने॑ चारु॒र्विभृ॑त ओष॑धीषु। चि॒त्रः शि॑शुः  
परि॒ तमा॑स्य॒क्तः प्र॑ मा॒तृभ्यो॑ अधि॒ कनि॑क्रदद्वाः। स्थि॒रो

भव वी॒ङ्मङ्ग आ॒शु॒र्भव वा॒ज्य॒र्वन् । पृ॒थु॒र्भव सु॒षद॒स्त्वम॒ग्नेः  
पु॒री॒ष॒वा॒हनः । शि॒वो भ॑व ॥ १५ ॥

प्र॒जा॒भ्यो मा॒नु॒षी॒भ्यस्त्वम॑ङ्गि॒रः । मा द्या॒वा॒पृ॒थि॒वी  
अ॒भि शू॑शु॒चो मा॒न्तरि॑क्ष॒म्मा वन॑स्पतीन् । प्रैतु॑ वा॒जी  
कनि॑क्रद॒न्नान॑द॒द्रास॑भः प॒त्वा । भर॑न्न॒ग्निम्पु॑री॒ष्य॒म्मा पा॒द्यायु॑षः  
पु॒रा । रा॒स॒भो वा॑ कनि॑क्रद॒त्सुयु॑क्तो वृष॒णा रथे॑ । स  
वा॒म॒ग्निम्पु॑री॒ष्य॒माशु॑र्दूतो व॒हादि॑तः । वृषा॒ग्निं वृष॑ण॒म्भर॑न्पां  
गर्भ॑ः स॒मु॒द्रिय॑म् । अ॒ग्र आ या॑हि ॥ १६ ॥

वी॒तय॑ ऋ॒तः स॒त्यम् । ओष॑धयः प्र॒ति गृ॑हीता॒ग्निमे॒तः  
शि॒वमा॒यन्त॑म॒भ्यत्र॑ युष्मान् । व्यस्य॑न्वि॒श्वा अ॒म॒ती॒ररा॑ती॒र्निषी॑द॒न्नो  
अप॑ दु॒र्म॒तिः ह॑नत् । ओष॑धयः प्र॒ति मो॑दध्वमे॒नम्पु॑ष्पावतीः  
सु॒पि॒प्प॒लाः । अ॒यं वो॒ गर्भ॑ ऋ॒त्वियः प्र॒त्नः स॒धस्थ॑मा॒सद॑त् ॥ १७ ॥

सुश॒स्तिभिः शि॒वो भ॑व याहि ष॒द्वि॒शच्च॑ ॥ ४ ॥ [४]

वि पा॒जसा॑ पृ॒थुना॑ शोशु॑चानो॒ बाध॑स्व द्वि॒षो र॒क्षसो॑  
अ॒मी॒वाः । सु॒शर्म॑णो बृ॒हतः शर्म॑णि स्याम॒ग्नेर॒हः सु॒हव॑स्य  
प्रणी॑तौ । आपो॒ हि ष्ठा म॑यो॒भुव॑स्ता न॒ ऊ॒र्जे द॑धातन । म॒हे  
रणा॑य॒ चक्ष॑से । यो वः शि॒वत॑मो॒ रस॑स्तस्य॒ भाज॑यते॒ह नः॑ ।

उ॒श॒तीरि॑व मा॒तरः॑। तस्मा॒ अरं॑ ग॒माम॑ वो॒ यस्य॒ क्षया॑य॒  
जिन्व॑थ। आपो॑ ज॒नय॑था च नः। मि॒त्रः॥१८॥

स॒ꣳसृ॒ज्यं पृ॒थि॒वीम्भूमिं॑ च॒ ज्योति॑षा स॒ह। सु॒जातं॑  
जा॒तवे॑दसम॒ग्निं वै॑श्वान॒रं वि॒भुम्। अ॒य॒क्ष्माय॑ त्वा स॒ꣳ सृ॑जामि  
प्र॒जाभ्यः॑। वि॒श्वे॑ त्वा दे॒वा वै॑श्वान॒राः स॒ꣳ सृ॑ज॒न्त्वानु॑ष्टु॒भेन॒  
छन्द॑साङ्गिर॒स्वत्। रु॒द्राः स॒म्भृत्य॑ पृ॒थि॒वीम्बृ॒हज्योतिः॑  
समी॑धिरे। तेषां॑ भा॒नुरज॑स्र इच्छु॒क्रो दे॒वेषु॑ रोचते। स॒ꣳसृ॒ष्टां  
वसु॑भी रु॒द्रैर्धीरैः॑ कर्म॒ण्या॑म्मृद॒म्। हस्ता॑भ्याम्मृ॒द्धीं कृ॒त्वा  
सि॒नीवा॒ली क॑रोतु॥१९॥

ताम्। सि॒नीवा॒ली सु॑क॒पर्दा सु॑कुरी॒रा स्वौप॑शा। सा  
तुभ्य॑मदिते मह॒ ओखां॑ द॒धातु॑ हस्त॑योः। उ॒खां क॑रोतु श॒क्त्या॑  
बा॒हुभ्या॑मदिति॒र्धिया॑। मा॒ता पु॒त्रं यथो॑पस्थे सा॒ग्निम्बि॑भर्तु  
गर्भ॑ आ। म॒खस्य॑ शिरो॑ऽसि य॒ज्ञस्य॑ प॒दे स्थः॑। वस॑वस्त्वा  
कृ॒ण्वन्तु॒ गाय॑त्रेण॒ छन्द॑साङ्गिर॒स्वत्पृ॒थिव्य॑सि रु॒द्रास्त्वा  
कृ॒ण्वन्तु॒ त्रैष्टु॑भेन॒ छन्द॑साङ्गिर॒स्वद॒न्तरि॑क्षमसि॥२०॥

आ॒दि॒त्यास्त्वा॑ कृ॒ण्वन्तु॒ जाग॑तेन॒ छन्द॑साङ्गिर॒स्वद्यौर॑सि  
वि॒श्वे॑ त्वा दे॒वा वै॑श्वान॒राः कृ॒ण्वन्त्वानु॑ष्टु॒भेन॒ छन्द॑साङ्गिर॒स्वदि॑शो-



ऽसि ध्रुवासि धारया मयि प्रजा९ रायस्पोषं गौपत्य९  
 सुवीर्य९ सजातान् यजमानायादित्यै रास्त्रास्यदितिस्ते  
 बिलं गृह्णातु पाङ्केन छन्दसाङ्गिरस्वत्। कृत्वाय सा  
 महीमुखाम्मुन्मयीं योनिमग्रये। ताम्पुत्रेभ्यः सम्प्रायच्छददितिः  
 श्रपयानिति॥ २१॥

मित्रः करोत्वन्तरिख्यमसि प्र चत्वारि च॥५॥ [५]

वसंवस्त्वा धूपयन्तु गायत्रेण छन्दसाङ्गिरस्वद्रुद्रास्त्वा  
 धूपयन्तु त्रैष्टुभेन छन्दसाङ्गिरस्वदादित्यास्त्वा धूपयन्तु  
 जागतेन छन्दसाङ्गिरस्वद्विश्वे त्वा देवा वैश्वानरा  
 धूपयन्त्वानुष्टुभेन छन्दसाङ्गिरस्वदिन्द्रस्त्वा धूपयत्वङ्गिरस्वद्विष्णु  
 धूपयत्वङ्गिरस्वद्वरुणस्त्वा धूपयत्वङ्गिरस्वददितिस्त्वा देवी  
 विश्वदेव्यावती पृथिव्याः सधस्थेऽङ्गिरस्वत्खनत्ववट देवानां  
 त्वा पत्नीः॥ २२॥

देवीर्विश्वदेव्यावतीः पृथिव्याः सधस्थेऽङ्गिरस्वद्वधतूखे  
 धिषणास्त्वा देवीर्विश्वदेव्यावतीः पृथिव्याः सधस्थे -  
 ऽङ्गिरस्वदभीन्धतामुखे ग्रास्त्वा देवीर्विश्वदेव्यावतीः  
 पृथिव्याः सधस्थेऽङ्गिरस्वच्छपयन्तूखे वरूत्रयो जनयस्त्वा

दे॒वीर्वि॒श्वदे॒व्यावतीः॑ पृथि॒व्याः स॒धस्थे॑ऽङ्गि॒रस्वत्प॑चन्तू॒खे।  
मित्रे॑तामु॒खाम्प॑चैषा मा भेदि। एतां ते परि॑ ददा॒म्यभि॑त्यै।  
अ॒भीमाम्॥ २३ ॥

म॒हिना दि॒वम्मि॒त्रो ब॑भूव स॒प्रथाः॑। उ॒त श्रव॑सा  
पृथि॒वीम्। मि॒त्रस्य॑ च॒र्षणी॑धृ॒तः श्रवो॑ दे॒वस्य॑ सान॒सिम्।  
द्यु॒म्नं चि॒त्रश्र॑वस्तमम्। दे॒वस्त्वा॑ सवि॒तोद्व॑पतु सु॒पाणिः॑  
स्व॒ङ्गुरिः॑। सु॒बा॒हुरु॒त श॑क्त्या॑। अप॑द्यमाना पृथि॒व्याशा॑  
दिश॑ आ पृ॒ण। उत्ति॑ष्ठ बृ॒हती॑ भ॒वोर्ध्वा ति॑ष्ठ ध्रु॒वा त्वम्।  
वस॑व॒स्त्वाच्छृ॑न्दन्तु गाय॒त्रेण॑ छ॒न्दसा॑ङ्गि॒रस्वद्रु॑द्रास्त्वा  
च्छृ॑न्दन्तु त्रैष्टु॒भेन॑ छ॒न्दसा॑ङ्गि॒रस्वदा॑दित्यास्त्वाच्छृ॑न्दन्तु  
जाग॑तेन॒ छ॒न्दसा॑ङ्गि॒रस्वद्वि॑श्वे॒ त्वा दे॒वा वै॑श्वान॒रा  
आच्छृ॑न्दन्त्वानु॑ष्टु॒भेन॑ छ॒न्दसा॑ङ्गि॒रस्वत्॥ २४ ॥

पत्नीरि॒मा९ रु॒द्रास्त्वाच्छृ॑न्दन्त्वेका॒न्नवि॑शतिश्च॑॥ ६ ॥ [६]

समा॑स्त्वाग्न ऋ॒तवो॑ वर्धयन्तु संवत्स॒रा ऋ॑षयो॒ यानि॑  
स॒त्या। सं दि॒व्येन॑ दीदिहि रोच॒नेन॑ वि॒श्वा आ भा॑हि प्र॒दिशः॑  
पृथि॒व्याः। सं चे॒ध्यस्वा॑ग्रे प्र च॑ बोधयैन॒मुच॑ तिष्ठ म॒हते॑  
सौभ॑गाय। मा च॑ रिषदुप॒स॒त्ता ते अ॒ग्रे ब्र॒ह्माण॑स्ते य॒शसः॑

सन्तु मान्ये। त्वामग्ने वृणते ब्राह्मणा इमे शिवो अग्ने॥२५॥

सुव॑रणे भवा नः। सु॒प॒त्र॒हा नो॑ अ॒भिमा॑ति॒जिच्च॒ स्वे गये॑  
जागृ॑ह्यप्रयुच्छन्। इ॒हैवाग्ने॒ अधि॑ धारया र॒यिम्मा॑ त्वा नि  
क्र॑न्पूर्व॒चितो॑ नि॒कारि॑णः। क्ष॒त्रम॑ग्ने सु॒यम॑मस्तु तुभ्य॑मुप॒स॒त्ता  
व॑र्धतां ते अ॒निष्ट॑तः। क्ष॒त्रेणा॑ग्ने स्वायुः स॑ र॒भस्व॑ मि॒त्रेणा॑ग्ने  
मि॒त्र॒धेये॑ यतस्व। सु॒जा॒ताना॑म्मध्यम॒स्था ए॑धि रा॒ज्ञाम॑ग्ने  
वि॒ह्व्यो दी॑दिहीह। अ॒ति॑॥२६॥

निहो अति॒ स्निधो॑ऽत्यचि॑त्ति॒मत्य॑रा॒तिम॑ग्ने। विश्वा ह्यग्ने  
दु॒रि॒ता सह॑स्वा॒थास्म॑भ्य॑ सह॒वीरा॑ र॒यिं दा॑ः। अ॒ना॒धृ॒ष्यो  
जा॒तवे॑दा अ॒निष्ट॑तो वि॒राड॑ग्ने क्ष॒त्रभृ॑दी॒दिही॑ह। विश्वा आशाः  
प्रमु॑ञ्चन्मानु॒षीर्भियः॑ शि॒वाभि॑र॒द्य परि॑ पाहि नो वृ॒धे। बृ॒हस्प॑ते  
स॒वित॑र्बो॒धयै॑न॒ स॑ शि॒तं चि॑त्सं॒तरा॑ स॑ शि॒शाधि॑।  
व॒र्धयै॑नम्मह॒ते सौ॑भ॒गाय॑॥२७॥

विश्वं ए॒न॒मनु॑ मदन्तु दे॒वाः। अ॒मु॒त्रभू॒यादध॑ यद्य॒मस्य॑  
बृ॒हस्प॑ते अ॒भि॒शस्ते॑रमु॒ञ्चः। प्र॒त्यौ॒हता॑म॒श्विना॑ मृ॒त्युम॑स्माद्दे॒वाना॑म  
भि॒षजा॑ श॒चीभिः॑। उ॒द्वयं॑ तम॑स॒स्परि॑ पश्य॑न्तो॒ ज्योति॑रु॒त्तर॑म्।  
दे॒वं दे॒व॒त्रा सूर्य॑म॒गन्म॑ ज्योति॑रु॒त्तम॑म्॥२८॥

इमे शिवो अग्नेऽति सौभगाय चतुस्त्रिंशच्च॥७॥ [७]

ऊर्ध्वा अस्य समिधौ भवन्त्यूर्ध्वा शुक्रा शोचीः प्यग्नेः।  
द्युमत्तमा सुप्रतीकस्य सूनोः। तनूनपादसुरो विश्ववेदा देवो  
देवेषु देवः। पथ आनक्ति मध्वा घृतेन। मध्वा यज्ञं नक्षसे  
प्रीणानो नराशंसो अग्ने। सुकृद्देवः संविता विश्ववारः।  
अच्छायमेति शवसा घृतेनेडानो वह्निर्ममसा। अग्निः सुचो  
अध्वरेषु प्रयत्सु। स यक्षदस्य महिमानमग्नेः सः॥२९॥

ई मन्द्रासु प्रयसः। वसुश्चेतिष्ठो वसुधातमश्च। द्वारो  
देवीरन्वस्य विश्वे व्रता ददन्ते अग्नेः। उरुव्यचंसो धाम्ना  
पत्यमानाः। ते अस्य योषणे दिव्ये न योनावुषासानक्ताः।  
इमं यज्ञमवतामध्वरं नः। दैव्या होतारावूर्ध्वमध्वरं नो-  
ऽग्नेर्जिह्वामभि गृणीतम्। कृणुतं नः स्विष्टिम्। तिस्रो  
देवीर्बर्हिरेदः सदन्तिवडा सरस्वती॥३०॥

भारती। मही गृणाना। तन्नस्तुरीपमद्भुतम्पुरुक्षु त्वष्टा  
सुवीरम्। रायस्पोषं विष्यतु नाभिमस्मे। वनस्पतेऽव सृजा  
रराणस्त्मना देवेषु। अग्निर्हव्यः शमिता सूदयाति। अग्ने  
स्वाहा कृणुहि जातवेद इन्द्राय हव्यम्। विश्वे देवा हविरिदं

जुषन्ताम्। हिरण्यगर्भः समवर्तताग्रे भूतस्य जातः पतिरेकं  
आसीत्। स दाधार पृथिवीं द्याम्॥३१॥

उतेमां कस्मै देवाय हविषा विधेम। यः प्राणतो निमिषतो  
महित्वैक इद्राजा जगतो बभूव। य ईशे अस्य द्विपदश्चतुष्पदः  
कस्मै देवाय हविषा विधेम। य आत्मदा बलदा यस्य विश्वं  
उपासते प्रशिषं यस्य देवाः। यस्य छायामृतं यस्य मृत्युः  
कस्मै देवाय हविषा विधेम। यस्येमे हिमवन्तो महित्वा यस्य  
समुद्रं रसया सह॥३२॥

आहुः। यस्येमाः प्रदिशो यस्य बाहू कस्मै देवाय हविषा  
विधेम। यं क्रन्दसी अवसा तस्तभाने अभ्यैक्षेताम्मनसा  
रेजमाने। यत्राधि सूर उदितौ व्येति कस्मै देवाय हविषा  
विधेम। येन द्यौरुग्रा पृथिवी च दृढे येन सुवः स्तभितं येन  
नाकः। यो अन्तरिक्षे रजसो विमानः कस्मै देवाय हविषा  
विधेम। आपो ह यन्महतीर्विश्वम्॥३३॥

आयन्दक्षं दधाना जनयन्तीरग्निम्। ततो देवानां  
निरवर्ततासुरेकः कस्मै देवाय हविषा विधेम। यश्चिदापो  
महिना पर्यपश्यदक्षं दधाना जनयन्तीरग्निम्। यो देवेष्वधि

देव एक आसीत्कस्मै देवाय हविषा विधेम॥३४॥

अग्नेः स सरस्वती द्यां सह विश्वञ्चतुस्त्रिहंशश्च॥८॥ [८]

आकूतिमग्निमप्रयुज३ स्वाहा मनो मेधामग्निमप्रयुज३  
स्वाहा चित्तं विज्ञातमग्निमप्रयुज३ स्वाहा वाचो  
विधृतिमग्निमप्रयुज३ स्वाहा प्रजापतये मनवे स्वाहाग्नये  
वैश्वानराय स्वाहा विश्वे देवस्य नेतुर्मर्तो वृणीत सुख्यं विश्वे  
राय इषुष्यसि द्युम्नं वृणीत पुष्यसे स्वाहा मा सु भित्था मा  
सु रिषो दृहंस्व वीडयस्व सु। अम्बं धृष्णु वीरयस्व॥३५॥

अग्निश्चेदं करिष्यथः। दृहंस्व देवि पृथिवि स्वस्तय  
आसुरी माया स्वधया कृतासि। जुष्टं देवानामिदमस्तु  
हव्यमरिष्टा त्वमुदिहि यज्ञे अस्मिन्। मित्रैतामुखां तपैषा  
मा भेदि। एतान्ते परि ददाम्यभित्यै। द्वन्नः सर्पिरासुतिः  
प्रबो होता वरेण्यः। सहसस्पुत्रो अद्भुतः। परस्या अधि  
संवतोऽवरां अभ्या॥३६॥

तरा यत्राहमस्मि तां अंवा परमस्याः परावतो  
रोहिदंश्च इहा गंहि। पुरीष्यः पुरुप्रियोऽग्ने त्वं तरा मृधः।  
सीद त्वम्मातुरस्या उपस्थे विश्वान्यग्ने वयुनानि विद्वान्।

मैनामर्चिषा मा तपसाभि शूशुचोऽन्तरस्यां शुक्रज्योतिर्वि  
भाहि। अन्तरग्रे रुचा त्वमुखायै सद्ने स्वे। तस्यास्त्व  
हरसा तपञ्जातवेदः शिवो भव। शिवो भूत्वा मह्यमग्रे-  
ऽथो सीद शिवस्त्वम्। शिवाः कृत्वा दिशः सर्वाः स्वां  
योनिमिहासदः॥ ३७ ॥

वीरयस्वा तपन्विशतिश्च॥ १॥ [१]

यदग्रे यानि कानि चा ते दारूणि दध्मसि। तदस्तु  
तुभ्यमिद्धृतं तज्जुषस्व यविष्य। यदत्युपजिह्विका यद्वम्रो  
अतिसर्पति। सर्वं तदस्तु ते घृतं तज्जुषस्व यविष्य।  
रात्रिं रात्रिमप्रयावम्भरन्तोऽश्वायेव तिष्ठते घासमस्मै।  
रायस्पोषेण समिषा मदन्तोऽग्रे मा ते प्रतिवेशा रिषाम।  
नाभा॥ ३८ ॥

पृथिव्याः समिधानमग्निं रायस्पोषाय बृहते  
हवामहे। इरम्मदम्बृहदुक्थं यजत्रं जेतारमग्निम्पृतनासु  
सासहिम्। याः सेना अभीत्वरीराव्याधिनीरुगणा  
उता ये स्तेना ये च तस्कंरास्तास्ते अग्रेऽपि  
दधाम्यास्ये। दःष्ट्राभ्याम्मलिमूञ्मयैस्तस्कंराः उता।

हनूभ्या॑स्ते॒नान्भ॑गव॒स्ता॑स्त्वं खाद॒ सुखा॑दितान्। ये जनै॑षु  
म॒लिम्ल॑वः स्ते॒नास॒स्तस्क॑रा वने॑। ये॥ ३९॥

कक्षे॑ष्वघा॒यव॒स्ता॑स्ते॒ दधामि॑ जम्भ॑योः। यो  
अ॒स्मभ्य॑मराती॒याद्यश्च॑ नो॒ द्वेष॑ते॒ जनः॑। निन्दा॒द्यो अ॒स्मान्  
दिप्सा॑च्च॒ सर्वं॑ तम्म॑स्म॒सा कुरु॑। स॒शितं॑ मे॒ ब्रह्म॑  
स॒शितं॑ वीर्यं॑ बलम्। स॒शितं॑ क्ष॒त्रं जि॒ष्णु यस्या॒हमस्मि॑  
पुरो॑हितः। उदै॑षाम्बा॒हू अ॑तिर॒मुद्वर्च॑ उदू॒ बलम्। क्षि॒णोमि॑  
ब्रह्म॑णामि॒त्रानु॑न्नयामि॥ ४०॥

स्वा॑ अ॒हम्। दृशा॒नो रु॒क्म उ॒र्व्या व्य॑द्यौ॒र्दुर्म॑रुष॒मायुः॑ श्रि॒ये  
रु॒चा॒नः। अ॒ग्निर॒मृतो॑ अभव॒द्वयो॑भिर्यदे॒नं द्यौर॑जनयत्सुरेताः॑।  
विश्वा॑ रूपाणि॒ प्रति॑ मुञ्चते क॒विः प्रासा॑वी॒द्भद्रं॑ द्विपदे॒ चतु॑ष्पदे।  
वि नाक॑मख्यत्सवि॒ता वरे॑ण्योऽनु॒ प्रयाण॑मुषसो॒ वि रा॑जति।  
नक्तो॑षासा॒ सम॑नसा॒ विरू॑पे धा॒पये॑ते॒ शिशु॑मेक॑ समी॒ची।  
द्यावा॒ क्षामा॑ रु॒क्मः॥ ४१॥

अ॒न्तर्वि॑ भा॒ति दे॒वा अ॒ग्निं धा॑रयन्द्रवि॒णोदाः॑। सु॒पर्णो॑-  
ऽसि॒ गुरु॑त्मा॒न्निवृ॑त्ते शिरो॒ गाय॑त्रं चक्षुः॒ स्तोमं॑ आ॒त्मा  
सामं॑ ते त॒नूर्वा॑मदे॒व्यम्बृ॑हद्रथन्तरे प॒क्षौ य॑ज्ञाय॒ज्ञिय॑म्पुच्छं॒



छन्दा॑स्यङ्गानि॑ धिष्णि॑याः श॒फा यजू॑षि॒ नाम॑। सु॒पर्णो॑ऽसि  
ग॒रुत्मा॑न्दि॒व गच्छ॑ सु॒वः पत॑॥४२॥

नाभा॑ वने॒ येन॑ यामि॒ ख्यामां॑ रु॒क्माँऽष्टा॑त्रिंशच्च॥१०॥ ————— [१०]

अ॒ग्रे यं॒ य॒ज्ञम॑ध्व॒रं वि॒श्वतः॑ परि॒भूर॑सि। स इ॒द्वे॒वेषु॑  
गच्छ॑ति। सोम॒ यास्ते॑ म॒योभु॑व॒ ऊत॑यः सन्ति॑ दा॒शुषे॑।  
ताभि॑र्नोऽवि॒ता भ॑व। अ॒ग्नि॒र्मूर्धा॑ भु॒वः। त्वं नः॑ सोम॒ या  
ते॒ धामा॑नि। तत्स॑वि॒तुर्वरे॑ण्य॒म्भर्गो॑ दे॒वस्य॑ धीमहि। धियो॒  
यो नः॑ प्रचो॒दया॑त्। अचि॑त्ती॒ यच्च॑कृ॒मा दै॒व्ये जने॑ दी॒नैर्दक्षैः॑  
प्रभू॑ती पू॒रुष॑त्वता॑॥४३॥

दे॒वेषु॑ च सवि॒त॒र्मानु॑षेषु च॒ त्वं नो॒ अत्र॑ सुव॒ता॒दना॑गसः।  
चो॒दयि॑त्री सूनृ॒तानां॑ चे॒तन्ती॑ सु॒मती॑नाम्। य॒ज्ञं द॑धे॒ सर॑स्वती।  
पावी॑रवी क॒न्या चि॒त्रायुः॑ सर॑स्वती वी॒रप॑त्नी॒ धियं॑ धात्।  
ग्राभि॑रच्छि॒द्रं श॒रणं स॒जोषा॑ दुरा॒धर्षं॑ गृण॒ते शर्म॑ य॒सत्।  
पूषा॑ गा अ॒न्वे॒तु नः॑ पूषा र॑क्ष॒त्वर्वतः॑। पूषा॑ वाजं॒ स॒नोतु॑  
नः। शु॒क्रं ते॑ अ॒न्यद्य॑ज॒तं ते॑ अ॒न्यत्॥४४॥

विषु॑रूपे॒ अह॑नी॒ द्यौरि॑वासि। वि॒श्वा हि मा॒या

अवसि स्वधावो भद्रा ते पूषन्निह रातिरस्तु। तेऽवर्धन्त  
स्वतवसो महित्वना नाकं तस्थुरु रुरु चक्रिरे सदः।  
विष्णुर्यद्धावद्वृषणम्मदच्युतं वयो न सीदन्नधि बर्हिषि प्रिये।  
प्र चित्रमर्कं गृणते तुराय मारुताय स्वतवसे भरध्वम्। ये  
सहांसि सहसा सहन्ते॥४५॥

रेजते अग्ने पृथिवी मुखेभ्यः। विश्वे देवा विश्वे देवाः।  
द्यावा नः पृथिवी इमं सिध्रमद्य दिविस्पृशम्। यज्ञं देवेषु  
यच्छताम्। प्र पूर्वजे पितरा नव्यसीभिर्गीर्भिः कृणुध्वं सदने  
ऋतस्य। आ नो द्यावापृथिवी दैव्येन जनेन यातम्महि  
वां वरूथम्। अग्निं स्तोमेन बोधय समिधानो अमर्त्यम्।  
हव्या देवेषु नो दधत्। स हव्यवाडमर्त्य उशिग्दूतश्चनोहितः।  
अग्निर्धिया समृण्वति। शं नो भवन्तु वाजेवाजे॥४६॥

पूरुषत्वतां यजतन्ते अन्यत्सहन्ते चनोहितोऽष्टौ च॥११॥ [११]

विष्णोः क्रमोऽसि दिवस्पर्यन्तपतेऽपेतं समितं या जाता मा नो हिंसीद्धुवा-  
ऽस्यादित्यङ्गभूमिन्द्राग्नी रोचनैकादश॥११॥ विष्णोरस्मिन् हव्येति त्वाऽहं धीतिभिर्होत्रां  
अष्टाचत्वारिंशत्॥४८॥ विष्णोः क्रमोऽसि स त्वन्नो अग्ने॥ [१२]

॥द्वितीयः प्रश्नः॥

॥तैत्तिरीयसंहितायां चतुर्थकाण्डे द्वितीयः प्रश्नः॥

विष्णोः क्रमोऽस्यभिमातिहा गायत्रं छन्द आ रोह  
पृथिवीमनु वि क्रमस्व निर्भक्तः स यं द्विष्मो विष्णोः  
क्रमोऽस्यभिश्चिहा त्रैष्टुभं छन्द आ रोहान्तरिक्षमनु वि  
क्रमस्व निर्भक्तः स यं द्विष्मो विष्णोः क्रमोऽस्यरातीयतो  
हन्ता जागतं छन्द आ रोह दिवमनु वि क्रमस्व निर्भक्तः  
स यं द्विष्मो विष्णोः॥१॥

क्रमोऽसि शत्रूयतो हन्तानुष्टुभं छन्द आ रोह दिशोऽनु  
वि क्रमस्व निर्भक्तः स यं द्विष्मः। अक्रन्ददग्निः स्तनयन्निव  
द्यौः क्षामा रेरिहद्वीरुधः समञ्जन्। सद्यो जज्ञानो वि हीमिद्धो  
अख्यदा रोदसी भानुना भात्यन्तः। अग्नेऽभ्यावर्तिन्नभि न आ  
वर्तस्वायुषा वर्चसा सन्या मेधया प्रजया धनेन। अग्ने॥२॥

अङ्गिरः शतं तै सन्त्वावृतः सहस्रं त उपावृतः।  
तासाम्पोषस्य पोषेण पुनर्नो नष्टमा कृधि पुनर्नो रयिमा  
कृधि। पुनरूर्जा नि वर्तस्व पुनरग्न इषायुषा। पुनर्नः

पाहि विश्वतः। सुह रय्या नि वर्तस्वाग्ने पिन्वस्व  
धारया। विश्वप्स्त्रिया विश्वतस्परि। उदुत्तमं वरुण  
पाशमस्मदवाधमम्॥ ३ ॥

वि मध्यमः श्रथाय। अथा वयमादित्य व्रते तवानांगसो  
अदितये स्याम। आ त्वाहार्षमन्तरभूर्ध्रुवस्तिष्ठा- विचाचलिः।  
विशस्त्वा सर्वा वाञ्छन्त्वस्मिन्नाष्ट्रमधि श्रय। अग्ने  
बृहन्नुषसामूर्ध्वो अस्थान्निर्जग्मिवान्तमसो ज्योतिषागात्।  
अग्निर्भानुना रुशता स्वङ्ग आ जातो विश्वा सद्मान्यप्राः।  
सीद त्वम्मातुरस्याः॥ ४ ॥

उपस्थे विश्वान्यग्ने वयुनानि विद्वान्। मैनामर्चिषा  
मा तपसाभि शूशुचोऽन्तरस्याः शुक्रज्योतिर्वि भाहि।  
अन्तरग्ने रुचा त्वमुखायै सदेने स्वे। तस्यास्त्वः हरसा  
तपञ्जातवेदः शिवो भव। शिवो भूत्वा मह्यमग्नेऽथो सीद  
शिवस्त्वम्। शिवाः कृत्वा दिशः सर्वाः स्वं योनिमिहासदः।  
हःसः शुचिषद्वसुरन्तरिक्षसद्धोता वेदिषदतिथिर्दुरोणसत्।  
नृषद्वरसदृतसद्धोमसदजा गोजा ऋतजा अद्रिजा  
ऋतम्बृहत्॥ ५ ॥

दिवमनु वि क्रमस्व निर्भक्तः स यन्दिष्मो विष्णोर्धनेनाग्नेऽधुममस्याः शुचिषथोऽंश

च॥१॥

[१]

दिवस्परि प्रथमं जज्ञे अग्निरस्मद्वितीयम्परि जातवेदाः।  
तृतीयमप्सु नृमणा अजस्रमिन्धान एनं जरते स्वाधीः। विद्वा  
ते अग्ने त्रेधा त्रयाणि विद्वा ते सद्य विभृतम्पुरुत्रा। विद्वा  
ते नाम परमं गुहा यद्विद्वा तमुत्सं यत आजगन्थ। समुद्रे  
त्वा नृमणा अप्स्वन्तर्नृचक्षा ईधे दिवो अग्र ऊधन्। तृतीयै  
त्वा॥६॥

रजसि तस्थिवांसमृतस्य योनौ महिषा अहिन्वन्।  
अक्रन्ददग्निः स्तनयन्निव द्यौः क्षामा रेरिहद्वीरुधः समञ्जन्।  
सद्यो जज्ञानो वि हीमिद्धो अख्यदा रोदसी भानुना  
भात्यन्तः। उशिक्पावको अरतिः सुमेधा मर्तेष्वग्निरमृतो  
निधायि। इयर्ति धूममरुषम्भरिभ्रदुच्छुक्तेण शोचिषा  
द्यामिनक्षत्। विश्वस्य केतुर्भुवनस्य गर्भ आ॥७॥

रोदसी अपृणाञ्जायमानः। वीडुं चिदद्रिमभिनत्परायञ्जना  
यदग्निमयजन्त पञ्च। श्रीणामुदारो धरुणो रयीणाम्मनीषाणाम्प्राप  
सोमगोपाः। वसोः सूनुः सहसो अप्सु राजा वि भात्यग्रं

उषसा॑मिधा॒नः। यस्ते॑ अ॒द्य कृ॒णव॑द्भद्रशोचेऽपू॒षं दे॒व  
घृ॒तव॑न्तमग्ने। प्र तं न॑य प्र॒तरां॑ वस्यो॒ अच्छा॒भि द्यु॒म्रं दे॒वभ॑क्तं  
यवि॑ष्ठ। आ॥८॥

तम्भ॑ज सौश्र॒वसे॒ष्वग्न उ॒क्थउ॒क्थ आ भ॑ज श॒स्यमा॑ने।  
प्रि॒यः सूर्ये॑ प्रि॒यो अ॒ग्ना भ॑वा॒त्युज्जा॒तेन॑ भि॒नद॒दुञ्जनि॑त्वैः। त्वा॒मग्ने॑  
यज॑माना॒ अनु द्यून् विश्वा॒ वसू॑नि दधिरे॒ वार्या॑णि। त्वया॑ सह  
द्रवि॑णमिच्छ॒माना व्र॑जं गोम॑न्तमु॒शिजो॒ वि व॑व्रुः। दृ॒शानो॑  
रु॒क्म उ॒र्व्या व्य॑द्यौ॒र्दुर्म॑रुष॒मायुः॑ श्रि॒ये रु॑चा॒नः। अ॒ग्निर॒मृतो॑  
अभ॑व॒द्वयो॑भि॒र्यदे॑नं द्यौर॑ज॒नय॑त्सुरेताः॑॥९॥

तृतीये॑ त्वा॒ गर्भ॑ आ य॑वि॒ष्ठा यच्च॑त्वारि॑ च॥२॥ [२]

अन्न॑प॒तेऽन्न॑स्य नो दे॒ह्यन॑मी॒वस्य॑ शु॒ष्मिणः॑। प्रप्र॑दा॒तारं॑  
तारि॑ष ऊ॒र्जं नो॑ धेहि द्वि॒पदे॒ चतु॑ष्पदे। उदु॑ त्वा॒ विश्वे॑ दे॒वा  
अग्ने॑ भर॑न्तु चि॒त्तिभिः॑। स नो॑ भव शि॒वत॑मः सु॒प्रती॑को  
वि॒भाव॑सुः। प्रेद॑ग्ने ज्योति॑ष्मान् याहि शि॒वेभि॑र॒र्चिभि॑स्त्वम्।  
बृ॒हद्वि॑र्भानु॒भिर्भा॑स॒न्मा हि॑सी॒स्तनु॑वा॑ प्र॒जाः। स॒मिधा॑ग्निं  
दु॒वस्य॑त घृ॒तैर्बो॑धय॒ताति॑थिम्। आ॥१०॥

अस्मिन् हव्या जुहोतन। प्रप्रायमग्निर्भरतस्य शृण्वे वि  
 यत्सूर्यो न रोचते बृहद्भाः। अभि यः पूरुम् पृतनासु तस्थौ  
 दीदाय दैव्यो अतिथिः शिवो नः। आपो देवीः प्रति गृहीत  
 भस्मैतत्स्योने कृणुध्व९ सुरभावं लोके। तस्मै नमन्तां जनयः  
 सुपत्नीर्मातेवं पुत्रम्बिभृता स्वेनम्। अप्स्वग्ने सधिष्टव॥११॥

सौषधीरनु रुध्यसे। गर्भे सञ्जायसे पुनः। गर्भो  
 अस्योषधीनां गर्भो वनस्पतीनाम्। गर्भो विश्वस्य भूतस्याग्ने  
 गर्भो अपामसि। प्रसद्य भस्मना योनिमपश्च पृथिवीमग्ने।  
 स९सृज्य मातृभिस्त्वं ज्योतिष्मान्पुनरासदः। पुनरासद्य  
 सदनमपश्च पृथिवीमग्ने। शेषे मातुर्यथोपस्थेऽन्तरस्या९  
 शिवतमः। पुनरूर्जा॥१२॥

नि वर्तस्व पुनरग्र इषायुषा। पुनर्नः पाहि  
 विश्वतः। सह रय्या नि वर्तस्वाग्ने पिन्वस्व धारया।  
 विश्वप्स्त्रिया विश्वतस्परि। पुनस्त्वादित्या रुद्रा वसवः  
 समिन्धताम्पुनर्ब्रह्माणो वसुनीथ यज्ञैः। घृतेन त्वं तनुवो  
 वर्धयस्व सत्याः सन्तु यजमानस्य कामाः। बोधा नो अस्य  
 वचंसो यविष्ठ म९हिष्ठस्य प्रभृतस्य स्वधावः। पीयति त्वो

अनु त्वो गृणाति वन्दारुस्ते तनुवं वन्दे अग्ने। स बोधि  
सूरिर्मघवा वसुदावा वसुपतिः। युयोध्यस्मद्वेषांसि॥१३॥

आ तवोर्जाऽनु षोडश च॥३॥ [३]

अपैत वीत वि च सर्पतातो येऽत्र स्थ पुराणा ये  
च नूतनाः। अदादिदं यमोऽवसानमृथिव्या अक्रन्निमम्  
पितरो लोकमस्मै। अग्नेर्भस्मास्यग्नेः पुरीषमसि संज्ञानमसि  
कामधरणम्मयि ते कामधरणम्भूयात्। सं या वः प्रियास्तनुवः  
सम्प्रिया हृदयानि वः। आत्मा वो अस्तु॥१४॥

सम्प्रियः सम्प्रियास्तनुवो मम। अयं सो अग्निर्यस्मिन्सोम  
सुतं दधे जठरे वावशानः। सहस्रियं वाजमत्यं न सति  
ससवान्तसन्स्तूयसे जातवेदः। अग्ने दिवो अर्णमच्छा  
जिगास्यच्छा देवा ऊचिषे धिष्ण्या ये। याः परस्ताद्रोचने  
सूर्यस्य याश्चावस्तादुपतिष्ठन्त आपः। अग्ने यत्ते दिवि वर्चः  
पृथिव्यां यदोषधीषु॥१५॥

अप्सु वा यजत्र। येनान्तरिक्षमुर्वाततन्थ त्वेषः स  
भानुरर्णवो नृचक्षाः। पुरीष्यासो अग्नयः प्रावणेभिः  
सजोषसः। जुषन्ता हव्यमाहुतमनमीवा इषो महीः।



इडामग्रे पुरुद॑स॑ सुनिं गोः श॑श्वत्तुम॑ हव॑मानाय साध।  
 स्यान्नः सु॒नुस्तन॑यो वि॒जावाग्रे सा ते सु॒मति॑भू॒त्वस्मे। अ॒यं  
 ते योनि॑र॒ऋत्वियो॒ यतो जा॒तो अरो॑चथाः। तं जा॒नन्न॥१६॥

अ॒ग्न आ रो॒हाथा॑ नो वर्ध॑या र॒यिम्। चिद॑सि॒ तया॑  
 दे॒वत॑याङ्गि॒रस्व॑द्धुवा सी॑द परि॒चिद॑सि॒ तया॑ दे॒वत॑याऽ  
 ङ्गि॒रस्व॑द्धुवा सी॑द लो॒कम्पृ॑ण छि॒द्रम्पृ॑णाथो सी॑द शि॒वा  
 त्वम्। इ॒न्द्राग्नी॑ त्वा बृ॒हस्पति॑र॒स्मिन् योना॑वसीषदन्न। ता  
 अ॒स्य सू॒ददो॑हसः सोम॑ऽ श्री॒णन्ति॒ पृश्न॑यः। जन्म॑ दे॒वानां॑  
 वि॒शस्त्रि॑ष्वा रो॒चने॒ दिवः॥१७॥

अ॒स्त्वोष॑धीषु जा॒नन्न॑ष्टाच॒त्वारि॑शच्च॥४॥ [४]

समि॑त॒ऽ सं क॑ल्पेथा॒ऽ सम्प्रि॑यौ रोचि॒ष्णू सु॑मन॒स्यमा॑नौ।  
 इष॑मूर्ज॒मभि॑ सं॒वसा॑नौ सं वा॒म्मना॑सि॒ सं व्र॑ता समु॒  
 चि॒त्तान्या॑करम्। अ॒ग्रे पु॑री॒ष्याधि॑पा भ॒वा त्वं नः॑। इष॑मूर्जं  
 यज॑मानाय धेहि। पु॒री॒ष्यस्त्वम॑ग्रे र॒यिमा॑न्यु॒ष्टिमा॑ऽ अ॒सि।  
 शि॒वाः कृ॒त्वा दि॒शः सर्वाः॑ स्वां योनि॑मि॒हास॑दः। भव॑तं नः  
 सम॑नसौ समो॑कसौ॥१८॥

अ॒रे॒पसौ॑। मा य॒ज्ञऽ हि॑सिष्ट॒म्मा य॒ज्ञप॑तिं जा॒तवे॑दसौ

शि॒वौ भ॑वतम॒द्य नः॑ । मा॒तेव॑ पु॒त्रम्पृ॑थि॒वी पु॑री॒ष्यम॒ग्निः  
स्वे योना॑वभा॒रुखा॑ । तां वि॒श्वैर्दे॒वैर्ऋ॒तुभिः॑ संविदा॒नः  
प्र॒जाप॑तिर्वि॒श्वक॑र्मा वि मु॒ञ्चतु॑ । यद॒स्य पा॒रे रज॑सः शु॒क्रं  
ज्योति॑रजा॒यत॑ । तन्नः॑ पर्ष॒दति॒ द्विषो॑ऽग्ने॒ वैश्वान॑र॒ स्वाहा॑ ।  
नमः॒ सु ते॑ निर्ऋ॒ते वि॒श्वरू॑पे ॥ १९ ॥

अ॒य॒स्मयं॑ वि चृ॒ता ब॒न्धमे॒तम् । य॒मेन॒ त्वं य॒म्या  
संविदा॒नोत्त॑मं नाक॒मधि॑ रोहये॒मम् । यत्ते॑ दे॒वी निर्ऋ॑तिरा  
ब॒बन्ध॑ दामं ग्री॒वास्व॑विच॒त्यम् । इ॒दं ते॒ तद्वि॒ ष्या॒म्यायु॑षो न  
म॒ध्याद॑था जी॒वः पि॒तुम॑द्धि प्रमु॒क्तः । यस्या॑स्ते अ॒स्याः क्रू॒र  
आ॒सञ्जु॑होम्ये॒षाम्ब॒न्धाना॑मव॒सर्ज॑नाय । भूमि॒रिति॑ त्वा जना॑  
वि॒दुर्निर्ऋ॑तिः ॥ २० ॥

इति॑ त्वा॒हम्परि॑ वेद वि॒श्वतः॑ । असु॑न्वन्त॒मयं॑जमानमिच्छ  
स्तेन॑स्ये॒त्यां तस्कर॑स्यान्वै॒षि । अ॒न्यम॒स्मदि॑च्छ सा तं इ॒त्या  
नमो॑ देवि निर्ऋ॒ते तुभ्य॑मस्तु । दे॒वीम॒हं निर्ऋ॑तिं वन्द॑मानः  
पि॒तेव॑ पु॒त्रं द॑सये॒ वचो॑भिः । वि॒श्वस्य॑ या जाय॑मानस्य वेद  
शि॒रःशि॒रः प्र॑ति॒ सूरी॑ वि च॑ष्टे । नि॒वेश॑नः सं॒गम॑नो वसू॒नां  
विश्वा॑ रू॒पाभि॑ च॑ष्टे ॥ २१ ॥

शचीभिः। देव इव सविता सत्यधर्मेन्द्रो न तस्थौ समरे  
पथीनाम्। सं वरत्रा दधातन् निराहावान्कृणोतन। सिञ्चामहा  
अवटमुद्रिणं वयं विश्वाहादस्तमक्षितम्। निष्कृताहावमवटः  
सुवरत्रः सुषेचनम्। उद्रिणः सिञ्चे अक्षितम्। सीरा युञ्जन्ति  
कवयो युगा वि तन्वते पृथक्। धीरा देवेषु सुम्रया। युनक्त  
सीरा वि युगा तनोत कृते योनौ वपतेह॥२२॥

बीजम्। गिरा च श्रुष्टिः सभरा असन्नो नेदीय इत्सृण्या  
पक्रमायत्। लाङ्गलम्पवीरवः सुशेवः सुमतित्सरु।  
उदित्कृषति गामविम्प्रफर्व्यं च पीवरीम्। प्रस्थावद्रथवाहनम्।  
शुनं नः फाला वि तुदन्तु भूमिः शुनं कीनाशा अभि  
यन्तु वाहान्। शुनम्पर्जन्यो मधुना पयोभिः शुनासीरा  
शुनमस्मासु धत्तम्। कामं कामदुघे धुक्ष्व मित्राय वरुणाय  
च। इन्द्रायाग्रये पूष्ण ओषधीभ्यः प्रजाभ्यः। घृतेन सीता  
मधुना समक्ता विश्वैर्देवैरनुमता मरुद्भिः। ऊर्जस्वती पयसा  
पिन्वमानास्मान्त्सीते पयसाभ्याववृत्स्व॥२३॥

समौकसौ विश्वरूपे विदुर्निर्ऋतिरभि चष्ट इह मित्राय द्वाविंशतिश्च॥५॥—[५]

या जाता ओषधयो देवेभ्यस्त्रियुगम्पुरा। मन्दांमि

बभ्रूणांमहः शतं धामानि सप्त च। शतं वो अम्ब धामानि  
 सहस्रमुत वो रुहः। अथा शतक्रत्वो यूयमिममै अगदं  
 कृत। पुष्पावतीः प्रसूवतीः फलिनीरफला उत। अश्वा इव  
 सजित्वरीर्वीरुधः पारयिष्णवः। ओषधीरिति मातरस्तद्वो  
 देवीरुपं ब्रुवे। रपांसि विघ्नतीरित रपः॥२४॥

चातयमानाः। अश्वत्थे वो निषदनम्पर्णे वो वसतिः  
 कृता। गोभाज इत्किलासथ यत्सनवथ पूरुषम्। यदहं  
 वाजयन्निमा ओषधीरहस्त आदधे। आत्मा यक्ष्मस्य नश्यति  
 पुरा जीवगृभो यथा। यदोषधयः संगच्छन्ते राजानः  
 समिताविव। विप्रः स उच्यते भिषग्रक्षोहामीवचातनः।  
 निष्कृतिर्नाम वो माताथा यूयं स्थ संकृतीः। सराः  
 पतत्रिणीः॥२५॥

स्थन यदामयति निष्कृत। अन्या वो अन्यामवत्वन्यान्यस्या  
 उपावता। ताः सर्वा ओषधयः संविदाना इदम्मे प्रावता  
 वचः। उच्छुष्मा ओषधीनां गावो गोष्ठादिवेरते। धनं  
 सनिष्यन्तीनामात्मानं तव पूरुष। अति विश्वाः परिष्ठाः स्तेन  
 इव व्रजमक्रमुः। ओषधयः प्राचुच्यवुर्यत् किं च तनुवां  
 रपः। याः॥२६॥

तु आ॒त॒स्थुरा॒त्मानं॒ या आ॒वि॒वि॒शुः परुः॑परुः। तास्ते॒  
यक्ष्मं॒ वि बा॑धन्तामु॒ग्रो म॑ध्यम॒शीरि॑व। सा॒कं य॑क्ष्म॒ प्र प॑त॒  
श्ये॒नेन॑ कि॒किदी॒विना॑। सा॒कं वा॑तस्य॒ ध्राज्या॑ सा॒कं न॑श्य  
नि॒हाक॑या। अ॒श्वाव॑ती॒ सोम॑वतीमूर्जय॑न्ती- मुदो॑जसम्।  
आ वि॑त्सि॒ सर्वा॑ ओष॑धीर॒स्मा अ॑रि॒ष्टता॑तये। याः फ॒लिनी॑र्या  
अ॒फ॒ला अ॑पु॒ष्पा याश्च॑ पु॒ष्पिणीः॑। बृह॒स्पति॑प्रसूता॒स्ता नो॑  
मु॒ञ्चन्त्व॑हंसः। याः॥ २७ ॥

ओष॑धयः सोम॑राज्ञीः प्रवि॑ष्टाः पृथि॒वीम॑नु। तासां॒  
त्वम॑स्युत्त॒मा प्र णो॑ जी॒वात॑वे सु॒व। अ॒व॒पत॑न्तीरवद॒न्दि॒व  
ओष॑धयः परि॑। यं जी॒वम॑श्न॒वाम॑हे न स रि॑ष्याति॒ पूरु॑षः।  
याश्चे॒दमु॑प॒शृण्व॑न्ति॒ याश्च॑ दूर॒म्परा॑गताः। इ॒ह सं॑ग॒त्य ताः  
सर्वा॑ अ॒स्मै सं द॑त्त भेष॒जम्। मा वो॑ रिष॒त्खनि॑ता यस्मै॑  
चा॒हं खना॑मि वः। द्वि॒पच्च॑तु॒ष्पद॒स्माक॑ सर्व॑म॒स्त्वना॑तुरम्।  
ओष॑धयः सं व॑दन्ते॒ सोमे॑न स॒ह राज्ञा॑। यस्मै॑ क॒रोति॑  
ब्राह्म॑णस्त॒ राज॑न्यारयामसि॥ २८ ॥

रपः प॒त॒त्रिणी॑र्या अ॒हंसो॑ याः खना॑मि वो॒ऽष्टा॑दश च॥ ६ ॥ [६]

मा नो॑ हि॒सी॒ज्जनि॑ता यः पृथि॒व्या यो वा॒ दि॒वः

स॒त्यध॑र्मा ज॒जान॑। यश्चा॒पश्च॑न्द्रा बृ॒हती॑र्ज॒जान॑ कस्मै॑ दे॒वाय॑  
ह॒विषा॑ विधेम। अ॒भ्याव॑र्तस्व पृथि॒वि य॒ज्ञेन॑ पय॑सा स॒ह।  
व॒पां ते॑ अ॒ग्निरि॑षितोऽव॑ सर्पतु। अ॒ग्ने यत्ते॑ शु॒क्रं यच्च॑न्द्रं  
यत्पू॒तं यद्य॑ज्ञि॒यम्। तद्दे॒वेभ्यो॑ भ॒राम॑सि। इष॒मूर्ज॑म॒हमि॑त  
आ॥ २९॥

द॒द ऋ॑तस्य॒ धाम्नो॑ अ॒मृत॑स्य॒ योनेः॑। आ नो॒ गोषु॑  
विश॒त्वौष॑धीषु॒ जहा॑मि से॒दिम॑नि॒राम॑मी॒वाम्। अ॒ग्ने तव॑  
श्रवो॒ वयो॑ महि॒ भ्राज॑न्त्य॒र्चयो॑ विभाव॑सो। बृ॒हद्भानो॑ शव॑सा  
वाज॑मु॒क्थ्यं दधा॑सि दा॒शुषे॑ कवे। इ॒रज्य॑न्न॒ग्ने प्र॑थयस्व  
ज॒न्तुभि॑र॒स्मे रा॒यो अ॒मर्त्य॑। स द॑र्श॒तस्य॑ वपु॑षो॒ वि  
रा॑जसि पृ॒णक्षि॑ सान॒सि५ र॒यिम्। ऊ॒र्जो न॑पा॒ज्जात॑वेदः  
सुश॒स्तिभि॑र्म॒न्दस्व॥ ३०॥

धी॒तिभि॑र्हितः। त्वे इषः॒ सं द॑धु॒र्भूरि॑रेतसश्चि॒त्रोत॑यो  
वा॒मजा॑ताः। पा॒वक॑वर्चाः शु॒क्रव॑र्चा अ॒नून॑वर्चा उ॒दिय॑र्षि  
भा॒नुना॑। पु॒त्रः पि॒तरा॑ वि॒चर॑न्नुपा॒वस्यु॑भे पृ॒णक्षि॑ रोद॑सी।  
ऋ॒तावा॑न॒म्महि॑षं वि॒श्वच॑र्षणिम॒ग्नि५ सु॒म्नाय॑ दधिरे पु॒रो  
जनाः॑। श्रु॒त्कर्ण॑५ स॒प्रथ॑स्तमन्त्वा गि॒रा दै॒व्य॒म्मानु॑षा

युगा। निष्कर्तारमध्वरस्य प्रचेतसं क्षयन्तु२ राधसे महे।  
रातिम्भृगूणामुशिजं कविक्रतुम्पृणक्षि सानसिम्॥३१॥

रयिम्। चितः स्थ परिचित ऊर्ध्वचितः श्रयध्वं तया  
देवतयाङ्गिरस्वद् ध्रुवाः सीदत। आ प्यायस्व समेतु ते विश्वतः  
सोम वृष्णियम्। भवा वाजस्य संगथे। सं ते पयांसि  
समु यन्तु वाजाः सं वृष्णियान्यभिमातिषाहः। आप्यायमानो  
अमृताय सोम दिवि श्रवांस्युत्तमानि धिष्व॥३२॥

आ मन्दस्व सानसिमेकान्नचत्वारि२शब्॥७॥ [७]

अभ्यस्थाद्विश्वाः पृतना अरातीस्तदग्निराह तदु सोम  
आह। बृहस्पतिः सविता तन्म आह पुषा माधात्सुकृतस्य  
लोके। यदक्रन्दः प्रथमं जायमान उद्यन्त्समुद्रादुत वा  
पुरीषात्। श्येनस्य पक्षा हरिणस्य बाहू उपस्तुतं जनिम तत्ते  
अर्वन्। अपाम्पृष्ठमसि योनिरग्नेः समुद्रमभितः पिन्वमानम्।  
वर्धमानम्महः॥३३॥

आ च पुष्करं दिवो मात्रया वरिणा प्रथस्व। ब्रह्म  
जज्ञानम्प्रथमम्पुरस्ताद्वि सीमतः सुरुचो वेन आवः। स  
बुध्निया उपमा अस्य विष्ठाः सतश्च योनिमसतश्च विवः।

हिरण्यगर्भः समवर्तताग्रे भूतस्य जातः पतिरेकं आसीत्।  
स दाधार पृथिवीं द्यामुतेमां कस्मै देवाय हविषा विधेम।  
द्रप्सश्चस्कन्द पृथिवीमनु॥३४॥

द्यामिमं च योनिमनु यश्च पूर्वः। तृतीयं योनिमनु संचरन्तं  
द्रप्सं जुहोम्यनु सप्त होत्राः। नमो अस्तु सर्पेभ्यो ये के च  
पृथिवीमनु। ये अन्तरिक्षे ये दिवि तेभ्यः सर्पेभ्यो नमः। येऽदो  
रोचने दिवो ये वा सूर्यस्य रश्मिषु। येषामप्सु सदः कृतं  
तेभ्यः सर्पेभ्यो नमः। या इषवो यातुधानानां ये वा वनस्पती  
रनु। ये वावटेषु शेरते तेभ्यः सर्पेभ्यो नमः॥३५॥

महोऽनु यातुधानानामेकादश च॥८॥ [८]

ध्रुवासि धरुणास्तृता विश्वकर्मणा सुकृता। मा त्वा समुद्र  
उद्वधीन्मा सुपर्णोऽव्यथमाना पृथिवीं दृह। प्रजापतिस्त्वा  
सादयतु पृथिव्याः पृष्ठे व्यचस्वतीम्प्रथस्वतीम्प्रथो-  
ऽसि पृथिव्यसि भूरसि भूमिरस्यदितिरसि विश्वधाया  
विश्वस्य भुवनस्य धर्त्री पृथिवीं यच्छ पृथिवीं दृह  
पृथिवीम्मा हिंसीर्विश्वस्मै प्राणायापानाय व्यानायोदानाय  
प्रतिष्ठायै॥३६॥



चरित्रायाग्निस्त्वाभि पातु म॒ह्या स्व॒स्त्या छु॒र्दिषा॒ शंत॑मे॒न॒  
 तया॑ दे॒वत॑याङ्गिर॒स्वद्ध्रु॒वा सी॑द। काण्डा॑त्काण्डात् प्र॒रोह॑न्ती  
 परु॑षःपरु॑षः परि॑। ए॒वा नो॑ दूर्वे॒ प्र त॑नु॒ सह॑स्रेण॒ शते॑न॒  
 च। या॑ श॒तेन॑ प्र॒तनो॑षि॒ सह॑स्रेण॒ वि॒रोह॑सि। तस्या॑स्ते  
 दे॒वीष्ट॑के॒ वि॒धेम॑ ह॒विषा॑ व॒यम्। अ॒षाढा॑सि॒ सह॑माना॒  
 सह॑स्वारा॑तीः॒ सह॑स्वारा॑तीय॒तः सह॑स्व॒ पृ॒तनाः॒ सह॑स्व  
 पृ॒तन्य॑तः। सह॑स्र॒वीर्या॑॥३७॥

अ॒सि सा मा॑ जि॒न्वा मधु॑ वा॒ता ऋ॒ताय॑ते मधु॑  
 क्षर॑न्ति॒ सिन्ध॑वः। मा॒ध्वीर्नः॑ स॒न्त्वोष॑धीः। मधु॑ न॒क्तंमु॑तोष॒सि  
 मधु॑म॒त्पार्थि॑व॒ रजः॑। मधु॑ द्यौर॑स्तु नः पि॒ता। मधु॑मा॒न्नो  
 वन॑स्पति॒र्मधु॑मा॒ अस्तु॑ सूर्यः॑। मा॒ध्वीर्गा॒वो भव॑न्तु नः।  
 म॒ही द्यौः पृ॑थि॒वी च॑ न इ॒मं य॒ज्ञमि॑मिक्षताम्। पि॒पृतां॑ नो॒  
 भरी॑मभिः। तद्वि॒ष्णोः पर॑मम्॥३८॥

प॒दं सदा॑ पश्यन्ति सूर॒यः। दि॒वीव॒ चक्षु॑रा॒त॑तम्। ध्रु॒वासि॑  
 पृथि॒वि सह॑स्व पृ॒तन्य॑तः। स्यू॒ता दे॒वेभि॑र॒मृते॑नागाः। यास्ते॑  
 अ॒ग्ने सूर्ये॑ रुच॑ उ॒द्यतो॑ दि॒वमा॑त॒न्वन्ति॑ र॒श्मिभिः॑। ताभिः॑  
 सर्वा॑भी रु॒चे जना॑य नस्कृ॒धि। या वो॑ दे॒वाः सूर्ये॑ रुचो॒

गोष्वश्वेषु या रुचः। इन्द्राग्नी ताभिः सर्वाभी रुचं नो धत्त  
बृहस्पते। विराट्॥३९॥

ज्योतिरधारयत्सम्राड्ज्योतिरधारयत्स्वराड्ज्योतिरधारयत्।  
अग्ने युक्ष्वा हि ये तवाश्वासो देव साधवः। अरं वहन्त्याशवः।  
युक्ष्वा हि देवहूतमा२ अश्वा२ अग्ने रथीरिव। नि होता पूर्यः  
सदः। द्रप्सश्चस्कन्द पृथिवीमनु द्यामिमं च योनिमनु यश्च  
पूर्वः। तृतीयं योनिमनु संचरन्तं द्रप्सं जुहोम्यनु सप्त॥४०॥

होत्राः। अभूदिदं विश्वस्य भुवनस्य वाजिनमग्नेर्वैश्वानरस्य  
च। अग्निज्योतिषा ज्योतिष्मान्नुक्मो वर्चसा वर्चस्वान्। ऋचे  
त्वा रुचे त्वा समित्स्रवन्ति सरितो न धेनाः। अन्तरहृदा  
मनसा पूयमानाः। घृतस्य धारा अभि चाकशीमि। हिरण्ययो  
वेतसो मध्य आसाम्। तस्मिन्त्सुपर्णो मधुकृत्कुलायी  
भजन्नास्ते मधु देवताभ्यः। तस्यासते हरयः सप्त तीरे स्वधां  
दुहाना अमृतस्य धाराम्॥४१॥

प्रतिष्ठायै सहस्रवीर्या परमं विराट्स्सप्त तीरे चत्वारि च॥९॥ [९]

आदित्यं गर्भम्पयसा समञ्जन्त्सहस्रस्य प्रतिमां  
विश्वरूपम्। परि वृद्धिं हरसा माभि मृक्षः शतायुषं कृणुहि

ची॒य॒मा॒नः॑। इ॒म॒म्मा हि॑सी॒र्द्धि॒पाद॑म्पशूनां सह॑स्राक्ष॒  
मेध॒ आ ची॒य॒मा॒नः॑। म॒यु॒मा॒र॒ण्य॒मनु॑ ते दिशामि तेन॑  
चि॒न्वा॒न॒स्त॒नु॒वो नि षी॑द। वा॒त॒स्य॒ ध्राजि॑ वरुणस्य॒ नाभि॑मश्वं  
जज्ञा॑नं स॒रि॒रस्य॒ मध्ये॑। शि॒शुं न॒दीना॒ हरि॑मद्रि॒बुद्ध॑मग्रे  
मा हि॑सीः॥४२॥

प॒र॒मे व्यो॑मन्। इ॒म॒म्मा हि॑सी॒रेक॑शफम्पशूनां क॑निकृ॒दं  
वा॒जिनं॒ वाजि॑नेषु। गौ॒र॒मा॒र॒ण्य॒मनु॑ ते दिशामि तेन॑  
चि॒न्वा॒न॒स्त॒नु॒वो नि षी॑द। अ॒ज॒स्र॒मि॒न्दु॒मरु॑षम्भु॒र॒ण्यु॒म॒ग्नि॒मी॒डे  
पूर्व॑चित्तौ नमो॑भिः। स पर्व॑भिर्ऋ॒तु॒शः कल्प॑मानो गाम्मा  
हि॑सी॒रदि॑तिं वि॒राज॑म्। इ॒मं स॑मु॒द्रं श॒तधा॑र॒मुत्सं॑  
व्य॒च्य॒मा॒न॒म्भु॒व॑नस्य॒ मध्ये॑। घृ॒तं दुहा॑ना॒मदि॑तिं जना॒याग्रे॑  
मा॥४३॥

हि॑सीः प॒र॒मे व्यो॑मन्। ग॒व॒य॒मा॒र॒ण्य॒मनु॑ ते दिशामि तेन॑  
चि॒न्वा॒न॒स्त॒नु॒वो नि षी॑द। वरू॑त्रिं त्वष्टु॒र्वरु॑णस्य॒ नाभि॑मविं  
जज्ञा॑नां रज॑सः प॒र॒स्मात्। म॒हीं सा॑ह॒स्री॑मसु॒रस्य॑  
मा॒या॒म॒ग्रे मा हि॑सीः प॒र॒मे व्यो॑मन्। इ॒मामू॑र्णा॒युं वरु॑णस्य  
मा॒यां त्वच॑म्पशूनां द्वि॒पदां॒ चतु॑ष्पदाम्। त्वष्टुः प्र॒जानां॑ प्रथ॒मं

ज॒नि॒त्र॒म॒ग्ने॒ मा हि॑सीः पर॒मे व्यो॑मन्। उष्ट्र॑मा॒र॒ण्यम॑नु॥४४॥

ते दि॒शामि॑ तेन॑ चि॒न्वा॒नस्त॑नुवो॒ नि षी॑द। यो  
अ॒ग्निर॒ग्नेस्त॑प॒सोऽधि॑ जा॒तः शोचा॑त्पृथि॒व्या उ॒त वा॑  
दि॒वस्प॑रिं। येन॑ प्र॒जा वि॒श्वक॑र्मा व्या॒न॒द्वम॑ग्ने हेडुः परि॑ ते  
वृण॑क्तु। अ॒जा ह्य॑ग्नेरज॒निष्ट॑ गर्भा॒त्सा वा अ॑पश्य॒ज्जनितार॑म॒ग्ने।  
तया॒ रोह॑मा॒य॒न्नुप॑ मे॒ध्या॑स॒स्तया॑ दे॒वा दे॒वता॑म॒ग्रं आ॑यन्।  
श॒र॒भमा॑र॒ण्यम॑नु॒ ते दि॒शामि॑ तेन॑ चि॒न्वा॒नस्त॑नुवो॒ नि  
षी॑द॥४५॥

अग्ने॒ मा हि॑सीर॒ग्ने मोष्ट्र॑मा॒र॒ण्यम॑नु॒ श॒र॒भं नव॑ च॥१०॥ आ॒दि॒त्यमि॑म॒न्दि॒पाद॑म्युं  
वा॒त्स्याश्व॑मि॒ममे॑क॒शफ॑ङ्गैर॒मज॑स्र॒ङ्गव॑यं वरू॒त्रिमि॑वि॒मिमा॑मू॒र्णायु॑मुष्ट्रं यो अ॒ग्निर॒ग्नेः श॑र॒भम्॥[१०]

इन्द्रा॑ग्नी रोच॒ना दि॒वः परि॑ वा॒जेषु॑ भूषथः। तद्वा॑ चेति॒  
प्र वी॒र्य॑म्। श्रथ॑द्व॒त्रमु॑त स॒नोति॑ वा॒जमिन्द्रा॑ यो अ॒ग्नी सह॑री  
सप॒र्यात्। इ॒र॒ज्यन्ता॑ वस॒व्यस्य॑ भूरेः सह॑स्त॒मा सह॑सा  
वा॒ज॒यन्ता॑। प्र च॑र्ष॒णिभ्यः॑ पृ॒तना॑ ह॒वेषु॑ प्र पृथि॒व्या रि॑रिचाथे  
दि॒वश्च॑। प्र सि॒न्धुभ्यः॑ प्र गि॒रिभ्यो॑ म॒हित्वा प्रेन्द्रा॑ग्नी वि॒श्वा  
भुव॑नात्य॒न्या। मरु॑तो॒ यस्य॑ हि॥४६॥

क्षये॑ पा॒था दि॒वो वि॑महसः। स सु॒गो॒पात॑मो॒ जनः॑। य॒ज्ञैर्वा॑

यज्ञवाहसो विप्रस्य वा मतीनाम्। मरुतः शृणुता हवम्।  
 श्रियसे कम्भानुभिः सम्मिमिक्षिरे ते रश्मिभिस्त ऋक्भिः  
 सुखादयः। ते वाशीमन्त इष्मिणो अभीरवो विद्रे प्रियस्य  
 मारुतस्य धाम्नः। अव ते हेड उदुत्तमम्। कया नश्चित्र आ  
 भुवदूती सदावृधः सखा। कया शचिष्ठया वृता॥४७॥

को अद्य युङ्क्ते धुरि गा ऋतस्य शिमीवतो भामिनो  
 दुरह्णायून्। आसन्निषून् हृत्स्वसो मयोभून् य एषाम्  
 भृत्यामृणधत्स जीवात्। अग्ने नया देवानां शं नो भवन्तु  
 वाजेवाजे। अप्स्वग्ने सधिष्टव सौषधीरनु रुध्यसे। गर्भे  
 सञ्जायसे पुनः। वृषा सोम द्युमां अंसि वृषा देव वृषव्रतः।  
 वृषा धर्माणि दधिषे। इमम्मे वरुण तत्त्वा यामि त्वं नो  
 अग्ने स त्वं नो अग्ने॥४८॥

हि वृता म् एकादश च॥११॥

अपां त्वेमन्नयं पुरो भुवः प्राची ध्रुवखित्तिस्त्र्यविरिन्द्राग्नी मा छन्द आशुस्त्रिवृदग्नेर्भागो-  
 ऽस्येकयेयमेव सा याग्ने जातान्निर्वृत्राणि त्रयोदश॥१३॥ अपां त्वेन्द्राग्नी इयमेव देवताता  
 षट्त्रिंशत्॥३६॥ अपां त्वेमन् हविषा वर्धनेन॥

[१२]

॥तृतीयः प्रश्नः॥

॥तैत्तिरीयसंहितायां चतुर्थकाण्डे तृतीयः प्रश्नः॥

अपां त्वेमन्थसादयाम्यपां त्वोद्वन्थसादयाम्यपां त्वा  
भस्मन्थसादयाम्यपां त्वा ज्योतिषि सादयाम्यपां त्वार्यने  
सादयाम्यर्णवे सदने सीद समुद्रे सदने सीद सलिले  
सदने सीदापां र्व्यये सीदापां सधिषि सीदापां त्वा  
सदने सादयाम्यपां त्वा सधस्थे सादयाम्यपां त्वा  
पुरीषे सादयाम्यपां त्वा योनौ सादयाम्यपां त्वा पार्थसि  
सादयामि गायत्री छन्दस्त्रिष्टुप्छन्दो जगती छन्दोऽनुष्टुप्छन्दः  
पङ्क्तिश्छन्दः॥१॥

योनौ पञ्चदश च॥१॥ [१]

अयम्पुरो भुवस्तस्य प्राणो भौवायनो वसन्तः प्राणायनो  
गायत्री वासन्ती गायत्रियै गायत्रं गायत्रादुपां शु-  
रुपां शोस्त्रिवृत्रिवृतौ रथंतरं रथंतराद्वसिष्ठ ऋषिः  
प्रजापतिगृहीतया त्वया प्राणं गृह्णामि प्रजाभ्योऽयं  
दखिषणा विश्वकर्मा तस्य मनो वैश्वकर्मणं ग्रीष्मो  
मानसस्त्रिष्टुग्रेष्मी त्रिष्टुभं ऐडमैडादन्तर्यामोऽन्तर्यामात्

पञ्चदशः पञ्चदशाद्वहद्वहतो भुरद्वाज ऋषिः प्रजापतिगृहीतया  
त्वया मनः॥२॥

गृह्णामि प्रजाभ्योऽयम्पश्चाद्विश्वव्यचास्तस्य चख्षुर्वैश्वव्यचसं  
वर्षाणि चारख्षुषाणि जगती वार्षी जगत्या ऋख्षममृख्षमाच्छु  
शुक्राथसप्तदशः सप्तदशाद्वैरूपं वैरूपाद्विश्वामित्र ऋषिः  
प्रजापतिगृहीतया त्वया चख्षुर्गृह्णामि प्रजाभ्य इदमुत्तराथ्सुवस्त  
श्रोत्रं सौव शरच्छौत्र्यनुष्टुप्छारद्यनुष्टुभः स्वारः  
स्वारान्मन्थी मन्थिन एकविंश एकविंशाद्वैराजं  
वैराजाज्जमदग्निरऋषिः प्रजापतिगृहीतया॥३॥

त्वया श्रोत्रं गृह्णामि प्रजाभ्य इयमुपरि मतिस्तस्यै  
वाङ्माती हैमन्तो वाच्यायनः पङ्क्तिर्हैमन्ती पङ्क्तौ  
निधनवन्निधनवत आग्रयण आग्रयणात्रिणवत्रयस्त्रिंशौ  
त्रिणवत्रयस्त्रिंशाभ्यां शाक्ररैवते शाक्ररैवताभ्यां  
विश्वकर्मर्षिः प्रजापतिगृहीतया त्वया वाचं गृह्णामि  
प्रजाभ्यः॥४॥

त्वया मनो जमदग्निरऋषिः प्रजापतिगृहीतया त्रिंशच्च॥२॥ [२]

प्राचीं दिशां वसन्त ऋतूनामग्निर्देवता ब्रह्म द्रविणं

त्रिवृथस्तोमः स उ पञ्चदशवर्तनिस्र्यविर्वयः कृतमयांनां  
 पुरोवातो वातः सानंग ऋषिर्दखिणा दिशां ग्रीष्म  
 ऋतूनामिन्द्रो देवतां ख्यत्रं द्रविणम्पञ्चदशः स्तोमः स उ  
 सप्तदशवर्तनिर्दित्यवाङ्मयस्त्रेतायांनां दखिणाद्वातो वातः  
 सनातन ऋषिः प्रतीची दिशां वर्षा ऋतूनां विश्वे देवा  
 देवता विट्॥५॥

द्रविणं सप्तदशः स्तोमः स उवेकविंशवर्तनिस्रिवृथसो  
 वयो द्वापुरोऽयानाम्पञ्चाद्वातो वातोऽहभून् ऋषिरुदीची  
 दिशां शरदृतूनामित्रावरुणौ देवता पुष्टं द्रविणमेकविंशः  
 स्तोमः स उ त्रिणववर्तनिस्र्यवाङ्मय आस्कन्दो--  
 ऽयानामुत्तराद्वातो वातः प्रत्न ऋषिरूर्ध्वा दिशां  
 हेमन्तशिशिरावृतूनाम्बृहस्पतिर्देवता वर्चो द्रविणं त्रिणवः  
 स्तोमः स उ त्रयस्त्रिंशवर्तनिः पष्ठवाद्वयोऽभिभूरयांनां  
 विष्वग्वातो वातः सुपर्ण ऋषिः पितरः पितामहाः  
 परेऽवरे ते नः पान्तु ते नोऽवन्त्वस्मिन्ब्रह्मन्त्रस्मिन्ख्यत्रे-  
 ऽस्यामाशिष्यस्याम्पुरोधायांस्मिन्कर्मन्त्रस्यां देवहृत्याम्॥६॥



ध्रुवखि॑तिर्ध्रुवयो॑निर्ध्रुवा॑सि ध्रु॒वं योनि॑मा सी॒द सा॒ध्या।  
 उ॒ख्यस्य॑ के॒तुम्प्र॑थ॒मम्पु॒रस्ता॑द॒श्विना॑ध्व॒र्यू सा॑दयतामिह॒ त्वा॑।  
 स्वे द॒ख्ये द॒ख्यपि॑तेह सी॒द दे॒वत्रा॑ पृ॒थि॒वी बृ॑ह॒ती  
 ररा॑णा। स्वा॒स॒स्था त॒नुवा॑ सं वि॒शस्व॑ पि॒तेवै॑धि सू॒नव॑ आ  
 सु॒शेवा॑श्विना॑ध्व॒र्यू सा॑दयतामिह॒ त्वा॑। कु॒ला॒यिनी॑ वसु॑मती  
 वयो॒धा र॒यिं नो॑ वर्ध॒ बहु॑ल॒ सु॒वीर॑म्॥७॥

अपा॑मतिं दु॒र्म॒तिम्बा॑ध॒माना॑ रा॒यस्पो॑षे य॒ज्ञप॑तिमा॒भज॑न्ती  
 सु॒व॒र्धेहि॒ यज॑मानाय॒ पोष॑म॒श्विना॑ध्व॒र्यू सा॑दयतामिह॒ त्वा॑।  
 अ॒ग्नेः पु॒री॑षमसि दे॒व्यानी॑ तां त्वा॒ विश्वे॑ अ॒भि गृ॑णन्तु  
 दे॒वाः। स्तोम॑पृ॒ष्ठा घृ॒तव॑न्तीह सी॒द प्र॒जाव॑द॒स्मे द्र॒विणा॑  
 य॒जस्वा॑श्विना॑ध्व॒र्यू सा॑दयतामिह॒ त्वा॑। दि॒वो मूर्धा॑सि  
 पृ॒थि॒व्या नाभि॑र्वि॒ष्टम्भ॑नी दि॒शाम॑धि॒पत्नी॑ भु॒व॒नाना॑म्॥८॥

ऊ॒र्मिर्द्र॑प्सो अ॒पाम॑सि वि॒श्वक॑र्मा त॒ ऋषि॑र॒श्विना॑ध्व॒र्यू  
 सा॑दयतामिह॒ त्वा॑। स॒जूर॑ऋ॒तुभिः॑ स॒जूर्वि॑धाभिः  
 स॒जूर्व॑सुभिः स॒जू रु॒द्रैः स॒जूरा॑दित्यैः स॒जूर्वि॑श्वैर्दे॒वैः  
 स॒जूर्दे॒वैः स॒जूर्दे॒वैर्वयो॑ना॒धैर॒ग्रये॑ त्वा वै॒श्वान॒राया॑श्विना॑ध्व॒र्यू  
 सा॑दयतामिह॒ त्वा॑। प्रा॒णम्मे॑ पा॒ह्यपा॒नम्मे॑ पा॒हि व्या॒नम्मे॑ पा॒हि

चख्षुर्म उ॒र्व्या वि भा॑हि श्रोत्र॑म्मे श्लोक॑या॒पस्मिन्वौष॑धीर्जिन्व  
द्वि॒पात्पा॑हि चतु॑ष्पादव दि॒वो वृष्टि॑मेरय॥९॥

सुवीरं भुवनानामुर्व्या सप्तदश च॥४॥ [४]

अवि॑र्वयस्त्रि॒ष्टुच्छन्दो॑ दित्य॒वाङ्मयो॑ वि॒राट्छन्दः॑ पञ्चा॑विर्वयो  
गाय॒त्री छन्द॑स्त्रि॒वृत्सो॑ वयं उ॒ष्णिहा॑ छन्द॑स्तुर्य॒वाङ्मयो॑ऽ-  
नु॒ष्टुच्छन्दः॑ प॒ष्ठवा॑द्वयो बृ॒हती॑ छन्द॑ उ॒ख्या वयः॑ स॒तोबृ॑हती  
छन्द॑ ऋष॒भो वयः॑ क॒कुच्छ॑न्दो धेनु॒र्वयो॑ जग॑ती छन्दोऽ-  
नु॒ङ्गान् वयः॑ प॒ङ्क्तिश्छ॑न्दो ब॒स्तो वयो॑ वि॒वलं॑ छन्दो वृ॒ष्णिर्वयो॑  
वि॒शालं॑ छन्दः पुरु॑षो वय॑स्त॒न्द्रं छन्दो॑ व्या॒घ्रो वयो॑ऽ- नाधृष्टं  
छन्दः॑ सि॒ंहो वय॑श्छु॒दिश्छ॑न्दो विष्ट॒म्भो वयो॑ऽधि॑पति॒श्छन्दः॑  
ख्य॒त्रं वयो॑ मय॑दं छन्दो वि॒श्वकर्मा॑ वयः परमे॒ष्ठी छन्दो॑  
मूर्धा॑ वयः प्र॒जाप॑ति॒श्छन्दः॑॥१०॥

पुरुषो वयष्पङ्क्तिश्शतिश्च॥५॥ [५]

इन्द्रा॑ग्नी अव्य॑थमा॒नामिष्ट॑कां दृ॒ह॒तं यु॒वम् पृ॒ष्ठेन॑  
द्यावा॑पृथि॒वी अ॒न्तरि॑ख्यं च वि बा॑धताम्॥ वि॒श्वकर्मा॑ त्वा  
साद॑यत्व॒न्तरि॑ख्यस्य पृ॒ष्ठे व्य॑च॒स्वती॒मप्र॑थ॒स्वती॒म्भास्व॑ती॒  
सूरि॑मती॒मा या द्या॑म्भास्या पृथि॒वीमोर्व॑न्तरि॒ख्यम॑न्तरि॒ख्यं

यच्छान्तरिख्यं दृ९हान्तरिख्यम्मा हि९सीर्विश्वस्मै  
 प्राणायापानाय व्यानायोदानाय प्रतिष्ठायै चरित्राय  
 वायुस्त्वाभि पातु मह्या स्वस्त्या छुर्दिषा॥११॥

शंतमेन तया देवतयाङ्गिरस्वद्धुवा सीद। राज्यसि  
 प्राची दिग्विराडसि दखिणा दिक्सम्राडसि प्रतीची  
 दिक्स्वराडस्युदीची दिगधिपत्यसि बृहती दिगायुर्मे पाहि  
 प्राणम्मे पाह्यपानम्मे पाहि व्यानम्मे पाहि चख्युर्मे पाहि  
 श्रोत्रम्मे पाहि मनो मे जिन्व वाचम्मे पिन्वात्मानम्मे पाहि  
 ज्योतिर्मे यच्छ॥१२॥

छुर्दिषां पिन्व षट्॥६॥ [६]

मा छन्दः प्रमा छन्दः प्रतिमा छन्दोऽस्त्रीविश्छन्दः  
 पङ्क्तिश्छन्द उष्णिहा छन्दो बृहती छन्दोऽनुष्टुप्छन्दो  
 विराट्छन्दो गायत्री छन्दस्त्रिष्टुप्छन्दो जगती छन्दः पृथिवी  
 छन्दोऽन्तरिख्यं छन्दो द्यौश्छन्दः समाश्छन्दो नख्यत्राणि  
 छन्दो मनश्छन्दो वाक्छन्दः कृषिश्छन्दो हिरण्यं छन्दो  
 गौश्छन्दोऽजा छन्दोऽश्वश्छन्दः। अग्निर्देवता॥१३॥

वातो देवता सूर्यो देवता चन्द्रमा देवता वसवो देवता

रुद्रा देवतादित्या देवता विश्वे देवा देवता मरुतो देवता  
 बृहस्पतिर्देवतेन्द्रो देवता वरुणो देवता मूर्धासि राङ्गुवासि  
 धरुणा यत्र्यसि यमित्रीषे त्वोर्जे त्वा कृष्यै त्वा ख्येमाय  
 त्वा यन्त्री राङ्गुवासि धरणी धत्र्यसि धरित्र्यायुषे त्वा वर्चसे  
 त्वौजसे त्वा बलाय त्वा॥१४॥

देवताऽऽयुषे त्वा षट्॥७॥ [७]

आशुस्त्रिवृद्धान्तः पञ्चदशो व्योम सप्तदशः प्रतूर्तिरष्टादशस्तपो  
 नवदशोऽभिवर्तः सविंशो धरुणो एकविंशो वर्चो द्वाविंशः  
 सम्भरणस्त्रयोविंशो योनिश्चतुर्विंशो गर्भो पञ्चविंश  
 ओजस्त्रिणवः ऋतुरेकत्रिंशः प्रतिष्ठा त्रयस्त्रिंशो ब्रध्नस्य  
 विष्टपं चतुस्त्रिंशो नाकः षट्त्रिंशो विवर्तोऽष्टाचत्वारिंशो  
 धर्त्रश्चतुष्टोमः॥१५॥

आशुः सप्तत्रिंशत्॥८॥ [८]

अग्नेर्भागोऽसि दीर्घाया आधिपत्यम्ब्रह्म स्पृतं त्रिवृथस्तोम  
 इन्द्रस्य भागोऽसि विष्णोराधिपत्यं रक्षत्रं स्पृतम्पञ्चदशः  
 स्तोमो नृचर्यसाम्भागोऽसि धातुराधिपत्यं जनित्रं स्पृतं

सप्तदशः स्तोमो मित्रस्य भागोऽसि वरुणस्याधिपत्यं दिवो  
वृष्टिर्वाताः स्पृता एकविंशः स्तोमोऽदित्यै भागोऽसि पूष्ण  
आधिपत्यमोजः स्पृतं त्रिणवः स्तोमो वसूनाम्भागोऽसि ॥१६॥

रुद्राणामाधिपत्यं चतुष्पाथस्पृतं चतुर्विंशः स्तोमं  
आदित्यानां भागोऽसि मरुतामाधिपत्यं गर्भाः स्पृताः  
पञ्चविंशः स्तोमो देवस्य सवितुर्भागोऽसि बृहस्पतेराधिपत्यं  
समीचीर्दिशः स्पृताश्चतुष्टोमः स्तोमो यावानाम्भागो-  
ऽस्ययावानामाधिपत्यम्प्रजाः स्पृताश्चतुश्चत्वारिंशः स्तोमं  
ऋभूणाम्भागोऽसि विश्वेषां देवानामाधिपत्यम्भूतं निशान्तं  
स्पृतं त्रयस्त्रिंशः स्तोमः ॥१७॥

वसूनां भागोऽसि षट्त्वारिंशच्च ॥१॥ [१]

एकयास्तुवत प्रजा अधीयन्त प्रजापतिरधिपतिरासीत्तिसृभिः  
ब्रह्मासृज्यत ब्रह्मणस्पतिरधिपतिरासीत् पञ्चभिरस्तुवत  
भूतान्यसृज्यन्त भूतानाम्पतिरधिपतिरासीत्सप्तभिरस्तुवत  
सप्तर्षयोऽसृज्यन्त धाताधिपतिरा- सीन्नवभिरस्तुवत  
पितरोऽसृज्यन्तादितिरधिपत्यासीदेकादशभिरस्तुवतर्तवो-  
ऽसृज्यन्तार्तवोऽधिपतिरासीत् त्रयोदशभिरस्तुवत मासां

असृज्यन्त संवत्सरोऽधिपतिः॥१८॥

आसीत्पञ्चदशभिस्तुवत ख्यत्रमसृज्यतेन्द्रोऽधिपतिरासीत्स  
पशवोऽसृज्यन्त बृहस्पतिरधिपतिरासी- न्नवदशभिस्तुवत  
शूद्रार्यावसृज्येतामहोरात्रे अधिपती आस्तामेकविंशत्यास्तुवतै  
पशवोऽसृज्यन्त वरुणोऽधिपतिरासीन्नयोविंशत्यास्तुवत  
ख्युद्राः पशवोऽसृज्यन्त पूषाधिपतिरासीत्पञ्चविंशत्यास्तुवतार  
पशवोऽसृज्यन्त वायुरधिपतिरासीत्सप्तविंशत्यास्तुवत  
द्यावापृथिवी वि॥१९॥

ऐतां वसवो रुद्रा आदित्या अनु व्यायन्तेषामाधिपत्यमासीन्न  
वन्स्पतयोऽसृज्यन्त सोमोऽ- धिपतिरासीदेकत्रिंशतास्तुवत  
प्रजा असृज्यन्त यावानां चायावानां चाधिपत्यमासीन्नयस्त्रिंशत  
भूतान्यशाम्यन्प्रजापतिः परमेष्ठ्यधिपतिरासीत्॥२०॥

सं वत्सरोऽधिपतिर्वि पञ्चत्रिंशच्च॥१०॥ ————— [१०]

इयमेव सा या प्रथमा व्यौच्छदन्तरस्यां चरति प्रविष्टा।  
वधूर्जजान नवगङ्गनित्री त्रय एनाम्महिमानः सचन्ते॥  
छन्दस्वती उषसा पेपिशाने समानं योनिमनु संचरन्ती।  
सूर्यपत्नी वि चरतः प्रजानती केतुं कृण्वाने अजरे

भूरिरेतसा॥ ऋतस्य पन्थामनु तिस्र आगुस्त्रयो घर्मासो  
अनु ज्योतिषागुः। प्रजामेका ररखत्यूर्जमेका॥२१॥

व्रतमेका ररखति देवयूनाम्॥ चतुष्टोमो अभवद्या  
तुरीया यज्ञस्य पख्यावृषयो भवन्ती। गायत्रीं त्रिष्टुभं  
जगतीमनुष्टुभम्बृहदकं युञ्जानाः सुवराभरन्निदम्॥  
पञ्चभिर्धाता वि दधाविदं यत्तासां स्वसृरजनयत्पञ्चपञ्च।  
तासामु यन्ति प्रयवेण पञ्च नाना रूपाणि क्रतवो  
वसानाः॥ त्रिंशत्स्वसार उप यन्ति निष्कृतं समानं  
केतुम्प्रतिमुश्चमानाः॥२२॥

ऋतूस्तन्वते कवयः प्रजान्तीर्मध्येछन्दसः परि  
यन्ति भास्वतीः। ज्योतिष्मती प्रति मुञ्चते नभो रात्रीं  
देवी सूर्यस्य व्रतानि। वि पश्यन्ति पशवो जायमाना  
नानारूपा मातुरस्या उपस्थै। एकाष्टका तपसा तप्यमाना  
जजान गर्भम्महिमानमिन्द्रम्। तेन दस्यून्यसहन्त देवा  
हन्तासुराणामभवच्छचीभिः। अनानुजामनुजाम्मामकर्त  
सत्यं वदन्त्यन्विच्छ एतत्। भूयासम्॥२३॥

अस्य सुमतौ यथा यूयमन्या वो अन्यामति मा प्र युक्त।

अभून्मम सुमतौ विश्ववेदा आष्टं प्रतिष्ठामविदद्धि गाधम्।  
 भूयासमस्य सुमतौ यथा यूयमन्या वो अन्यामति मा प्र  
 युक्त। पञ्च व्युष्टीरनु पञ्च दोहा गाम्पञ्चनाम्नीमृतवोऽनु पञ्च।  
 पञ्च दिशः पञ्चदशेन क्लृप्ताः समानमूर्ध्नीरभि लोकमेकम्॥२४॥

ऋतस्य गर्भः प्रथमा व्युष्युपापामेका महिमानम्बिभर्ति।  
 सूर्यस्यैका चरति निष्कृतेषु घर्मस्यैका सवितैका नि  
 यच्छति। या प्रथमा व्यौच्छत्सा धेनुरभवद्यमे। सा नः  
 पयस्वती धुक्ष्वोत्तरामुत्तराः समाम्। शुक्रर्षभा नभसा  
 ज्योतिषागाद्विश्वरूपा शबलीरग्निकेतुः। समानमर्थः  
 स्वपस्यमाना बिभ्रती जरामजर उष आगाः। ऋतूनाम्पत्नी  
 प्रथमेयमागादह्ना नेत्री जनित्री प्रजानाम्। एका सती  
 बहुधोषो व्युच्छस्यजीर्णा त्वं जरयसि सर्वमन्यत्॥२५॥

ऊर्जमेका प्रतिमुञ्चमाना भूयासमेकं पत्येकान्नविंशतिश्च॥११॥ [११]

अग्रे जातान्प्र णुदा नः सपत्नान्प्रत्यजाताज्ञातवेदो नुदस्व।  
 अस्मे दीदिहि सुमना अहेडन्तव स्याः शर्मन्निवरूथ उद्वित्।  
 सहसा जातान्प्र णुदा नः सपत्नान्प्रत्यजाताज्ञातवेदो नुदस्व।  
 अधि नो ब्रूहि सुमनस्यमानो वयः स्याम प्र णुदा नः



स॒प॒त्नान्। च॒तु॒श्च॒त्वारि॒५शः॑ स्तोमो॒ वर्चो॑ द्रवि॒ण५ षोड॒शः॑  
स्तोम॒ ओजो॒ द्रवि॒णम्पृथि॒व्याः पु॒रो॒षम॑सि॥२६॥

अ॒प्सो॒ नाम॑। ए॒व॒श्छ॒न्दो॒ वरि॑व॒श्छ॒न्दः॑ श॒म्भू॒श्छ॒न्दः॑  
परि॒भू॒श्छ॒न्दः॑ आ॒च्छ॒च्छ॒न्दो॒ मन॒श्छ॒न्दो॒ व्य॒च॒श्छ॒न्दः॑  
सिन्धु॒श्छ॒न्दः॑ स॒मु॒द्रं छ॒न्दः॑ स॒लि॒लं छ॒न्दः॑ सं॒य॒च्छ॒न्दो॑  
वि॒य॒च्छ॒न्दो॑ बृ॒ह॒च्छ॒न्दो॑ रथं॒तरं॑ छ॒न्दो॑ नि॒का॒य॒श्छ॒न्दो॑  
वि॒व॒ध॒श्छ॒न्दो॑ गि॒र॒श्छ॒न्दो॑ भ्रज॒श्छ॒न्दः॑ स॒ष्टु॒च्छ॒न्दो॑ऽनु॒ष्टु॒च्छ॒न्दः॑  
क॒कु॒च्छ॒न्दस्त्रि॑क॒कु॒च्छ॒न्दः॑ का॒व्यं छ॒न्दो॑ऽङ्कु॒पं छ॒न्दः॑॥२७॥

प॒द॒प॒ङ्क्ति॑श्छ॒न्दो॒ऽर॒ख्य॑र॒प॒ङ्क्ति॑श्छ॒न्दो॑ वि॒ष्टा॒र॒प॒ङ्क्ति॑श्छ॒न्दः॑  
र॒ख्य॑रो भृ॒ज्वा॒ञ्छ॒न्दः॑ प्र॒च्छ॒च्छ॒न्दः॑ प॒र॒ख्य॑श्छ॒न्द ए॒व॒श्छ॒न्दो॑  
वरि॑व॒श्छ॒न्दो॑ व॒य॒श्छ॒न्दो॑ व॒य॒स्कृ॒च्छ॒न्दो॑ वि॒शा॒लं छ॒न्दो॑  
वि॒ष्प॒र्धा॒श्छ॒न्द॑श्छ॒दि॒श्छ॒न्दो॑ दू॒रो॒ह॒णं छ॒न्द॑स्त॒न्द्रं छ॒न्दो॑ऽङ्का॒ङ्कं  
छ॒न्दः॑॥२८॥

अ॒स्य॒ङ्कु॒प॒ञ्छ॒न्दस्त्रि॑यस्त्रि॒५श॑च॥१२॥ [१२]

अ॒ग्नि॒र्वृ॒त्राणि॑ ज॒ङ्घन॑द्रवि॒णस्यु॒र्वि॒प॒न्य॒या॑। स॒मि॒द्धः॑  
शु॒क्र आ॑हु॒तः॥ त्व५ सौ॒मा॒सि स॑त्प॒ति॒स्त्व५ रा॒जो॒त  
वृ॒त्र॒हा। त्व॒म्भ॒द्रो अ॑सि॒ क्रतुः॑॥ भ॒द्रा ते॑ अ॒ग्ने स्व॑नी॒क

स॒दृग्घो॒रस्य॑ स॒तो वि॒षुण॑स्य॒ चारुः॑ । न यत्ते॑ शो॒चिस्त॑मंसा॒  
वर॑न्त॒ न ध्व॒स्मान॑स्त॒नुवि॑ रेप॒ आ धुः॑ ॥ भ॒द्रं ते॑ अ॒ग्ने  
सह॑सि॒न्ननी॑कमुपा॒क आ रो॑चते॒ सूर्य॑स्य ॥ २९ ॥

रुश॑दृ॒शे द॑दृ॒शे न॑क्त॒या चि॒दरू॑खि॒तं दृ॒श आ रू॒पे अ॒न्नम् ।  
सैना॑नी॒केन॑ सुवि॒दत्रो॑ अ॒स्मे य॑ष्टा॑ दे॒वाः आ॑य॒जिष्ठः॑ स्व॒स्ति ।  
अद॑ब्धो गो॒पा उ॒त नः॑ पर॒स्पा अ॒ग्ने द्यु॑मदु॒त रे॒वद्दि॑दीहि ।  
स्व॒स्ति नो॑ दि॒वो अ॒ग्ने पृ॒थि॒व्या वि॒श्वायु॑र्धेहि॒ य॒जथा॑य दे॒व ।  
यथ्सी॒महि॑ दि॒विजा॑त॒ प्रश॑स्तं॒ तद॒स्मासु॑ द्रवि॑णं॒ धेहि॑ चि॒त्रम् ।  
यथा॑ होत॒र्मनु॑षः ॥ ३० ॥

दे॒वता॑ता॒ य॒ज्ञेभिः॑ सू॒नो सह॑सो॒ यजा॑सि । ए॒वानो॑ अ॒द्य  
संम॑ना॒ संमा॑नानु॒शन्न॑ग्र उ॒शतो॑ य॒खि दे॒वान् ॥ अ॒ग्निमी॑डे  
पु॒रोहि॑तं॒ य॒ज्ञस्य॑ दे॒वमृ॑त्विजम् । होता॑रः॒ रत्न॑धात॑मम् ॥  
वृषा॑ सोम॒ द्युमाः॑ अ॒सि वृषा॑ दे॒व वृष॑व्रतः । वृषा॒ धर्मा॑णि  
दधि॑षे ॥ सान्त॑पना इ॒दः ह॒विर्म॑रु॒तस्त॑ञ्जु॒ष्टन॑ । यु॒ष्माको॑ती  
रि॒शाद॑सः ॥ यो नो॒ मर्तो॑ वस॒वो दु॑र॒हणा॒युस्ति॑रः स॒त्यानि॑  
मरु॑तः ॥ ३१ ॥

जिघा॑ःसात् । द्रु॒हः पा॒शम्प॑ति॒ स मु॑चीष्ट॒ तपि॑ष्ठेन॒

तपसा हन्तना तम्। संवत्सरीणां मरुतः स्वर्का उरुख्ययाः  
 सगणा मानुषेषु। तैऽस्मत्पाशान्त्र मुञ्चन्त्वहंसः सांतपना  
 मंदिरा मादयिष्णवः। पिप्रीहि देवाः उशतो यविष्ठ विद्वाः  
 ऋतूः ऋतुपते यजेह। ये दैव्या ऋत्विजस्तेभिरग्रे त्वः  
 होतृणामस्यायजिष्ठः। अग्रे यदद्य विशो अध्वरस्य होतः  
 पावक॥ ३२॥

शोचे वेष्ट्वः हि यज्वा। ऋता यजासि महिना वि  
 यद्भूरहव्या वह यविष्ठ या ते अद्य। अग्निना रयिमश्रवत्पोषमेव  
 दिवेदिवे। यशसं वीरवत्तमम्॥ गयस्फानो अमीवहा  
 वंसुवित्पुष्टिर्वधनः। सुमित्रः सोम नो भव। गृहमेधासु आ  
 गत मरुतो मापं भूतन। प्रमुञ्चन्तो नो अहंसः। पूर्वीभिर्हि  
 दंदाशिम शरद्विर्मरुतो वयम्। महोभिः॥ ३३॥

चर्षणीनाम्। प्र बुध्निया ईरते वो महासि प्र  
 णामानि प्रयज्यवस्तिरध्वम्। सहस्रियं दम्यम्भागमेतं  
 गृहमेधीयम्मरुतो जुषध्वम्। उप यमेति युवतिः सुदख्यं  
 दोषा वस्तोर्हविष्मती घृताची। उप स्वैनमरमतिर्वसूयुः।  
 इमो अग्रे वीततमानि हव्याजस्रो वख्यि देवतातिमच्छं। प्रति

न ई५ सुरभीणि वियन्तु। क्रीडं वः शर्धो मारुतमनुर्वाण५  
रथेशुभम्॥३४॥

कण्वा अ॒भि प्र गा॑यत। अ॒त्यासो॑ न ये म॒रुतः॑ स्व॒श्चो  
य॒ख्वदृ॒शो न शु॒भय॑न्त॒ मर्याः॑। ते ह॑र्म्ये॒ष्ठाः शि॒शवो॑ न शु॒भ्रा  
व॒त्सासो॑ न प्र॑क्री॒डिनः॑ पयो॒धाः। प्रैषा॒मज्मै॑षु वि॒धुरे॑वं रेजते  
भूमि॒र्यामै॑षु यद्ध॑ यु॒ञ्जते॑ शु॒भे। ते क्री॒डयो॑ धुन॑यो॒ भ्राज॑दृष्टयः  
स्वय॑म्म॒ह्रित्व॑म्प॒नय॑न्त॒ धूत॑यः। उ॒प॒हृरे॑षु यदचि॑ध्वं य॒यिं वय॑  
इव मरुतः॑ केन॥३५॥

चि॒त्प॒था। श्रोत॑न्ति॒ कोशा॑ उ॒प॒ वो रथे॑ष्वा घृ॒तमु॑ख्यता  
मधु॑वर्णम॒र्चते॑। अ॒ग्निम॑ग्नि५ हवी॑मभिः सदा॑ हवन्त वि॒शप॑तिम्।  
ह॒व्यवा॑ह॒म्पुरु॑प्रियम्। त५ हि शश्व॑न्त॒ ईड॑ते सु॒चा दे॒वं  
घृ॒तश्रु॑ता॥ अ॒ग्नि५ ह॒व्याय॑ वोढ॑वे। इन्द्रा॑ग्नी रोच॒ना दि॒वः  
श्रथ॑द्व॒त्रमिन्द्र॑ वो वि॒श्वत॑स्परीन्द्रं नरो॒ विश्व॑कर्मन् ह॒विषा॑  
वावृ॑धानो विश्व॑कर्मन् ह॒विषा॑ वर्ध॑नेन॥३६॥

सूर्यस्य॒ मनु॑षो मरुतः॒ पाव॑क॒ महो॑भी रथेशुभं॒ केन॑ षट्त्वारि५शच्च॥१३॥—[१३]

र॒श्मिर॑सि॒ राज्य॑स्ययं पुरो॒ हरि॑केशोऽग्नि॒र्धेन्द्रा॑ग्निभ्यां बृह॒स्पति॑र्भूयस्कृद॑स्यग्निनां  
विश्वा॑षाद्व॒जाप॑तिर्मन॑सा कृ॒त्तिका॑ मधु॒श्च स॒मिद्दि॑शान्द्राद॑श॥१२॥ र॒श्मिर॑सि॒ प्रति॑ धे॒नुम॑सि

स्तनयि॑नु॒स॒नि॒र॒स्यादि॒त्यानां॑ स॒प्त॒त्रिं॑शत्॥३७॥ र॒श्मि॒र॒सि॒ को अ॒द्य यु॒क्ते॑॥—[१४]

॥चतुर्थः प्रश्नः॥

॥तैत्तिरीयसंहितायां चतुर्थकाण्डे चतुर्थः प्रश्नः॥

र॒श्मि॒र॒सि॒ र॒ख्य॑या॒य त्वा॒ र॒ख्यं॑ जि॒न्व॒ प्रेति॑र॒सि॒  
ध॒र्मा॑य॒ त्वा॒ ध॒र्मं॑ जि॒न्वा॒न्वि॑ति॒र॒सि॒ दि॒वे त्वा॒ दि॒वं॑ जि॒न्व॒  
स॒न्धि॑र॒स्य॒न्त॒रि॑र॒ख्य॑या॒ त्वा॒न्त॒रि॑र॒ख्यं॑ जि॒न्व॒ प्र॒ति॒धि॑र॒सि॒  
पृ॒थि॒व्यै॑ त्वां पृ॒थि॒वीं॑ जि॒न्व॒ वि॒ष्ट॒म्भो॑ऽसि॒ वृ॒ष्ट्यै॑ त्वा॒ वृ॒ष्टिं॑  
जि॒न्व॒ प्र॒वा॒स्य॒हे त्वा॒ह॑र्जि॒न्वा॒नु॒वा॒सि॒ रा॒त्रि॒यै॑ त्वा॒ रा॒त्रिं॑  
जि॒न्वो॒शि॒ग॑सि॒॥१॥

व॒सु॑भ्य॒स्त्वा॒ व॒सू॑ञ्जि॒न्व॒ प्र॒के॒तो॑ऽसि॒ रु॒द्रे॒भ्य॑स्त्वा  
रु॒द्रा॑ञ्जि॒न्व॒ सु॒दी॒ति॒र॒स्यादि॒त्ये॒भ्य॑स्त्वाऽऽदि॒त्या॑ञ्जि॒न्वो॒जो॑-  
ऽसि॒ पि॒तृ॑भ्य॒स्त्वा॒ पि॒तृ॑ञ्जि॒न्व॒ त॒न्तु॑र॒सि॒ प्र॒जा॑भ्य॒स्त्वा  
प्र॒जा॒ जि॒न्व॒ पृ॒त॒ना॒षा॒ड॑सि॒ प॒शु॑भ्य॒स्त्वा॒ प॒शू॑ञ्जि॒न्व॒  
रे॒व॒द॒स्योष॑धी॒भ्य॑स्त्वौष॑धीर्जि॒न्वा॒भि॒जि॒द॑सि॒ यु॒क्त॒ग्रा॒वेन्द्रा॑य॒  
त्वेन्द्रं॑ जि॒न्वा॒धि॑प॒ति॒र॒सि॒ प्रा॒णाय॑॥२॥

त्वा॒ प्रा॒णं॑ जि॒न्व॒ य॒न्ता॒स्य॑पा॒नाय॑ त्वा॒पा॒नं॑ जि॒न्व॒ स॒र्प॑-

ऽसि चख्षुषे त्वा चख्षुर्जिन्व वयोधा अंसि श्रोत्राय त्वा श्रोत्रं  
जिन्व त्रिवृदसि प्रवृदसि संवृदसि विवृदसि स०रोहोऽसि  
नीरोहोऽसि प्ररोहोऽस्यनुरोहोऽसि वसुकोऽसि वेषश्चिरसि  
वस्यष्टिरसि ॥ ३ ॥

उशिर्गंसि प्राणाय त्रिचत्वारि०शच्च ॥ १ ॥ \_\_\_\_\_ [१]

राज्यंसि प्राची दिग्वसंवस्ते देवा अधिपतयो-  
ऽग्निर्हेतीनाम्प्रतिधर्ता त्रिवृत्त्वा स्तोमः पृथिव्या०  
श्रयत्वाज्यमुक्थ- मव्यथयथस्तभ्रातु रथंतुर० साम्  
प्रतिष्ठित्यै विराडसि दख्खिणा दिगृद्रास्ते देवा अधिपतय  
इन्द्रो हेतीनाम्प्रतिधर्ता पञ्चदशस्त्वा स्तोमः पृथिव्या० श्रयतु  
प्रउंगमुक्थमव्यथयथस्तभ्रातु बृहत्साम् प्रतिष्ठित्यै सम्राडसि  
प्रतीची दिक् ॥ ४ ॥

आदित्यास्ते देवा अधिपतयः सोमो हेतीनाम्प्रतिधर्ता  
सप्तदशस्त्वा स्तोमः पृथिव्या० श्रयतु मरुत्वतीयमुक्थ-  
मव्यथयथस्तभ्रातु वैरूप० साम् प्रतिष्ठित्यै स्वराडस्युदीची  
दिग्विधे ते देवा अधिपतयो वरुणो हेतीनाम्प्रतिधर्तैक-  
वि०शस्त्वा स्तोमः पृथिव्या० श्रयतु निष्कैवल्यमुक्थमव्यथयथ

वैराजः साम् प्रतिष्ठित्या अधिपत्यसि बृहती दिङ्मरुतस्ते  
देवा अधिपतयः॥५॥

बृहस्पतिरहेतीनाम्प्रतिधर्ता त्रिणवत्रयस्त्रिंशौ त्वा  
स्तोमौ पृथिव्याः श्रयतां वैश्वदेवाग्निमारुते उक्थे  
अव्यथयन्ती स्तभ्रीताः शाक्ररैवते सामनी प्रतिष्ठित्या  
अन्तरिक्षायर्षयस्त्वा प्रथमजा देवेषु दिवो मात्रया वरिणा  
प्रथन्तु विधर्ता चायमधिपतिश्च ते त्वा सर्वे संविदाना  
नाकस्य पृष्ठे सुवर्गे लोके यजमानं च सादयन्तु॥६॥

प्रतीची दिङ्मरुतस्ते देवा अधिपतयश्चत्वारिंशच्च॥२॥ [२]

अयम्पुरो हरिकेशः सूर्यरश्मिस्तस्य रथगृथ्सश्च रथौजाश्च  
सेनानिग्रामण्यौ पुञ्जिकस्थला च कृतस्थला चाप्सरसौ  
यातुधाना हेती रख्यांसि प्रहेतिरयं दखिणा विश्वकर्मा  
तस्य रथस्वनश्च रथेचित्रश्च सेनानिग्रामण्यौ मेनका च  
सहजन्या चाप्सरसौ दङ्गवः पशवो हेतिः पौरुषेयो  
वधः प्रहेतिरयम्पश्चाद्विश्वव्यचास्तस्य रथप्रोतश्चासमरथश्च  
सेनानिग्रामण्यौ प्रम्लोचन्ती च॥७॥

अनुम्लोचन्ती चाप्सरसौ सर्पा हेतिर्व्याघ्राः प्रहेतिरयमुत्तराथ्सं

सेन॒जिच्च॑ सु॒षेण॑श्च सेनानिग्राम॒ण्यौ वि॒श्वाची॑ च घृ॒ताची॑  
 चाप्स॒रसा॒वापो॑ हे॒तिर्वा॒तः प्रहे॑तिरयमु॒पर्य॑र्वा॒ग्वसु॑स्तस्य  
 ताक्ष्य॑श्चारि॒ष्टनेमि॑श्च सेनानिग्राम॒ण्या- वुर्वशी॑ च  
 पूर्व॑चित्तिश्चाप्स॒रसौ वि॒द्युद्धे॒तिर॑व॒स्फूर्ज॑न्प्रहे॑तिस्तेभ्यो  
 नम॒स्ते नो॑ मृडयन्तु ते यम्॥८॥

द्वि॒ष्मो यश्च॑ नो॒ द्वेष्टि॒ तं वो॒ जम्भे॑ दधाम्या॒योस्त्वा॒  
 स॒दने॑ सादया॒म्यव॑तश्छायायां नमः॑ समु॒द्राय॑ नमः॑ समु॒द्रस्य॑  
 च॒र॒ष्से परमे॒ष्ठी त्वा॑ सादयतु दि॒वः पृ॒ष्ठे व्यच॑स्वतीम्प्रथ॑स्वतीं  
 वि॒भूम॑तीम्प्रभूम॑तीम्परिभूम॑तीं दि॒वं यच्छु॑ दि॒वं दृ॒ह दि॒वम्मा  
 हि॒ंसी॒र्वि॒श्वस्मै॑ प्रा॒णाय॑पा॒नाय॑ व्या॒नायो॑दा॒नाय॑ प्रति॒ष्ठायै॑  
 च॒रि॒त्राय॑ सूर्य॑स्त्वा॒भि पा॑तु म॒ह्या स्व॒स्त्या छु॑र्दिषा श॑तमेन  
 तया॑ दे॒वत॑याङ्गि॒रस्व॑द्धु॒वा सी॑द। प्रोथ॑दश्चो॒ न यव॑से अवि॒ष्यन्  
 य॒दा म॒हः सं॒वर॑णा॒द्व्यस्था॑त्। आद॑स्य॒ वातो॒ अनु॑ वाति  
 शो॒चिर॑धं स्म ते॒ ब्रज॑नं कृ॒ष्णम॑स्ति॥९॥

प्रमोच॑न्ती च॒ य॒ स्व॒स्त्याष्टा॑विंशतिश्च॥३॥ [३]

अ॒ग्नि॒र्मूर्धा॑ दि॒वः क॒कुत्प॑तिः पृथि॒व्या अ॒यम्। अ॒पा॒ं  
 रेता॑ं॒सि जि॒न्वति॑॥ त्वाम॑ग्रे पुष्क॑रा॒दध्य॑थ॒र्वा निर॑मन्थत।



मूर्ध्नो विश्वस्य वाघतः॥ अयमग्निः संहस्त्रिणो वाजस्य  
 शतिनस्पतिः। मूर्धा कवी रयीणाम्॥ भुवो यज्ञस्य रजसश्च  
 नेता यत्रा नियुद्धिः सचसे शिवाभिः। दिवि मूर्धानं दधिषे  
 सुवर्षां जिह्वामग्ने चकृषे हव्यवाहम्॥ अबोध्यग्निः समिधा  
 जनानाम्॥१०॥

प्रति धेनुमिवायतीमुषासम्। यद्वा इव प्र वयामुज्जिहानाः  
 प्र भानवः सिस्रते नाकमच्छ। अवोचाम कवये मेध्याय वचो  
 वन्दारु वृषभाय वृष्णो। गविष्ठिरो नमसा स्तोममग्नौ दिवीव  
 रुक्ममुर्व्यञ्चमश्रेत्। जनस्य गोपा अजनिष्ट जागृविरग्निः  
 सुदर्व्यः सुविताय नव्यसे। घृतप्रतीको बृहता दिविस्पृशा  
 द्युमद्वि भाति भरतेभ्यः शुचिः। त्वामग्ने अङ्गिरसः॥११॥

गुहा हितमन्वविन्दञ्छिःश्रियाणं वनेवने। स जायसे  
 मथ्यमानः सहो महत्त्वामाहुः सहसस्पुत्रमङ्गिरः। यज्ञस्य  
 केतुम्प्रथमम्पुरोहितमग्निं नरस्त्रिषधस्थे समिन्धते। इन्द्रेण  
 देवैः सरथः स बर्हिषि सीदन्नि होता यजथाय सुक्रतुः। त्वं  
 चित्रश्रवस्तम हवन्ते विर्व्यु जन्तवः। शोचिष्केशम्पुरुप्रियाग्ने  
 हव्याय वोढवे। सखायः सं वः सम्यञ्चमिषम्॥१२॥

स्तोमं चाग्रये॑। वर्षिष्ठाय॑ खितीनामूर्जो नत्रे सहस्वते।  
 स॑ समिध्वसे॑ वृषन्नग्रे॑ विश्वान्यर्य॑ आ। इडस्पदे॑ समिध्यसे॑  
 स नो वसू॑न्या भ॑र। ए॒ना वो अ॒ग्निं नम॑सोर्जो नपा॑त॒मा  
 हु॒वे। प्रि॒यं चेति॑ष्ठम॒रुतिः॑ स्व॒ध्वरं॑ वि॒श्वस्य॑ दू॒तम॒मृतम्। स  
 यो॑जते अरु॒षो वि॒श्वभो॑जसा॒ स दु॑द्रव॒त्स्वाहु॑तः। सु॒ब्रह्मा॑ य॒ज्ञः  
 सु॒शर्मा॑॥१३॥

वसू॑नां दे॒वः रा॒धो जना॑नाम्। उ॒दस्य॑ शो॒चिर॑स्थादा॒जुह्वा॑नस्य  
 मी॒दुषः॑। उ॒द्धूमा॑सो अरु॒षासो॑ दि॒विस्पृ॑शः॒ सम॒ग्निमि॑न्धते  
 नरः॑। अ॒ग्रे वा॒जस्य॑ गोम॑त॒ ईशा॑नः सहसो य॒हो। अ॒स्मे  
 धे॑हि जा॒तवे॒दो म॒हि श्रवः॑। स इ॒धानो॑ वसु॑ष्क॒विर॒ग्निरी॒डेन्यो॑  
 गि॒रा। रे॒वद॒स्मभ्य॑म्पु॒र्वणी॑क दी॒दिहि॑। ख॒षपो॑ रा॒जन्नु॑त त्मना॒ग्रे  
 वस्तो॑रु॒तोष॑सः। स ति॑ग्मज॒म्भ॥१४॥

र॒ख्सो द॒ह॒ प्रति॑। आ ते॑ अ॒ग्न इ॒धीम॒हि द्यु॒मन्तं॑ दे॒वा॒जर॑म्।  
 यद्ध॒ स्या ते॒ पनी॑यसी॒ समि॒द्दी॒दय॑ति॒ द्यवी॑षः॒ स्तो॒तृभ्य॑  
 आ भ॑र। आ ते॑ अ॒ग्न ऋ॒चा ह॒विः शु॒क्रस्य॑ ज्योतिषस्पते।  
 सु॒श्व॒न्द्र द॒स्म वि॒श्वं ते॒ हव्य॑वा॒द्भ्यः॑ हू॒यत॒ इषः॑ स्तो॒तृभ्य॑  
 आ भ॑र। उ॒भे सु॑श्व॒न्द्र स॒र्पिषो॒ दर्वी॑ श्रीणीष आ॒सनि॑। उ॒तो

न उत्पुण्याः॥१५॥

उक्थेषु शवसस्पत इषः स्तोतृभ्य आ भर। अग्ने तमद्याश्वं  
न स्तोमैः क्रतुं न भद्रं हृदिस्पृशम्। ऋध्यामा त ओहैः।  
अधा ह्यग्ने क्रतोर्भद्रस्य दख्यस्य साधोः। रथीरऋतस्य बृहतो  
बभूथ। आभिष्टे अद्य गीर्भिर्गुणन्तोऽग्ने दाशेम। प्र ते दिवो  
न स्तनयन्ति शुष्माः। एभिर्नो अर्केर्भवा नो अर्वाङ्॥१६॥

सुवर्न ज्योतिः। अग्ने विश्वेभिः सुमना अनीकैः। अग्निं  
होतारम्मन्ये दास्वन्तं वसोः सूनुं सहसो जातवेदसम्। विप्रं  
न जातवेदसम्। य ऊर्ध्वया स्वध्वरो देवो देवाच्या कृपा।  
घृतस्य विभ्राष्टिमनु शुक्रशोचिष आजुह्वानस्य सर्पिषः। अग्ने  
त्वन्नो अन्तमः। उत त्राता शिवो भव वरूथ्यः। तं त्वा शोचिष्ठ  
दीदिवः। सुम्राय नूनमीमहे सखिभ्यः। वसुरग्निर्वसुश्रवाः।  
अच्छा नखिष द्युमत्तमो रयिं दाः॥१७॥

जनानामङ्गिरस इषं सुशमीं तिग्मजम्भ पुण्या अर्वाङ्गसुश्रवाः पञ्च च॥४॥—[४]

इन्द्राग्निभ्यां त्वा सयुजा युजा युनज्म्याघाराभ्यां  
तेजसा वर्चसोक्थेभिः स्तोमैर्भिश्छन्दोभी रय्यै पोषाय  
सजातानाम्मध्यमस्थेयाय मया त्वा सयुजा युजा

युनज्म्यम्बा दुला नितुलिभ्रयन्ती मेघयन्ती वृषयन्ती  
 चुपुणीका नामासि प्रजापतिना त्वा विश्वाभिर्धीभिरुप दधामि  
 पृथिव्युदपुरमन्त्रेन विष्टा मनुष्यास्ते गोप्तारोऽग्निर्वियत्तोऽस्यां  
 तामहम्प्र पद्ये सा॥१८॥

मे शर्म च वर्म चास्त्वधिद्यौरन्तरिखम्ब्रह्मणा विष्टा  
 मरुतस्ते गोप्तारो वायुर्वियत्तोऽस्यां तामहम्प्र पद्ये सा मे  
 शर्म च वर्म चास्तु द्यौरपराजितामृतेन विष्टादित्यास्ते  
 गोप्तारः सूर्यो वियत्तोऽस्यां तामहम्प्र पद्ये सा मे शर्म च  
 वर्म चास्तु॥१९॥

साऽष्टाचत्वारिंशच्च॥५॥

[५]

बृहस्पतिस्त्वा सादयतु पृथिव्याः पृष्ठे ज्योतिष्मतीं  
 विश्वस्मै प्राणायानाय विश्वं ज्योतिर्यच्छाग्निस्तेऽधिपतिर्-  
 विश्वकर्मा त्वा सादयत्वन्तरिखस्य पृष्ठे ज्योतिष्मतीं  
 विश्वस्मै प्राणायानाय विश्वं ज्योतिर्यच्छ वायुस्तेऽधिपतिः  
 प्रजापतिस्त्वा सादयतु दिवः पृष्ठे ज्योतिष्मतीं विश्वस्मै  
 प्राणायानाय विश्वं ज्योतिर्यच्छ परमेष्ठी तेऽधिपतिः  
 पुरोवातसनिरस्यभ्रसनिरसि विद्युथ्सनिः॥२०॥

अ॒सि स्त॒नयि॒तुस॒निर॑सि वृ॒ष्टि॒स॒निर॑स्य॒ग्रेर्या॑न्यसि  
 दे॒वाना॑म॒ग्रेया॑न्यसि वा॒यो॒र्या॑न्यसि दे॒वाना॑ वा॒यो॒या॑न्यस्य॒न्तरि॑र॒ख्य  
 या॑न्यसि दे॒वाना॑म॒न्तरि॑र॒ख्यया॑न्यस्य॒न्तरि॑र॒ख्यम॑स्य॒न्तरि॑र॒ख्याय॑  
 त्वा स॒लिला॑य त्वा स॒र्णीका॑य त्वा स॒तीका॑य त्वा के॒ताय॑  
 त्वा प्र॒चेत॑से त्वा वि॒वस्व॑ते त्वा दि॒वस्त्वा ज्योति॑ष  
 आदि॒त्येभ्य॑स्त्व॒र्चे त्वा रु॒चे त्वा द्यु॒ते त्वा भा॒से त्वा ज्योति॑षे  
 त्वा यशो॑दां त्वा यश॑सि तेजो॑दां त्वा तेज॑सि प॒यो॒दां त्वा  
 प॒यसि॑ व॒र्चो॒दां त्वा व॒र्चसि॑ द्रवि॒णो॒दां त्वा द्रवि॑णे सा॒दयामि॑  
 तेन॑र्षि॒णा तेन॑ ब्रह्म॑णा त॒या दे॒वत॑याङ्गि॒रस्व॑द्भु॒वा सी॑द॥ २१॥

विद्यु॒त्सनि॑र्द्यु॒त्वैका॒न्नत्रि॒॑शच्च॑॥ ६॥ [६]

भू॒य॒स्कृ॑द॒सि वरि॑व॒स्कृ॑द॒सि प्रा॒च्य॑स्य॒ध्वा॒स्य॑न्तरि॒र॒ख्यस॑द॒स्य॒न्त  
 सी॒दाप्सु॑ष॒द॒सि श्ये॑न॒स॒द॒सि गृ॒ध्र॒स॒द॒सि सु॒पर्ण॑स॒द॒सि  
 ना॒क॒स॒द॒सि पृ॒थि॒व्या॒स्त्वा द्रवि॑णे सा॒दया॑म्य॒न्तरि॑र॒ख्यस्य॑ त्वा  
 द्रवि॑णे सा॒दया॑मि दि॒वस्त्वा द्रवि॑णे सा॒दया॑मि दि॒शां त्वा  
 द्रवि॑णे सा॒दया॑मि द्रवि॒णो॒दां त्वा द्रवि॑णे सा॒दया॑मि प्रा॒ण॒म्मे  
 पा॒ह्यपा॒न॒म्मे पा॒हि व्या॒न॒म्मे॥ २२॥

पा॒ह्यायु॑र्मे पा॒हि वि॒श्वायु॑र्मे पा॒हि स॒र्वायु॑र्मे पा॒ह्य॒ग्ने य॒त्ते

पर॒५ ह॒न्नाम॒ तावेहि॒ स॒५ र॑भाव॒है पा॒ञ्चज॒न्येष्व॒प्यै॒ध्यग्रे॒ यावा॒  
अया॑वा॒ एवा॒ ऊमाः॒ स॒ब्दः स॒गरः सु॒मेकः॥ २३ ॥

व्यान॒म्ये द्वात्रिं॑शच्च॥ ७ ॥ [७]

अ॒ग्निना॑ वि॒श्वाषा॒ट्थसूर्ये॑ण स्व॒राट्क॒त्वा श॒चीप॒तिर्ऋ॒षभे॑ण  
त्व॒ष्टा य॒ज्ञेन॑ म॒घवा॒न्दखि॑णया सु॒वर्गो म॒न्युना॑ वृ॒त्रहा  
सौहा॑र्द्येन तनू॒धा अ॒त्रेन॒ गयः॑ पृथि॒व्यास॑नोदृ॒ग्भिर॑न्ना॒दो  
व॑ष॒ट्कारे॑ण॒र्द्धः साम्ना॑ तनू॒पा वि॒राजा॒ ज्योति॑ष्मान् ब्रह्म॑णा  
सोम॒पा गोभि॑र्य॒ज्ञं दा॑धार ख॒षत्रे॑ण मनु॒ष्यान् श्वे॑न च रथे॑न  
च व॒ज्र॒तुभिः॑ प्र॒भुः संव॑त्स॒रेण॑ परि॒भूस्त॑प॒साना॑धृष्टः सूर्यः  
सन्त॒नूभिः॑ ॥ २४ ॥

अ॒ग्निनै॒कान्न॑पञ्चा॒शत् ॥ ८ ॥ [८]

प्र॒जाप॑ति॒र्मन॒सान्धोऽच्छे॑तो धा॒ता दी॒क्षाया॑ १  
सवि॒ता भृ॒त्याम्पू॒षा सोम॑क्रय॒ण्यां वरु॑ण उप॒न॒द्धोऽसु॑रः  
क्री॒यमा॑णो मि॒त्रः क्री॑तः शि॒पिवि॑ष्ट आसा॑दितो न॒रंघि॑षः  
प्रो॒ह्यमा॑णोऽधि॒पति॑रा॒गतः प्र॒जाप॑तिः प्र॒णीय॑मानोऽग्निरा॒ग्नीध्रे॑  
बृ॒हस्प॑तिरा॒ग्नीधा॑त्प्र॒णीय॑मान् इन्द्रो॑ हवि॒र्धानि॑ऽदि॒तिरा॑सा॒दितो॑  
विष्णु॑रुपाव॒हिय॑माणोऽथ॒र्वोपो॑त्तो य॒मोऽभि॑षु॒तोऽपू॑त॒पा

आधूयमानो वायुः पूयमानो मित्रः रवीरश्रीर्मन्थी  
 संकुश्रीवैश्वदेव उन्नीतो रुद्र आहुतो वायुरावृत्तो नृचख्याः  
 प्रतिख्यातो भर्ख्य आगतः पितृणां नाराशंसोऽसुरात्तः  
 सिन्धुरवभृथमवप्रयन्थसमुद्रोऽवगतः सलिलः प्रप्लुतः  
 सुवरुद्वचं गतः॥२५॥

रुद्र एकविंशतिश्च॥८॥ [९]

कृत्तिका नख्यत्रमग्निर्देवताग्ने रुचः स्थ प्रजापतेर्धातुः  
 सोमस्यर्चे त्वा रुचे त्वा द्युते त्वा भासे त्वा ज्योतिषे त्वा  
 रोहिणी नख्यत्रम्प्रजापतिर्देवता मृगशीर्षं नख्यत्रं सोमो  
 देवतार्द्रा नख्यत्रं रुद्रो देवता पुनर्वसू नख्यत्रमदिति-  
 देवता तिष्यो नख्यत्रम्बृहस्पतिर्देवताश्रेषा नख्यत्रं सर्पा  
 देवता मघा नख्यत्रम्पितरो देवता फल्गुनी नख्यत्रम्॥२६॥

अर्यमा देवता फल्गुनी नख्यत्रम्भगो देवता हस्तो  
 नख्यत्रं सविता देवता चित्रा नख्यत्रमिन्द्रो देवता स्वाती  
 नख्यत्रं वायुर्देवता विशाखे नख्यत्रमिन्द्राग्नी देवताऽनूराधा  
 नख्यत्रम्मित्रो देवता रोहिणी नख्यत्रमिन्द्रो देवता विचृतौ  
 नख्यत्रम्पितरो देवताषाढा नख्यत्रमापो देवताषाढा नख्यत्रं

विश्वे देवा देवतां श्रोणा नख्यत्रं विष्णुर्देवता श्रविष्ठा नख्यत्रं  
वसवः॥२७॥

देवतां शतभिषङ्गख्यत्रमिन्द्रो देवतां प्रोष्ठपदा  
नख्यत्रमज एकपादेवतां प्रोष्ठपदा नख्यत्रमहिर्बुध्नियो  
देवतां रेवती नख्यत्रम्पूषा देवतां श्वयुजौ नख्यत्रमश्विनौ  
देवतां पभरणी नख्यत्रं यमो देवतां पूर्णा पश्चाद्यत्ते देवा  
अदधुः॥२८॥

फलुनी नख्यत्रं वसवस्त्रयस्त्रिंशच्च॥१०॥

मधुश्च माधवश्च वासन्तिकावृतू शुक्रश्च शुचिश्च ग्रैष्मावृतू  
नभश्च नभस्यश्च वार्षिकावृतू इषश्चोर्जश्च शारदावृतू  
सहश्च सहस्यश्च हैमन्तिकावृतू तपश्च तपस्यश्च शैशिरावृतू  
अग्नेरन्तःश्लेषोऽसि कल्पेतां द्यावापृथिवी कल्पन्तामाप  
ओषधीः कल्पन्तामग्नयः पृथङ्म ज्यैष्ठ्याय सव्रताः॥२९॥

येऽग्नयः समनसोऽन्तरा द्यावापृथिवी शैशिरावृतू अभि  
कल्पमाना इन्द्रमिव देवा अभि सं विशन्तु संयच्च प्रचेताश्चाग्नेः  
सोमस्य सूर्यस्योग्रा च भीमा च पितृणां यमस्येन्द्रस्य ध्रुवा  
च पृथिवी च देवस्य सवितुर्मरुतां वरुणस्य धर्त्री च धरित्री



च मि॒त्रावरु॑णयोर्मि॒त्रस्य॑ धा॒तुः प्राचीं॑ च प्र॒तीचीं॑ च॒ वसू॑नां  
रु॒द्राणा॑म्॥ ३० ॥

आ॒दि॒त्याना॒न्ते तेऽधि॑पतय॒स्तेभ्यो॑ नम॒स्ते नो॑ मृडयन्तु ते  
यं द्वि॒ष्मो यश्च॑ नो॒ द्वेष्टि॑ तं वो ज॒म्भे द॑धामि स॒हस्र॑स्य  
प्र॒मा अ॑सि स॒हस्र॑स्य प्र॒तिमा॑ अ॒सि स॒हस्र॑स्य वि॒मा अ॑सि  
स॒हस्र॑स्यो॒न्मा अ॑सि सा॒हस्रो॑ऽसि स॒हस्रा॑य त्वे॒मा मे॑ अग्र॒  
इष्ट॑का धे॒नवः॑ स॒न्त्वेका॑ च श॒तं च॑ स॒हस्रं॑ चा॒युतं॑ च॥ ३१ ॥

नि॒युतं॑ च प्र॒युतं॑ चा॒र्बुदं॑ च॒ न्य॒र्बुदं॑ च॒ समु॑द्रश्च॒ मध्यं॑  
चा॒न्तश्च॑ परा॒र्धश्चे॒मा मे॑ अग्र॒ इष्ट॑का धे॒नवः॑ स॒न्तु ष॑ष्टिः  
स॒हस्र॑म॒युत॑म॒ख्यीय॑माणा ऋत॒स्थाः स्थ॑र्ता॒वृधो॑ घृ॒तश्चुतो॑  
मधु॑श्चु॒त ऊ॑र्ज॒स्वतीः॑ स्वधा॒विनी॒स्ता मे॑ अग्र॒ इष्ट॑का धे॒नवः॑  
स॒न्तु वि॒राजो॑ नाम॑ का॒मदु॒घा अ॒मुत्रा॒मुष्मि॑ल्लो॒के॥ ३२ ॥

स॒व्रता॑ रु॒द्राणा॑म॒युतं॑श्च॒ पञ्च॑च॒त्वारि॑ंशच्च॥ ११ ॥ ————— [११]

स॒मि॒द्दि॒शामा॑शया॑ नः सुव॒र्विन्म॑धो॒रतो॑ मा॒धवः॑ पा॒त्वस्मा॑न्।  
अ॒ग्नि॒र्दे॒वो दु॒ष्टरी॑तु॒रदा॑भ्य इ॒दं ख॒षत्रं॑ र॒ख्यतु॑ पा॒त्वस्मा॑न्।  
र॒थं॒तरं॑ सा॒मभिः॑ पा॒त्वस्मा॑न्गा॒यत्री॑ छ॒न्दसां॑ वि॒श्वरू॑पा।  
त्रि॒वृत्रो॑ वि॒ष्टया॑ स्तोमो॒ अह्ना॑ं स॒मुद्रो॑ वा॒त इ॒दमो॑जः पि॒पर्तु॑।

उ॒ग्रा दि॒शाम॒भिभू॑तिर्वयो॒धाः शुचिः॑ शु॒क्रे अह॑न्योज॒सीना॑।  
इन्द्राधि॑पतिः पिपृ॒ताद॒तो नो॒ महि॑॥ ३३॥

ख॒षत्रं वि॒श्वतो॑ धा॒रये॒दम्। बृ॒हत्सामं॑ ख॒षत्र॒भृद्बृ॑द्धवृ॒ष्णियं॑  
त्रि॒ष्टुभौजः॑ शु॒भित॒मुग्र॑वीरम्। इन्द्र॒ स्तोमे॑न पञ्चद॒शेन॒ मध्य॑मि॒दं  
वाते॑न॒ सग॑रेण र॒ख्य। प्राचीं॑ दि॒शाः सह॑य॒शा यश॑स्वती॒  
विश्वे॑ दे॒वाः प्रा॒वृषा॒ह्वा सु॑व॒र्वती॑। इ॒दं ख॒षत्रं॑ दुष्ट॒रम॒स्त्वोजो॑-  
ऽना॑धृष्टः सह॒स्त्रियः॑ सह॒स्वत्। वैरू॒पे साम॑न्नि॒ह तच्छ॑के॒म  
जग॑त्यैनं वि॒क्ष्वा वैश॑यामः। विश्वे॑ दे॒वाः सप्त॑द॒शेन॑॥ ३४॥

वर्च॑ इ॒दं ख॒षत्रं॑ स॒लिल॑वा॒तमु॒ग्रम्। ध॒र्त्री दि॒शां  
ख॒षत्र॑मि॒दं दा॑धारोप॒स्थाशा॑ना॒मित्र॑व॒दस्त्वो॑जः। मि॒त्रावरु॑णा  
श॒रदा॒ह्वा चि॒कित्वा॑ अ॒स्मै रा॒ष्ट्राय॑ महि॒ शर्म॑ यच्छ॒तम्।  
वैरा॒जे साम॑न्नधि॒ मे मनी॑षानुष्टु॒भा सम्भृ॑तं वी॒र्यं॑ सहः।  
इ॒दं ख॒षत्र॑मि॒त्रव॑दा॒र्द्रदा॑नु मि॒त्रावरु॑णा र॒ख्यत॑माधि॒पत्यैः॑।  
स॒म्राड्दि॒शाः सह॑सा॒ग्नी सह॑स्वत्यु॒तुरहे॑म॒न्तो वि॒ष्टया॑ नः  
पिप॑र्तु। अ॒व॒स्यु॑वा॒ताः॥ ३५॥

बृ॒हती॑र्नु श॒क्ररी॑रि॒मं य॒ज्ञम॑वन्तु नो घृ॒ताचीः॑। सु॒व॒र्वती॑  
सु॒दुघा॑ नः प॒य॑स्वती दि॒शां दे॒व्य॑वतु नो घृ॒ताचीः॑। त्वं

गोपाः पुंरपुतोत पश्चाद्बृहस्पते याम्यां युद्धि वाचम्। ऊर्ध्वा  
दिशाः रन्तिराशौषधीनाः संवत्सरेण सविता नो अहाम्।  
रेवथसामातिच्छन्दा उ छन्दोजातशत्रुः स्योना नो अस्तु।  
स्तोमत्रयस्त्रिंशे भुवनस्य पत्नि विवस्वद्वाते अग्नि नः॥३६॥

गृणाहि। घृतवती सवितराधिपत्यैः पयस्वती रन्तिराशा  
नो अस्तु। ध्रुवा दिशां विष्णुपत्यघोरास्येशाना सहसो या  
मनोता। बृहस्पतिर्मातरिश्वोत वायुः संधुवाना वाता अग्नि  
नो गृणन्तु। विष्टम्भो दिवो धरुणः पृथिव्या अस्येशाना  
जगतो विष्णुपत्नी। विश्वव्यचा इषयन्ती सुभूतिः शिवा नो  
अस्त्वदितिरुपस्थै। वैश्वानरो न ऊत्या पृष्ठो दिव्यनु नो-  
ऽद्यानुमतिरन्विदनुमते त्वङ्क्या नश्चित्र आ भुवत्को अद्य  
युङ्क्ते॥३७॥

महिं सप्तदशेनावस्युवाता अग्नि नोऽनु नश्चतुर्दश च॥१२॥—————[१२]

नमस्ते रुद्र नमो हिरण्यबाहवे नमः सहमानाय नम आख्याधिनीभ्यो नमो भवाय नमो  
ज्येष्ठाय नमो दुन्दुभ्याय नमः सोमाय नम इरिण्याय द्रापे सहस्राण्येकादश॥११॥ नमस्ते रुद्र  
नमो भवाय द्रापे सप्तविंशतिः॥२७॥ नमस्ते रुद्र तं वो जम्भे दधामि॥—————[१३]

## ॥पञ्चमः प्रश्नः॥

## ॥तैत्तिरीयसंहितायां चतुर्थकाण्डे पञ्चमः प्रश्नः॥

नमस्ते रुद्र मन्यव उतो त इषवे नमः। नमस्ते अस्तु  
धन्वने बाहुभ्यामुत ते नमः। या त इषुः शिवतमा शिवम्बभूव  
ते धनुः। शिवा शरव्या या तव तया नो रुद्र मृडया। या ते  
रुद्र शिवा तनूरघोरापापकाशिनी। तया नस्तनुवा शतमया  
गिरिशन्ताभि चाकशीहि। यामिषु गिरिशन्त हस्तै॥१॥

बिभर्ष्यस्तवे। शिवां गिरित्र तां कुरु मा हिंसीः पुरुषं  
जगत्। शिवेन वचसा त्वा गिरिशाच्छा वदामसि। यथा नः  
सर्वमिज्जगदयक्ष्मं सुमना असत्। अध्यवोचदधिवक्ता प्रथमो  
दैव्यो भिषक्। अहीश्च सर्वाञ्जम्भयन्त्सर्वाश्च यातुधान्यः।  
असौ यस्ताम्रो अरुण उत बभ्रुः सुमङ्गलः। ये चेमा रुद्रा  
अभितो दिख्यु॥२॥

श्रिताः सहस्रशोऽवैषां हेड ईमहे। असौ योऽवसर्पति  
नीलग्रीवो विलोहितः। उत्तैनं गोपा अदृशन्नदृशन्नुदहार्यः।  
उत्तैनं विश्वा भूतानि स दृष्टो मृडयाति नः। नमो अस्तु  
नीलग्रीवाय सहस्राख्याय मीढुषे। अथो ये अस्य सत्वानो-

ऽहं तेभ्योऽकरं नमः। प्र मुञ्च धन्वंनस्त्वमुभयोरार्त्रियोज्याम्।  
याश्च ते हस्त इषवः॥३॥

परा ता भगवो वप। अवतत्य धनुस्त्व९ सहस्राख्य  
शतेषुधे। निशीर्य शल्यानाम्मुखा शिवो नः सुमना भव।  
विज्यं धनुः कपर्दिनो विशाल्यो बाणवा९ उत। अनैशन्नस्येषव  
आभुरस्य निषङ्गथिः। या ते हेतिर्मीदुष्टम् हस्ते बभूव ते  
धनुः। तयास्मान् विश्वतस्त्वमयख्यमया परि भुज। नमस्ते  
अस्त्वायुधायानातताय धृष्णवै। उभाभ्यामुत ते नमो बाहुभ्यां  
तव धन्वने। परि ते धन्वनो हेतिरस्मान्वृणक्तु विश्वतः। अथो  
य इषुधिस्तवारे अस्मन्नि धेहि तम्॥४॥

हस्ते दिक्षिषव उभाभ्यां द्वाविंशतिश्च॥१॥ [१]

नमो हिरण्यबाहवे सेनान्ये दिशां च पतये नमो  
नमो वृखेभ्यो हरिकेशेभ्यः पशूनाम्पतये नमो नमः  
सस्मिञ्जराय त्विषीमते पथीनाम्पतये नमो नमो बभ्रुशाय  
विव्याधिनेऽन्नानाम्पतये नमो नमो हरिकेशायोपवीतिने  
पुष्टानाम्पतये नमो नमो भवस्य हेत्यै जगताम्पतये  
नमो नमो रुद्रायातताविने ख्वेत्राणाम्पतये नमो नमः

सू॒तायाह॑न्त्याय॒ वना॑ना॒म्पत॑ये॒ नमो॒ नमः॑ ॥ ५ ॥

रोहि॑ताय॒ स्थ॒पत॑ये॒ वृ॒ख्याणा॑म्पत॑ये॒ नमो॒ नमो॑  
म॒न्त्रिणे॑ वाणि॒जाय॒ क॒ख्याणा॑म्पत॑ये॒ नमो॒ नमो॑ भुव॒न्तये॑  
वा॒रि॒वस्कृ॑तायौष॒धीना॑म्पत॑ये॒ नमो॒ नम॑ उ॒च्चैर्घो॑षायाक्र॒न्दय॑ते  
प॒त्तीना॑म्पत॑ये॒ नमो॒ नमः॑ कृ॒त्स्नवी॑ताय॒ धाव॑ते॒ सत्त्वं॑ना॒म्पत॑ये॒  
नमः॑ ॥ ६ ॥

वना॑ना॒म्पत॑ये॒ नमो॒ नम॑ ए॒कान्त्रि॑न्श॒च्च ॥ २ ॥ [२]

नमः॑ स॒हमा॑नाय॒ निव्या॑धि॒न आ॒व्या॑धि॒नीना॑म्पत॑ये॒ नमो॑  
नमः॑ ककु॒भाय॑ निष॒ङ्गिणे॑ स्ते॒नाना॑म्पत॑ये॒ नमो॒ नमो॑ निष॒ङ्गिण॑  
इषु॑धि॒मते॒ तस्क॑राणा॒म्पत॑ये॒ नमो॒ नमो॑ व॒ञ्चते॒ परि॑व॒ञ्चते॒  
स्ता॒यूना॑म्पत॑ये॒ नमो॒ नमो॑ नि॒चेर॑वे॒ परि॑च॒राया॑र॒ण्याना॑म्पत॑ये॒  
नमो॑ नमः॑ सृ॒कावि॑भ्यो॒ जिघा॑स॒द्भ्यो मु॑ष्ण॒ताम्पत॑ये॒ नमो॑  
नमो॑ऽसि॒मद्भ्यो॒ नक्तं॑ चर॒द्भ्यः प्र॑कृ॒न्ताना॑म्पत॑ये॒ नमो॑ नम॑  
उ॒ष्णी॒षिणे॑ गि॒रिच॑राय॒ कुलु॑श्चाना॒म्पत॑ये॒ नमो॒ नमः॑ ॥ ७ ॥

इषु॑म॒द्भ्यो ध॒न्वावि॑भ्यश्च वो॒ नमो॑ नम॑ आ॒तन्वा॑नेभ्यः  
प्र॒ति॒द॒धाने॑भ्यश्च वो॒ नमो॑ नम॑ आ॒यच्छ॑द्भ्यो वि॒सृज॑द्भ्यश्च वो॒  
नमो॑ नमो॑ऽस्य॑द्भ्यो वि॒ध्य॑द्भ्यश्च वो॒ नमो॑ नम॑ आ॒सी॑नेभ्यः

शयानेभ्यश्च वो नमो नमः स्वपद्भ्यो जाग्रद्भ्यश्च वो नमो  
 नमस्तिष्ठद्भ्यो धावद्भ्यश्च वो नमो नमः सभाभ्यः सभापतिभ्यश्च  
 वो नमो नमो अश्वेभ्योऽश्वपतिभ्यश्च वो नमः॥८॥

कुलुश्चानाम्पतये नमो नमोऽश्वपतिभ्यस्त्रीणि च॥३॥ [३]

नम आव्याधिनीभ्यो विविध्यन्तीभ्यश्च वो नमो  
 नम उगणाभ्यस्तृहतीभ्यश्च वो नमो नमो गृत्सेभ्यो  
 गृत्सपतिभ्यश्च वो नमो नमो व्रातेभ्यो व्रातपतिभ्यश्च वो  
 नमो नमो गुणेभ्यो गुणपतिभ्यश्च वो नमो नमो विरूपेभ्यो  
 विश्वरूपेभ्यश्च वो नमो नमो महद्भ्यः ख्युल्लकेभ्यश्च वो नमो  
 नमो रथिभ्योऽरथेभ्यश्च वो नमो नमो रथेभ्यः॥९॥

रथपतिभ्यश्च वो नमो नमः सेनाभ्यः सेनानिभ्यश्च वो  
 नमो नमः ख्यत्तृभ्यः संग्रहीतृभ्यश्च वो नमो नमस्तख्यभ्यो  
 रथकारेभ्यश्च वो नमो नमः कुलालेभ्यः कर्मरिभ्यश्च वो  
 नमो नमः पुञ्जिष्टेभ्यो निषादेभ्यश्च वो नमो नम इषुकृद्भ्यो  
 धन्वकृद्भ्यश्च वो नमो नमो मृगयुभ्यः श्वनिभ्यश्च वो नमो नमः  
 श्वभ्यः श्वपतिभ्यश्च वो नमः॥१०॥

रथेभ्यः श्वपतिभ्यश्च द्वे च॥४॥ [४]

नमो भ॒वाय॑ च रु॒द्राय॑ च॒ नमः॑ श॒र्वाय॑ च प॒शुप॑तये च॒ नमो॑  
 नील॑ग्रीवाय च शि॒ति॒क॒ण्ठाय॑ च॒ नमः॑ क॒पर्दि॑ने च॒ व्यु॑त्त॒केशाय॑  
 च॒ नमः॑ स॒हस्रा॑ख्याय॑ च श॒त॒ध॒न्वने॑ च॒ नमो॑ गि॒रि॒शाय॑ च  
 शि॒पि॒वि॒ष्टाय॑ च॒ नमो॑ मी॒ढु॒ष्टे॒माय॑ चे॒षु॒मते॑ च॒ नमो॑ ह॒स्वाय॑  
 च वा॒म॒नाय॑ च॒ नमो॑ बृ॒हते॑ च॒ वर्॒ष्णी॑यसे च॒ नमो॑ वृ॒द्धाय॑ च  
 संवृ॑ध्वने च॥११॥

नमो अ॒ग्रि॒याय॑ च प्र॒थ॒माय॑ च॒ नमः॑ आ॒शवे॑ चाजि॒राय॑ च॒  
 नमः॑ शी॒घ्रि॒याय॑ च॒ शी॒भ्याय॑ च॒ नमः॑ ऊ॒र्म्याय॑ चाव॒स्व॒न्याय॑  
 च॒ नमः॑ स्रो॒त॒स्याय॑ च॒ द्वी॒प्याय॑ च॥१२॥

सं वृध्वने च पञ्चविंशतिश्च॥५॥ [५]

नमो॑ ज्ये॒ष्ठाय॑ च क॒नि॒ष्ठाय॑ च॒ नमः॑ पू॒र्व॒जाय॑ चाप॒र्जाय॑ च॒  
 नमो॑ म॒ध्य॒माय॑ चाप॒ग॒ल्भाय॑ च॒ नमो॑ जघ॒न्याय॑ च॒ बु॒ध्रि॒याय॑  
 च॒ नमः॑ सो॒भ्याय॑ च प्र॒ति॒स॒र्याय॑ च॒ नमो॑ या॒म्याय॑ च॒ र॒खे॒म्याय॑  
 च॒ नमः॑ उ॒र्व॒र्याय॑ च॒ ख॒ल्याय॑ च॒ नमः॑ श्लो॒क्याय॑ चाव॒सा॒न्याय॑  
 च॒ नमो॑ व॒न्याय॑ च॒ क॒क्ष्याय॑ च॒ नमः॑ श्र॒वाय॑ च प्र॒ति॒श्र॒वाय॑  
 च॥१३॥

नमः॑ आ॒शु॒षे॒णाय॑ चा॒शु॒र॒थाय॑ च॒ नमः॑ शू॒राय॑ चाव॒भि॒न्दते॑



च नमो वर्मिणे च वरूथिने च नमो बिल्मिने च कवचिने  
च नमः श्रुताय च श्रुतसेनाय च॥१४॥

प्रतिश्रवाय च पञ्चविंशतिश्च॥६॥ [६]

नमो दुन्दुभ्याय चाहनन्याय च नमो धृष्णवे च प्रमृशाय  
च नमो दृताय च प्रहिताय च नमो निषङ्गिणे चेषुधिमते  
च नमस्तीक्ष्णेषवे चायुधिने च नमः स्वायुधाय च सुधन्वने  
च नमः स्रुत्याय च पथ्याय च नमः काट्याय च नीप्याय  
च नमः सूद्याय च सरस्याय च नमो नाद्याय च वैशन्ताय  
च॥१५॥

नमः कूप्याय चावट्याय च नमो वर्ष्याय चावर्ष्याय च  
नमो मेघ्याय च विद्युत्याय च नम ईध्रियाय चातप्याय च  
नमो वात्याय च रेष्मियाय च नमो वास्तव्याय च वास्तुपाय  
च॥१६॥

वैशन्ताय च त्रिंशच्च॥७॥ [७]

नमः सोमाय च रुद्राय च नमस्ताम्राय चारुणाय च नमः  
शङ्गाय च पशुपतये च नम उग्राय च भीमाय च नमो  
अग्रेवधाय च दूरेवधाय च नमो हृत्रे च हनीयसे च नमो

वृ॒ख्येभ्यो॒ हरि॑केशेभ्यो॒ नम॑स्ता॒राय॒ नमः॑ श॒म्भवे॑ च मयो॒भवे॑ च॒  
नमः॑ शं॒कराय॑ च मयस्क॒राय॑ च॒ नमः॑ शि॒वाय॑ च शि॒वत॑राय॒  
च॥१७॥

नम॑स्ती॒र्थाय॑ च॒ कू॒ल्याय॑ च॒ नमः॑ पा॒र्याय॑ चावा॒र्याय॑ च॒  
नमः॑ प्र॒तर॑णाय चोत्त॒र॑णाय च॒ नमः॑ आता॒र्याय॑ चाला॒द्याय॑ च॒  
नमः॑ श॒ष्याय॑ च॒ फे॒न्याय॑ च॒ नमः॑ सि॒क्त्याय॑ च प्रवा॒ह्याय॑  
च॥१८॥

शि॒वत॑राय च त्रि॒ंशच्च॥८॥ [८]

नम॑ इरि॒ण्याय॑ च प्रप॒थ्याय॑ च॒ नमः॑ कि॒ंशि॒लाय॑ च॒  
ख्य॑णाय च॒ नमः॑ कप॒र्दिने॑ च पु॒ल॒स्तये॑ च॒ नमो॑ गो॒ष्ठ्याय॑  
च॒ गृ॒ह्याय॑ च॒ नम॑स्त॒ल्प्याय॑ च॒ गे॒ह्याय॑ च॒ नमः॑ का॒ट्याय॑  
च॒ ग॒ह्वरे॑ष्ठाय च॒ नमो॑ हृद॒य्याय॑ च निवे॒ष्याय॑ च॒ नमः॑  
पा॒ं॒स॒व्याय॑ च रज॒स्याय॑ च॒ नमः॑ शु॒ष्क्याय॑ च हरि॒त्याय॑ च॒  
नमो॑ लो॒प्याय॑ चो॒ल॒प्याय॑ च॥१९॥

नम॑ ऊ॒र्व्याय॑ च सू॒र्म्याय॑ च॒ नमः॑ पु॒र्णाय॑ च पर्णश॒द्याय॑  
च॒ नमो॑ऽपगु॒रमा॑णाय चाभिघ्न॒ते च॒ नमः॑ आ॒क्खि॒द॒ते च॑  
प्र॒क्खि॒द॒ते च॒ नमो॑ वः कि॒रि॒केभ्यो॑ दे॒वाना॑ं हृद॒येभ्यो॑ नमो॑

वि॒र॒खी॒ण॒के॒भ्यो॒ नमो॑ वि॒चि॒न्व॒त्के॒भ्यो॒ नम॑ आ॒नि॒र॒ह॒ते॒भ्यो॒ नम॑  
आमी॒व॒त्के॒भ्यः॑ ॥ २० ॥

उ॒ल॒प्या॒य च॒ त्रय॑स्त्रि॒ंशच्च॑ ॥ १ ॥ [१]

द्रा॒पे अ॒न्ध॑स॒स्पते॒ दरि॑द्र॒न्नील॑लो॒हित॑ । ए॒षाम्पु॑रु॒षाणा॑मे॒षाम्प॑शु॒  
भे॒र्मारो॒ मो ए॑षां किं च॒नाम॑मत् । या ते॒ रु॒द्र शि॒वा त॒नूः शि॒वा  
वि॒श्वाह॑भे॒षजी॑ । शि॒वा रु॒द्रस्य॑ भे॒षजी॑ तया॑ नो मृ॒ड जी॒वसे॑ ।  
इ॒मा रु॒द्राय॑ त॒वसे॑ क॒पर्दि॑ने॒ ख्य॒यद्वी॑राय॒ प्र भ॑रामहे  
म॒तिम् । यथा॑ नः श॒मसं॑द्वि॒पदे॒ चतु॑ष्पदे॒ विश्व॑म्पु॒ष्टम्प्रा॒मे  
अ॒स्मिन् ॥ २१ ॥

अना॑तु॒रम् । मृ॒डा नो॑ रु॒द्रोत॑ नो मय॑स्कृ॒धि ख्य॒यद्वी॑राय॒  
नम॑सा वि॒धेम॑ ते । यच्छं च॒ योश्च॒ मनु॑राय॒जे पि॒ता तद॑श्याम॒  
तव॑ रु॒द्र प्र॒णीतौ॑ । मा नो॑ म॒हान्त॑मु॒त मा नो॑ अ॒र्भक॑म्मा  
न उ॒ख्यन्त॑मु॒त मा न॑ उ॒ख्यि॑तम् । मा नो॑ व॒धीः पि॒तर॑म्मो॒त  
मा॒तर॑म्पि॒या मा न॑स्त॒नुवः॑ ॥ २२ ॥

रु॒द्र री॒रि॒षः । मा न॑स्तो॒के तन॑ये॒ मा न॒ आयु॑षि॒ मा नो॒  
गोषु॑ मा नो॒ अश्वे॑षु री॒रि॒षः । वी॒रान्मा॑ नो॒ रु॒द्र भा॑मि॒तो  
व॒धीर्ह॒विष्म॑न्तो॒ नम॑सा वि॒धेम॑ ते । आ॒रा॒त्ते गो॒घ्न उ॒त पू॑रुष॒घ्ने

रख्यद्वीराय सुम्रमस्मे ते अस्तु। रख्यां च नो अधि च देव  
ब्रूह्यधा च नः शर्म यच्छ द्विबर्हाः। स्तुहि॥२३॥

श्रुतं गर्तसदं युवानम्मृगं न भीममुपहृतमुग्रम्। मृडा  
जरित्रे रुद्र स्तवानो अन्यं ते अस्मन्नि वपन्तु सेनाः।  
परि णो रुद्रस्य हेतिर्वृणक्तु परि त्वेषस्य दुर्मतिरघायोः।  
अव स्थिरा मघवद्व्यस्तनुष्व मीद्वस्तोकाय तनयाय मृडय।  
मीदुष्टम शिवतम शिवो नः सुमना भव। परमे वृख्य आयुधं  
निधाय कृत्तिं वसान आ चर पिनाकम्॥२४॥

बिभ्रदा गंहि। विकिरिद विलोहित नमस्ते अस्तु भगवः।  
यास्ते सहस्रं हेतयोऽन्यमस्मन्नि वपन्तु ताः। सहस्राणि  
सहस्रधा बाहुवोस्तव हेतयः। तासामीशानो भगवः पराचीना  
मुखा कृधि॥२५॥

अस्मिः स्तुतुः स्तुहि पिनाकमेकान्निःशब्दं॥१०॥

[१०]

सहस्राणि सहस्रशो ये रुद्रा अधि भूम्याम्। तेषां  
सहस्रयोजनेऽव धन्वानि तन्मसि। अस्मिन्महत्यर्णवेऽ-  
न्तरिख्ये भवा अधि। नीलग्रीवाः शितिकण्ठाः शर्वा  
अधः ख्यमाचराः। नीलग्रीवाः शितिकण्ठा दिवः रुद्रा

उपश्रिताः। ये वृखेषु सस्मिञ्जरा नीलग्रीवा विलोहिताः।  
 ये भूतानामधिपतयो विशिखासः कपर्दिनः। ये अत्रैषु  
 विविध्यन्ति पात्रेषु पिबन्तो जनान्। ये पथाम्पथिरख्य  
 ऐलबृदा यव्युधः। ये तीर्थानि॥२६॥

प्रचरन्ति सूकावन्तो निषङ्गिणः। य एतावन्तश्च भूयांसश्च  
 दिशो रुद्रा वितस्थिरे। तेषां सहस्रयोजनेऽव धन्वानि  
 तन्मसि। नमो रुद्रेभ्यो ये पृथिव्यां येऽन्तरिख्ये ये दिवि  
 येषामन्नं वातो वर्षमिषवस्तेभ्यो दश प्राचीर्दश दखिणा  
 दश प्रतीचीर्दशोदीचीर्दशोर्ध्वास्तेभ्यो नमस्ते नो मृडयन्तु ते  
 यं द्विष्मो यश्च नो द्वेष्टि तं वो जम्भे दधामि॥२७॥

तीर्थानि यश्च षट्॥११॥ [११]

अश्मन् य इमोदेनमाशुः प्राचीं जीमूतस्य यदक्रन्दो मा नो मित्रो ये वाजिनं नवं॥९॥  
 अश्मन्मनोयुजं प्राचीमनु शर्म यच्छतु तेषामभिगूतिः षट्त्वारिंशत्। अश्मन् हविष्मान्॥ हरिः  
 ओम्। श्रीकृष्णार्पणमस्तु॥ [१२]

अश्मन् य इमोदेनमाशुः प्राचीं जीमूतस्य यदक्रन्दो मा नो मित्रो ये वाजिनं नवं॥९॥  
 अश्मन्मनोयुजं प्राचीमनु शर्म यच्छतु तेषामभिगूतिः षट्त्वारिंशत्। अश्मन् हविष्मान्॥ हरिः  
 ओम्। श्रीकृष्णार्पणमस्तु॥ [१३]

## ॥षष्ठमः प्रश्नः॥

॥तैत्तिरीयसंहितायां चतुर्थकाण्डे षष्ठमः प्रश्नः॥

अश्मन्नूर्जम्पर्वते शिश्रियाणां वाते पर्जन्ये वरुणस्य शुष्मे।  
 अद्ध्य ओषधीभ्यो वनस्पतिभ्योऽधि सम्भृतां तां न इषमूर्जं  
 धत्त मरुतः सःरराणाः। अश्मंस्ते ख्युदमुं ते शुगृच्छतु यं  
 द्विष्मः। समुद्रस्य त्वाऽवाकयाग्ने परि व्ययामसि। पावको  
 अस्मभ्यः शिवो भव। हिमस्य त्वा जरायुणाग्ने परि  
 व्ययामसि। पावको अस्मभ्यः शिवो भव। उप॥१॥

ज्मन्नुप वेतसेऽवत्तरं नदीष्वा। अग्ने पित्तमपामसि।  
 मण्डूकि ताभिरा गंहि सेमं नो यज्ञम्। पावकवर्णः शिवं  
 कृधि। पावक आ चितयन्त्या कृपा। ख्यामन्नुरुच उषसो  
 न भानुना। तूर्वन्न यामन्नेतशस्य नू रण आ यो घृणे।  
 न ततृषाणो अजरः। अग्ने पावक रोचिषा मन्द्रया देव  
 जिह्वया। आ देवान्॥२॥

वर्षि यर्षि च। स नः पावक दीदिवोऽग्ने देवाः इहा  
 वह। उप यज्ञः हविश्च नः। अपामिदं न्ययनः समुद्रस्य  
 निवेशनम्। अन्यं ते अस्मत्तपन्तु हेतयः पावको अस्मभ्यः

शि॒वो भ॑व। नम॑स्ते॒ हर॑से शो॒चिषे॒ नम॑स्ते अ॒स्त्वर्चि॑षे। अ॒न्यं  
ते॒ अ॒स्मत्त॑पन्तु हे॒तयः॑ पाव॒को अ॒स्मभ्य॑ꣳ शि॒वो भ॑व। नृ॒षदे॒  
वट्॥ ३॥

अ॒प्सुष॑दे॒ वड्ढ॑न॒सदे॒ वड्ढ॑र्हिषदे॒ वट्थ्सु॑व॒र्विदे॒ वट्। ये दे॒वा  
दे॒वानां॑ य॒ज्ञियां॑ य॒ज्ञिया॑नाꣳ सं॒वथ्स॑रीण॒मुप॑ भा॒गमा॑संते।  
अ॒हुता॑दो ह॒विषो॑ य॒ज्ञे अ॒स्मिन्त्स्व॑यं जु॒हुध्व॑म्मधु॒नो घृ॑तस्य।  
ये दे॒वा दे॒वेष्वधि॑ दे॒वत्व॑मायन् ये ब्रह्म॑णः पु॒रए॑तारो अ॒स्य।  
येभ्यो॑ न॒र्ते पव॑ते॒ धाम् किं॒ च॒न न ते दि॒वो न पृ॑थि॒व्या अधि॑  
स्रु॒षु। प्रा॒णदाः॥ ४॥

अ॒पा॒न॒दा व्या॑न॒दाश्च॑र॒ख्युर्दा॑ व॒र्चो॑दा व॒रिवो॑दाः। अ॒न्यं  
ते॒ अ॒स्मत्त॑पन्तु हे॒तयः॑ पाव॒को अ॒स्मभ्य॑ꣳ शि॒वो भ॑व।  
अ॒ग्निस्ति॒ग्मेन॑ शो॒चिषा॑ यꣳस॒द्विध्वं॑ न्य॒त्रिण॑म्। अ॒ग्निर्नो॑  
वꣳस॑ते र॒यिम्। सै॒नानी॑केन सु॒विद॑त्रो अ॒स्मे य॑ष्टा दे॒वाꣳ  
आय॑जिष्ठः स्व॒स्ति। अ॒द॒भ्यो गो॒पा उ॒त नः॑ प॒र॒स्पा अ॒ग्ने  
द्यु॒मदु॑त रे॒वद्दि॑दीहि॥ ५॥

उप॑ दे॒वान् व॒द्ग्रा॑ण॒दाश्च॑तु॒श्चत्वारि॑ꣳशच्च॥ १॥ [१]

य इ॒मा वि॒श्वा भु॑व॒नानि॑ जु॒ह्वद्वि॑र्होता॑ निष॒सादा॑ पि॒ता

नः। स आशिषा द्रविणमिच्छमानः परमच्छदो वर आ  
 विवेश। विश्वकर्मा मनसा यद्विहाया धाता विधाता परमोत  
 सृष्ट्वा। तेषामिष्टानि समिषा मदन्ति यत्र सत्तर्षीन्पर  
 एकमाहुः। यो नः पिता जनिता यो विधाता यो नः सतो  
 अभ्या सञ्जान।॥६॥

यो देवानां नामधा एक एव तं सम्प्रश्नम्भुवना  
 यन्त्यन्या। त आयजन्त द्रविणं समस्मा ऋषयः  
 पूर्वं जरितारो न भूना। असूर्ता सूर्ता रजसो विमाने  
 ये भूतानि समकृण्वन्निमानि। न तं विदाथ य इदं  
 जजानान्यद्युष्माकमन्तरम्भवाति। नीहारेण प्रावृता जल्प्या  
 चासुतृप उक्थशासंश्चरन्ति। पुरो दिवा पर एना॥७॥

पृथिव्या पुरो देवेभिरसुरैर्गुहा यत्। कः स्विद्गर्भं प्रथमं  
 दध्र आपो यत्र देवाः समगच्छन्त विश्वे। तमिद्गर्भम्प्रथमं  
 दध्र आपो यत्र देवाः समगच्छन्त विश्वे। अजस्य  
 नाभावध्येकमर्पितं यस्मिन्निदं विश्वम्भुवनं- मधि श्रितम्।  
 विश्वकर्मा ह्यजनिष्ट देव आदिद्गन्धर्वो अभवद्वितीयः। तृतीयः  
 पिता जनितौषधीनाम्॥८॥



अपां गर्भं व्यदधात्पुरुत्रा। चख्युषः पिता मनसा हि  
 धीरो घृतमेने अजनन्नन्नमाने। यदेदन्ता अददहन्त  
 पूर्वं आदिद्यावापृथिवी अप्रथेताम्। विश्वतश्चख्युरुत  
 विश्वतोमुखो विश्वतोहस्त उत विश्वतस्पात्। सं बाहुभ्यां  
 नमन्ति सम्पतत्रैर्द्यावापृथिवी जनयं देव एकः। किं  
 स्विदासीदधिष्ठानमारम्भणं कतमथिस्वत्किमासीत्। यदी  
 भूमिं जनयन्॥१॥

विश्वकर्मा वि द्यामौर्णोन्महिना विश्वचख्याः। किं  
 स्विद्वनं क उ स वृख्य आसीद्यतो द्यावापृथिवी निष्टतख्युः।  
 मनीषिणो मनसा पृच्छतेदु तद्यदध्यतिष्ठद्भुवनानि धारयन्।  
 या ते धामानि परमाणि यावमा या मध्यमा विश्वकर्मन्नुतेमा।  
 शिख्या सखिभ्यो हविषि स्वधावः स्वयं यजस्व तनुवं  
 जुषाणः। वाचस्पतिं विश्वकर्माणमृतये॥१०॥

मनोयुजं वाजं अद्या हुवेम। स नो नेदिष्ठा हवनानि  
 जोषते विश्वशम्भूरवसे साधुकर्मा। विश्वकर्मन् हविषां  
 वावृधानः स्वयं यजस्व तनुवं जुषाणः। मुह्यन्त्वन्ये  
 अभितः सपत्ना इहास्माकम्मघवां सूरिरस्तु। विश्वकर्मन्

ह॒विषा॒ वर्ध॑नेन त्रा॒तार॒मिन्द्र॑म॒कृणो॑रव॒ध्यम्। तस्मै॒ विशः॑  
सम॑नमन्त पूर्वी॒रय॑मु॒ग्रो वि॑ह॒व्यो यथा॑सत्। स॒मुद्रा॑य॒ व॒युना॑य॒  
सिन्धू॑ना॒म्पत॑ये नमः। न॒दीना॒ः सर्वा॑सा॒म्पि॒त्रे जु॑हुता  
वि॒श्वक॑र्मणे॒ विश्वा॑हाम॒र्त्यः ह॒विः॥११॥

ज॒जानै॑नोष॒धीनां॒ भूमिं॑ ज॒नय॑न्नृ॒तये॒ नमो॒ नवं॒ च॥२॥ [२]

उदे॑नमु॒त्तरां॒ न॒याग्रे॑ घृ॒तेना॑हुत। रा॒यस्पोषे॑ण॒ सः सृ॑ज  
प्र॒जया॑ च॒ धने॑न च। इन्द्रे॑म॒म्प्र॒तरां॒ कृ॒धि स॑जा॒ताना॑म॒सद्व॒शी।  
समे॑न॒ वर्च॑सा सृज दे॒वेभ्यो॑ भाग॒धा अ॑सत्। यस्य॑ कु॒र्मो  
ह॒विर्गृ॑हे तम॑ग्रे वर्ध॒या त्वम्। तस्मै॒ देवा॑ अधि॒ ब्रव॑न्न॒यं च॒  
ब्रह्म॑ण॒स्पतिः॑। उदु॑ त्वा वि॒श्वे दे॒वाः॥१२॥

अग्रे॑ भ॒रन्तु॑ चि॒त्तिभिः॑। स नो॑ भव शि॒वत॑मः सु॒प्रती॑को  
वि॒भाव॑सुः। पश्च॒ दिशो॑ दैवी॒र्यज्ञ॑म॒वन्तु॑ दे॒वीर॑पा॒मंति॑  
दुर्म॑ति॒म्बाध॑मानाः। रा॒यस्पोषे॑ य॒ज्ञप॑तिमा॒भज॑न्तीः। रा॒यस्पोषे॑  
अधि॑ य॒ज्ञो अ॑स्था॒त्समि॑द्धे अ॒ग्नाव॑धि॒ माम॑हा॒नः। उ॒क्थ॑प॒त्र  
ई॒ड्यो गृ॑भी॒तस्त॑प्तं घ॒र्मम्प॑रि॒गृह्या॑यजन्त। ऊ॒र्जा य॒द्यज्ञ॑मश॒मन्त॑  
दे॒वा दै॒व्याय॑ ध॒र्त्रे जो॑ष्टे। दे॒वश्रीः॑ श्रीम॑णाः श॒तप॑याः॥१३॥

परिगृह्य देवा यज्ञमायन्। सूर्यरश्मिरहरिकेशः  
 पुरस्तात्सविता ज्योतिरुदयाः अजस्रम्। तस्य पूषा  
 प्रसवं याति देवः सम्पश्यन्विश्वा भुवनानि गोपाः। देवा  
 देवेभ्यो अध्वर्यन्तो अस्थुर्वीतः शमित्रे शमिता यजध्वै।  
 तुरीयो यज्ञो यत्र हव्यमेति ततः पावका आशिषो नो  
 जुषन्ताम्। विमानं एष दिवो मध्यं आस्त आपप्रिवान्नोदसी  
 अन्तरिख्यम्। स विश्वार्चीरभि॥१४॥

चष्टे घृताचीरन्तरा पूर्वमपरं च केतुम्। उख्या समुद्रो  
 अरुणः सुपर्णः पूर्वस्य योनिंमपितुरा विवेश। मध्ये दिवो  
 निहितः पृश्निरश्मा वि चक्रमे रजसः पात्यन्तौ। इन्द्रं विश्वा  
 अवीवृधन्समुद्रव्यचसं गिरः। रथीतमः रथीनां वाजानां  
 सत्पतिम्पतिम्। सुम्रहूर्यज्ञो देवाः आ च वरख्यद्यख्यदग्निर्देवो  
 देवाः आ च वरख्यत्। वाजस्य मा प्रसवेनोद्ग्राभेणोदग्रभीत्।  
 अथा सपत्नाः इन्द्रो मे निग्राभेणाधराः अकः। उद्ग्राभं च  
 निग्राभं च ब्रह्म देवा अवीवृधन्। अथा सपत्नानिन्द्राग्नी मे  
 विषूचीनान्व्यस्यताम्॥१५॥

आशुः शिशा॒नो वृष॒भो न यु॒ध्मो घ॑नाघ॒नः  
 र॒खोभ॑णश्च॒र॒षणी॑नाम्। स॒ङ्क्र॑न्द॒नोऽनि॑मिष॒ एक॑वीरः श॒त॑  
 सेना॑ अजय॒त्स॒ाक॑मिन्द्रः। स॒ंक्र॑न्द॒नेना॑निमि॒षेण॑ जि॒ष्णुना॑  
 यु॒त्का॒रेण॑ दु॒श्च॒व॒नेन॑ धृ॒ष्णुना॑। तदिन्द्रे॑ण जयत॒ तत्स॑ह॒ध्वं  
 यु॒धो न॑र॒ इषु॑ह॒स्तेन॑ वृ॒ष्णा॑। स इषु॑ह॒स्तैः स॑ नि॒षङ्गि॑भिर्वशी  
 स॑ऽस्र॒ष्टा स॑ यु॒ध इन्द्रो॑ ग॒णेन॑। स॒ऽसृ॑ष्ट॒जि॒त्सोम॑पा  
 बा॒हुश॒र्ध्यूर्ध्व॑ध॒न्वा प्र॑ति॒हिता॑भि॒रस्ता॑। बृह॑स्प॒ते परि॑  
 दीय॥१६॥

रथे॑न र॒खोहा॑मि॒त्राः अप॒बाध॑मानः। प्र॒भ॒ञ्ज॒न्त्सेना॑ः  
 प्रमृ॑णो यु॒धा ज॑य॒न्त॒स्माक॑मे॒ध्यवि॑ता रथाना॑म्। गो॒त्रभि॑दं  
 गो॒विदं॑ वज्र॑बाहुं ज॑य॒न्त॒मज्मं॑ प्रमृ॑णन्त॒मोज॑सा। इ॒म॑  
 स॑जा॒ता अनु॑ वी॒रय॑ध्व॒मिन्द्रः॑ स॒खायोऽनु॑ स॑ र॒भध्व॑म्।  
 ब॒ल॒वि॒ज्ञायः॑ स्थ॒वि॒रः प्र॑वी॒रः स॑ह॒स्वान् वा॒जी स॑ह॒मान  
 उ॒ग्रः। अ॒भि॒वी॒रो अ॒भिस॑त्वा स॒हो॒जा जै॑त्र॒मिन्द्र॑ रथ॒मा ति॑ष्ठ  
 गो॒वित्। अ॒भि गो॒त्राणि॑ स॒हसा॑ गा॒ह॒मानोऽदा॑यः॥१७॥

वी॒रः श॒तम॑न्युरिन्द्रः। दु॒श्च॒व॒नः पृ॑तना॒षाड॑यु॒ध्योऽस्माक॑  
 सेना॑ अव॒तु प्र॑ यु॒त्सु। इन्द्रं॑ आसां ने॒ता बृह॑स्प॒तिर्द॑खि॒षणा  
 य॒ज्ञः पु॒र ए॒तु सोमः॑। दे॒व॒से॒नाना॑मभि॒भञ्ज॑तीनां

जयन्तीनाम्मु॒रुतो॑ य॒न्त्वग्रै॑। इन्द्र॑स्य॒ वृष्णो॑ वरु॒णस्य॒ राज्ञ॑  
आदि॒त्याना॑म्मु॒रुता॒५ शर्ध॑ उ॒ग्रम्। म॒हाम॑न॒साम्भु॑वनच्य॒वानां॑  
घोषो॑ दे॒वानां॑ जय॑ता॒मुद॑स्थात्। अ॒स्माक॑मिन्द्रः॒ समृ॑तेषु  
ध्व॒जेष्व॒स्माकं॑ या इष॑व॒स्ता ज॑यन्तु॥१८॥

अ॒स्माकं॑ वी॒रा उत्त॑रे भवन्त्व॒स्मानु॑ दे॒वा अव॑ता ह॒वेषु॑।  
उद्ध॑र्षय म॒घव॑न्नायु॒धान्यु॑त्स॒त्वंना॑म्मा॒मका॑ना॒म्महा॑सि।  
उद्ध॑त्रहन्वा॒जिनां॑ वा॒जिना॑न्यु॒द्रथा॑नां॒ जय॑तामेतु॒ घोषः॑। उप॒  
प्रेत॑ जय॑ता नरः स्थि॒रा वः॑ सन्तु बा॒हवः॑। इन्द्रो॑ वः  
शर्म॑ यच्छ॒त्वना॑धृष्या यथास॑थ। अ॒वसृ॑ष्टा॒ परा॑ प॒त शर॑व्ये  
ब्रह्म॑स॒शिता॑। गच्छा॒मित्रा॑न्प्र॥१९॥

वि॒श मैषां॑ कं च॒नोच्छि॑षः। म॒र्माणि॑ ते व॒र्मभि॑श्छादयामि  
सोम॑स्त्वा॒ राजा॑मृते॒नाभि॑ व॒स्ताम्। उ॒रोर्व॑री॒यो वरि॑वस्ते  
अस्तु॑ जय॑न्तं॒ त्वाम॑नु॒ मद॑न्तु दे॒वाः। यत्र॑ बा॒णाः स॒म्पत॑न्ति  
कुमा॒रा वि॑शि॒खा इ॒वा। इन्द्रो॑ न॒स्तत्र॑ वृ॒त्रहा॑ वि॒श्वाहा॑ शर्म॑  
यच्छ॑तु॥२०॥

दी॒या दा॒यो ज॑यन्त्व॒मित्रा॑न् च॒त्वारि॒॑शच्च॑॥४॥ [४]

प्राची॑मनु॒ प्र॒दिश॑म्प्रेहि॒ वि॒द्वान॒ग्नेर॑ग्ने॒ पुरो॑ अ॒ग्निर्भ॑वेह।

विश्वा॒ आशा॒ दी॒द्या॒नो॒ वि भा॒ह्यू॒र्जं॑ नो धेहि द्वि॒पदे॒  
चतु॑ष्पदे। क्रम॑ध्वम॒ग्निना॒ नाक॑मुख्य॒ः हस्ते॑षु बिभ्र॑तः।  
दिवः॑ पृ॒ष्ठः सुव॑र्ग॒त्वा मि॒श्रा दे॒वेभि॑राद्धम्। पृथि॒व्या  
अ॒हमु॒दन्तरि॑ख्यमा॒रुह॑मन्तरि॑ख्या॒दिव॑मा॒रुह॑म्। दि॒वो  
नाक॑स्य पृ॒ष्ठाथ्सु॒वज्यो॑तिर॒गाम्॥ २१॥

अ॒हम्। सुव॑र्यन्तो॒ नापै॑र्यन्त॒ आ द्या॑ रौहन्ति॒ रोद॑सी।  
य॒ज्ञं ये वि॒श्वतो॑धार॒ः सुवि॑द्वा॒ः सो वि॒तेनि॑रे। अ॒ग्ने प्रेहि॑  
प्रथ॑मो दै॒वय॑तां च॒ख्युर्दे॒वाना॑मु॒त म॒र्त्याना॑म्। इय॑र्यमाणा  
भृ॒गुभिः॑ स॒जोषाः॑ सुव॑र्यन्तु॒ यज॑मानाः स्व॒स्ति। नक्तो॑षासा  
सम॑नसा॒ विरू॑पे धा॒पये॑ते शिशु॑मेक॒ः समी॑ची। द्यावा  
ख्या॑मा रु॒क्मो अ॒न्तर्वि॑भा॒ति दे॒वा अ॒ग्निं धा॑रय॒न्द्रवि॑णो॒दाः।  
अ॒ग्ने सह॑स्राख्य॥ २२॥

श॒त॒मूर्ध॒ञ्छ॒तं ते॑ प्रा॒णाः स॒हस्र॑मपा॒नाः। त्व॑ सा॒हस्र॑स्य  
रा॒य ई॒शिषे॑ तस्मै॑ ते वि॒धेम॑ वाजा॑य॒ स्वाहा॑। सु॒पर्णो॑-  
ऽसि॑ गुरु॒त्मान्पृ॑थि॒व्याः सी॑द पृ॒ष्ठे पृथि॑व्याः सी॑द  
भा॒सान्त॑रि॒ख्यमा॑ पृ॒ण ज्योति॑षा दि॒वमु॒त्त॑मान् तेज॑सा दि॒श  
उद्दृ॑ह। आ॒जुह्वा॑नः सु॒प्रती॑कः पु॒रस्ता॑द॒ग्ने स्वां॑ योनि॒मा सी॑द

साध्या। अस्मिन्सुधस्थे अध्युत्तरस्मिन्विश्वे देवाः॥२३॥

यजमानश्च सीदत। प्रेद्धो अग्ने दीदिहि पुरो नो-  
ऽजस्रया सूर्या यविष्ठ। त्वां शश्वन्तु उप यन्ति वाजाः।  
विधेम ते परमे जन्मन्त्रग्ने विधेम स्तोमैरवरे सुधस्थे।  
यस्माद्योनैरुदारिथा यजे तम्प्र त्वे हवींषि जुहुरे समिद्धे।  
तां सवितुर्वरेण्यस्य चित्रामाहं वृणे सुमतिं विश्वजन्याम्।  
यामस्य कण्वो अदुहत्प्रपीनां सहस्रधाराम्॥२४॥

पयसा महीं गाम्। सप्त ते अग्ने समिधः सप्त जिह्वाः  
सप्तर्षयः सप्त धाम प्रियाणि। सप्त होत्राः सप्तधा त्वां यजन्ति  
सप्त योनीरा पृणस्वा घृतेन। ईदृङ्वा न्यादृङ्वा तादृङ्वा प्रतिदृङ्वा  
मितश्च सम्मितश्च सभराः। शुक्रज्योतिश्च चित्रज्योतिश्च  
सत्यज्योतिश्च ज्योतिष्मांश्च सत्यश्चर्तुपाश्चात्यं हाः॥२५॥

ऋतजिच्च सत्यजिच्च सेनजिच्च सुषेणश्चान्त्यमित्रश्च  
दूरेऽमित्रश्च गुणः। ऋतश्च सत्यश्च ध्रुवश्च धरुणश्च धर्ता च  
विधर्ता च विधारयः। ईदृक्षांस एतादृक्षांस ऊ षु णः  
सदृक्षांसः प्रतिसदृक्षांस एतन। मितासंश्च सम्मितासश्च  
न ऊतये सभरसो मरुतो यजे अस्मिन्निन्द्रं दैवीर्विशो

म॒रुतोऽनु॑व॒र्त्मानो॒ यथेन्द्रं॑ दैवी॒र्विशो॑ म॒रुतोऽनु॑व॒र्त्मान ए॒वमि॒मं  
यज॑मानं दैवींश्च॑ वि॒शो मा॒नुषी॑श्चानु॒व॒र्त्मानो भवन्तु॥ २६॥

अ॒गा॒५ स॒हस्रा॒क्ष दे॒वाः स॒हस्र॑धा॒रा॒मत्य॑हा अनु॒व॒र्त्मानः॑ षोड॑श च॥५॥ ——— [५]

जी॒मूत॑स्येव भवति॒ प्रती॑कं॒ यद्व॒र्मी या॑ति॒ सम॑दा॒मुप॑स्थे॑।  
अना॑वि॒द्धया त॒नुवा॑ ज॒य॒ त्व॒५ स त्वा॒ वर्म॑णो म॒हिमा पि॑प॒र्तु।  
धन्व॑ना॒ गा धन्व॑ना॒जिं ज॑येम॒ धन्व॑ना ती॒व्राः सम॑दो॒ जये॑म।  
धनुः॑ शत्रो॑रप॒कामं॑ कृ॒णोति॒ धन्व॑ना॒ सर्वाः प्र॑दि॒शो जये॑म।  
व॒क्ष्यन्ती॒वेदा ग॑नी॒गन्ति॒ कर्ण॑मि॒प्रय॒५ सखा॑य॒म्परि॑ष॒स्वजा॒ना।  
योषे॑व॒ शिङ्गे॒ वित॑ताधि॒ धन्व॑न्॥ २७॥

ज्या इ॒य॒५ सम॑ने पा॒रय॑न्ती। ते आ॒चर॑न्ती॒ सम॑ने॒व  
योषा॑ मा॒तेव॑ पु॒त्रम्बि॑भृता॒मुप॑स्थे॑। अप॒ शत्र॑ न्॒विध्य॑ता॒५  
संवि॑दाने आ॒र्त्नी इ॒मे वि॑ष्फुर॒न्ती अ॒मित्रा॑न्। ब॒ह्वीना॑म्पि॒ता  
ब॒हुर॑स्य पु॒त्रश्चि॒श्वा कृ॑णोति॒ सम॑ना॒व॒गत्य॑। इ॒षुधिः॑  
सङ्काः॑ पृ॒तना॑श्च॒ सर्वाः पृ॑ष्ठे नि॒नद्धो॑ जयति॒ प्रसू॑तः। रथे॑  
तिष्ठ॑न्नयति॒ वा॒जिनः॑ पु॒रो यत्र॑यत्र का॒मय॑ते सुषा॒रथिः॑।  
अ॒भीशू॑ना॒म्महि॑मानम्॥ २८॥



पुनायत मनः पश्चादनु यच्छन्ति रश्मयः। तीव्रान्धोषान्कृण्वते  
 वृषपाणयोऽश्वा रथेभिः सह वाजयन्तः। अवक्रामन्तः  
 प्रपदैरमित्रान्निष्पणन्ति शत्रून् रनपव्ययन्तः। रथवाहनं  
 हविरस्य नाम यत्रायुधं निहितमस्य वर्म। तत्रा रथमुप शग्मं  
 सदेम विश्वाहा वयं सुमनस्यमानाः। स्वादुषंसदः पितरो  
 वयोधाः कृच्छेश्रितः शक्तीवन्तो गभीराः। चित्रसेना इषुबला  
 अमृधाः सतोवीरा उरवो ब्रातसाहाः। ब्राह्मणासः॥२९॥

पितरः सोम्यासः शिवे नो द्यावापृथिवी अनेहसा। पूषा नः  
 पातु दुरितादृतावृधो रख्या माकिर्नो अघशंस ईशत। सुपूर्णं  
 वस्ते मृगो अस्या दन्तो गोभिः संनद्धा पतति प्रसूता। यत्रा  
 नरः सं च वि च द्रवन्ति तत्रास्मभ्यमिषवः शर्म यंसन्।  
 ऋजीते परि वृद्धि नोऽश्मा भवतु नस्तनूः। सोमो अधि  
 ब्रवीतु नोऽदितिः॥३०॥

शर्म यच्छतु। आ जङ्घन्ति सान्वेषां जघनां उप  
 जिघ्रते। अश्वाजनि प्रचेतसोऽश्वान्त्समत्सु चोदय। अहिरिव  
 भोगैः पर्येति बाहुं ज्याया हेतिम्परिबाधमानः। हस्तघ्नो  
 विश्वा वयुनानि विद्वान्पुमान्पुमांसम्परि पातु विश्वतः।

वनस्पते वीड्वङ्गो हि भूया अस्मत्सखा प्रतरणः सुवीरः।  
गोभिः संनद्धो असि वीडयस्वास्थाता ते जयतु जेत्वानि।  
दिवः पृथिव्याः परि॥ ३१॥

ओज उद्धृतं वनस्पतिभ्यः पर्याभृतं सहः।  
अपामोज्मानम्परि गोभिरावृतमिन्द्रस्य वज्रं हविषा  
रथं यज। इन्द्रस्य वज्रो मरुतामनीकम्मित्रस्य गर्भो  
वरुणस्य नाभिः। सेमां नो हव्यदातिं जुषाणो देव रथं प्रति  
हव्या गृभाय। उप श्वासय पृथिवीमुत द्याम्पुरुत्रा ते मनुतां  
विष्टितं जगत्। स दुन्दुभे सजूरिन्द्रेण देवैर्दूरात्॥ ३२॥

दवीयो अपं सेधु शत्रून्। आ क्रन्दय बलमोजो न  
आ धा नि ष्टनिहि दुरिता बाधमानः। अपं प्रोथ दुन्दुभे  
दुच्छुनां इत इन्द्रस्य मुष्टिरसि वीडयस्व। आमूरज  
प्रत्यावर्तयेमाः केतुमदुन्दुभिर्वावदीति। समश्वपर्णाश्चरन्ति नो  
नरोऽस्माकमिन्द्र रथिनो जयन्तु॥ ३३॥

धन्वन्महिमानं ब्राह्मणासोऽदितिः पृथिव्याः परि दूरादेकचत्वारिंशच्च॥ ६॥ ——— [६]

यदक्रन्दः प्रथमं जायमान उद्यन्त्समुद्रादुत वा पुरीषात्।  
श्येनस्य पृष्या हरिणस्य बाहू उपस्तुत्यम्महि जातं ते अर्वन्।

य॒मेन॑ द॒त्तं त्रि॒त ए॑न॒मायु॑न॒गिन्द्र॑ ए॒णम्प्र॑थ॒मो अ॒ध्य॑तिष्ठत्।  
 ग॒न्ध॒र्वो अ॑स्य र॒शना॑म॒गृष्णा॑त्सूरा॒दश्वं॑ व॒सवो॑ निर॑तष्ट। अ॒सि  
 य॒मो अ॒स्यादि॑त्यो अ॒र्वन्न॑सि त्रि॒तो गु॒ह्येन॑ व्र॒तेन॑। अ॒सि सो॒मेन॑  
 स॒मया॑ वि॒पृक्तः॥ ३४॥

आ॒हुस्ते॒ त्रीणि॑ दि॒वि ब॒न्ध॑नानि। त्रीणि॑ त आ॒हुर्दिवि॑  
 ब॒न्ध॑नानि त्री॒ण्यप्सु॑ त्री॒ण्यन्तः॑ स॒मुद्रे॑। उ॒तेव॑ मे  
 वरु॑णश्छ॒न्त्स्यर्व॑न् यत्रा॑ त आ॒हुः प॑र॒मं ज॒नित्र॑म्।  
 इ॒मा ते॑ वाजि॒त्रव॒मार्ज॑नानी॒मा श॒फाना॑ः स॒नितु॑र्नि॒धाना॑।  
 अत्रा॑ ते भ॒द्रा र॑श॒ना अ॑प॒श्यमृ॑तस्य॒ या अ॑भि॒रख्य॑न्ति गो॒पाः।  
 आ॒त्मानं॑ ते॒ मन॑सा॒राद॑जाना॒मवो॑ दि॒वा॥ ३५॥

प॒तय॑न्त॒म्पत॑ंगम्। शिरो॑ अप॒श्यम्प॑थिभिः सु॒गेभि॑र॒रेणु॑भिर्जे॒हम्  
 अत्रा॑ ते रू॒पमु॑त्त॒मम॑प॒श्यं जि॑र्गीषमाणमिष॒ आ प॑दे गोः।  
 य॒दा ते॑ म॒र्तो अनु॑ भो॒गमा॑न॒डादि॑द्भ॒सिष्ठ॑ ओष॑धीरजी॒गः।  
 अनु॑ त्वा रथो॒ अनु म॑र्यो॒ अर्व॑न्ननु गा॒वोऽनु॑ भ॒गः क॑नीनाम्।  
 अनु॑ ब्रा॒तास॑स्तव॒ सख्य॑मी॒युरनु॑ दे॒वा म॑मिरे वी॒र्य॑म्॥ ३६॥

ते। हि॒र॒ण्यशृ॒ङ्गोऽयो॑ अस्य॒ पादा॑ मनो॑जवा॒ अव॑र॒ इन्द्र॑  
 आसीत्। दे॒वा इ॒दस्य॑ ह॒वि॒रद्य॑माय॒न् यो अ॑र्वन्त॒म्प्रथ॑मो

अध्यतिष्ठत्। ईर्मान्तासुः सिलिकमध्यमासुः स९  
 शूरणासो दिव्यासो अत्याः। ह९सा इव श्रेणिशो यतन्ते  
 यदाखिषुर्दिव्यमज्ममश्वः। तव शरीरम्पतयिष्वर्वन्तव  
 चित्तं वातं इव धर्जीमान्। तव शृङ्गाणि विष्टिता पुरुत्रारण्येषु  
 जर्भुराणा चरन्ति। उप॥३७॥

प्रागाच्छसनं वाज्यर्वा देवद्रीचा मनसा दीध्यानः। अजः  
 पुरो नीयते नाभिरस्यानु पश्चात्क्वयो यन्ति रेभाः। उप  
 प्रागात्परमं यत्सधस्थमर्वा९ अच्छा पितरम्मातरं च। अद्या  
 देवाञ्जुष्टतमो हि गुम्या अथा शास्ते दाशुषे वार्याणि॥३८॥

विपुक्तो दिवा वीर्यमुपैकान्नचत्वारि९शच्च॥७॥ [७]

मा नो मित्रो वरुणो अर्यमायुरिन्द्र ऋभुख्या मरुतः  
 परि ख्यन्। यद्वाजिनो देवजातस्य सप्तैः प्रवक्ष्यामो विदथे  
 वीर्याणि। यन्निर्णिजा रेक्णासा प्रावृतस्य रातिं गृभीताम्मुखतो  
 नयन्ति। सुप्राङ्जो मेम्यद्विश्वरूप इन्द्रापूष्णोः प्रियमप्येति  
 पाथः। एष च्छागः पुरो अश्वेन वाजिना पूष्णो भागो नीयते  
 विश्वदेव्यः। अभिप्रियं यत्पुरोडाशमर्वता त्वष्टेत्॥३९॥

ए॒न॒९ सौ॒श्र॒व॒साय॑ जि॒न्वति॑। यद्ध॒विष्य॑मृ॒तुशो॑ दे॒व॒यान॑  
 त्रि॒र्मा॒नु॒षाः पर्य॑श्वं न॒यन्ति॑। अत्रा॑ पू॒ष्णः प्र॑थ॒मो भा॒ग ए॑ति  
 य॒ज्ञं दे॒वेभ्यः॑ प्र॒तिवे॒दय॑न्न॒जः। होता॑ध्व॒र्युराव॑या अ॒ग्निमि॒न्धो  
 ग्रा॒व॒ग्रा॒भ उ॒त श॑स्ता सु॒वि॒प्रः। तेन॑ य॒ज्ञेन॑ स्वरं॒कृतेन॑ स्वि॒ष्टेन॑  
 व॒र॒ख॒णा आ पू॑णध्वम्। यू॒प॒व्र॒स्का उ॒त ये यू॑प॒वा॒हाश्च॑षालं॒ ये  
 अ॑श्वयू॒पाय॑ त॒र॒ख॒ति। ये चा॑र्व॒ते प॑च॒न९ स॒म्भर॑न्त्यु॒तो॥४०॥

तेषा॑म॒भि॒गूर्ति॑र्न इ॒न्वतु॑। उप॒ प्रागा॑थ्सु॒मन्मे॑ऽधा॒यि म॒न्म  
 दे॒वाना॑मा॒शा उप॑ वी॒तपृ॑ष्ठः। अ॒न्वे॒नं वि॒प्रा ऋ॑ष॒यो म॑दन्ति  
 दे॒वानां॑ पु॒ष्टे च॑कृ॒मा सु॒ब॒न्धुम्। यद्वा॒जिनो॑ दा॒मं स॑दा॒नम॑र्व॒तो  
 या शी॑र्ष॒ण्या र॑श॒ना र॑ञ्जु॒रस्य॑। यद्वा॑ घा॒स्य प्र॑भृ॒तमा॑स्ये॒ तृण॑९  
 सर्वा॑ ता ते॒ अपि॑ दे॒वेष्व॑स्तु। यद॑श्व॒स्य ऋ॒विषः॑॥४१॥

म॒रिषि॒काश॑ यद्वा॒ स्व॒रौ स्व॑धि॒तौ रि॒प्तम॑स्ति।  
 यद्ध॒स्त॒योः श॑मि॒तुर्य॑न्न॒खेषु॑ सर्वा॑ ता ते॒ अपि॑ दे॒वेष्व॑स्तु।  
 यदू॒व॒ध्यमु॒दर॑स्याप॒वाति॑ य आ॒मस्य॑ ऋ॒विषो॑ ग॒न्धो अ॑स्ति।  
 सु॒कृ॒ता तच्छ॑मि॒तारः॑ कृ॒ण्वन्तू॒त मे॒धः शृ॑त॒पाकं॑ प॒चन्तु॑। यत्ते  
 गा॒त्राद॑ग्नि॒ना प॑च्यमा॒नाद॑भि शू॒लं नि॑ह॒तस्या॑व॒धाव॑ति। मा  
 तद्भू॒म्या॒मा श्रि॑ष॒न्मा तृ॑णेषु दे॒वेभ्य॑स्तदु॒श॒द्ध्यो रा॒तम॑स्तु॥४२॥

इदुतो ऋविषः श्रिषथ्सत च॥८॥ [८]

ये वा॒जिन॑म्परि॒पश्य॑न्ति प॒क्वं य ई॑मा॒हुः सु॑र॒भिर्नि॑र॒हरे॑ति।  
ये चा॒र्वतो॑ मा॒सभि॑ख्यामुपास॑त उ॒तो तेषा॑मभि॒गूर्ति॑र्न  
इ॒न्वतु। यन्नी॑ख्य॒णम्मा॑स्यच॒न्या उ॒खाया॑ या पात्रा॑णि यू॒ष्ण  
आ॒सेच॑नानि। ऊ॒ष्म॒ण्यापि॑धाना॑ चरू॒णाम॒ङ्गाः सू॒नाः परि॑  
भूष॑न्त्यश्वम्। नि॒क्रम॑णं नि॒षद॑नं वि॒वर्त॑नं यच्च॒ पङ्क्ती॑श्मर्व॑तः।  
यच्च॒ प॒पौ यच्च॑ घा॒सिम्॥४३॥

ज॒घास॑ सर्वा॒ ता ते॒ अपि॑ दे॒वेष्व॑स्तु। मा त्वा॒ग्नि॒र्ध्वन॑यिद्धूम॒गं नि॑  
भ्राज॑न्त्य॒भि वि॑क्त॒ जघ्निः॑। इ॒ष्टं वी॒तम॒भिगूर्ति॑ वष॑ट्कृतं तं दे॒वासः  
प्रति॑ गृ॒भ्णन्त्य॑श्वम्। यदश्व॑य॒ वास॑ उपस्तृणन्त्य॑धीवा॒सं  
या हि॑र॒ण्यान्य॑स्मै। सं॒दान॑मर्वन्त॒म्पङ्क्ती॑श्मि॒त्रिया॑ दे॒वेष्व॑  
या॑मयन्ति। यत्ते॑ सा॒दे मह॑सा॒ शूकृ॑तस्य॒ पा॒र्ष्ण्या॑ वा॒  
कश॑या॥४४॥

वा॒ तुतो॑दं। सु॒चेव॑ ता ह॒विषो॑ अध्व॒रेषु॑ सर्वा॒ ता ते॒ ब्रह्म॑णा  
सू॒दयामि॑। चतु॑स्त्रि॒ंशद्वा॒जिनो॑ दे॒वब॑न्धोर्वङ्गी॒रश्व॑स्य॒ स्वधि॑तिः  
समे॑ति। अ॒च्छि॒द्रा गा॒त्रा व॒युना॑ कृ॒णोत॑ परु॒ष्परु॑रनु॒घुष्या॑ वि  
श॑स्त। ए॒क॒स्त्वष्टु॑रश्व॑स्या॒ विश॑स्ता॒ द्वा य॒न्तारा॑ भव॑त॒स्तथ॑र्तुः।

या ते गात्राणामृतुथा कृणोमि ताता पिण्डानाम्प्र जुहोम्यग्नौ।  
मा त्वा तपत्॥४५॥

प्रिय आत्मापियन्तुम्मा स्वधितिस्तनुव आ तिष्ठिपत्ते। मा  
ते गृधुरविशस्तातिहाय छिद्रा गात्राण्यसिना मिथू कः। न वा  
उ वेतन्त्रियसे न रिष्यसि देवाः इदैषि पृथिभिः सुगेभिः।  
हरी ते युञ्जा पृषती अभूतामुपास्थाद्वाजी धुरि रासभस्य।  
सुगव्यं नो वाजी स्वश्वियम्पुःसः पुत्राः उत विश्वापुषः  
रयिम्। अनागास्त्वं नो अदितिः कृणोतु ख्वत्रं नो अश्वो  
वनताः हविष्मान्॥४६॥

घासिं कशया तपद्रयिं नव च॥९॥ [९]

॥सप्तमः प्रश्नः॥

॥तैत्तिरीयसंहितायां चतुर्थकाण्डे सप्तमः प्रश्नः॥

अग्नाविष्णू सजोषसेमा वर्धन्तु वां गिरः। द्युमैर्वाजैभिरागतम्  
वाजंश्च मे प्रसवश्च मे प्रयतिश्च मे प्रसितिश्च मे धीतिश्च  
मे क्रतुश्च मे स्वरश्च मे श्लोकश्च मे श्रावश्च मे श्रुतिश्च मे  
ज्योतिश्च मे सुवश्च मे प्राणश्च मेऽपानः॥१॥

च मे व्यानश्च मेऽसुश्च मे चित्तं च म आधीतं च मे वाक्च  
 मे मनश्च मे चख्युश्च मे श्रोत्रं च मे दख्यश्च मे बलं च म  
 ओजश्च मे सहश्च म आयुश्च मे जुरा च म आत्मा च मे  
 तनूश्च मे शर्म च मे वर्म च मेऽङ्गानि च मेऽस्थानि च मे  
 परू॑षि च मे शरी॑राणि च मे॥२॥

अ॒पा॒न॒स्त॒नू॒श्च मेऽष्टा॑द॒श च॥१॥ \_\_\_\_\_ [१]

ज्यैष्ठ्यं च म आधिपत्यं च मे मन्युश्च मे भामश्च मेऽमश्च  
 मेऽम्भश्च मे जेमा च मे महिमा च मे वरिमा च मे प्रथिमा  
 च मे वर्ष्मा च मे द्राघुया च मे वृद्धं च मे वृद्धिश्च मे सत्यं  
 च मे श्रद्धा च मे जगच्च॥३॥

मे धनं च मे वशश्च मे त्विषिश्च मे क्रीडा च मे मोदश्च  
 मे जातं च मे जनिष्यमाणं च मे सूतं च मे सुकृतं च मे  
 वित्तं च मे वेद्यं च मे भूतं च मे भविष्यच्च मे सुगं च मे  
 सुपथं च म ऋद्धं च म ऋद्धिश्च मे क्लृप्तं च मे क्लृप्तिश्च मे  
 मतिश्च मे सुमतिश्च मे॥४॥

जग॒च्च॒र्द्धि॒श्चतु॑र्द॒श च॥२॥ \_\_\_\_\_ [२]

शं च मे मयश्च मे प्रियं च मेऽनुकामश्च मे कामश्च मे



सौमन॒सश्च॑ मे भ॒द्रं च॑ मे श्रेय॑श्च मे वस्य॑श्च मे यश॑श्च मे  
भग॑श्च मे द्रवि॑णं च मे य॒न्ता च॑ मे ध॒र्ता च॑ मे र॒खेम॑श्च मे  
धृति॑श्च मे वि॒श्वं च॥५॥

मे मह॑श्च मे संवि॑च्च मे ज्ञा॒त्रं च॑ मे सू॒श्च मे प्र॒सूश्च॑ मे सी॒रं  
च मे ल॒यश्च॑ म ऋ॒तं च॑ मेऽमृ॑तं च मेऽय॑क्ष्मं च मेऽना॑मयच्च  
मे जी॒वातु॑श्च मे दी॒र्घायु॑त्वं च॑ मेऽन॑मित्रं च॑ मेऽभ॑यं च मे  
सु॒गं च॑ मे श॒यनं॑ च मे सू॒षा च॑ मे सु॒दिनं॑ च मे॥६॥

वि॒श्वं च॑ श॒यन॑मष्टौ च॥३॥ [३]

ऊ॒र्क् मे सू॒नृता॑ च मे प॒यश्च॑ मे र॒सश्च॑ मे घृ॒तं च॑ मे मधु॑  
च मे स॒ग्धिश्च॑ मे स॒पीति॑श्च मे कृ॒षिश्च॑ मे वृ॒ष्टिश्च॑ मे जै॒त्रं च॑  
म औ॒द्भिद्यं॑ च मे र॒यिश्च॑ मे रा॒यश्च॑ मे पु॒ष्टं च॑ मे पु॒ष्टिश्च॑ मे  
वि॒भु च॥७॥

मे प्र॒भु च॑ मे ब॒हु च॑ मे भू॒यश्च॑ मे पूर्णं॑ च॑ मे पूर्ण॑तरं  
च॑ मेऽखि॑तिश्च मे कू॒यवा॑श्च मेऽन्नं॑ च॑ मेऽख्यु॑च्च मे व्री॒हय॑श्च  
मे यवा॑श्च मे मा॒षाश्च॑ मे ति॒लाश्च॑ मे मु॒द्गाश्च॑ मे ख॒ल्वाश्च॑ मे  
गो॒धूमा॑श्च मे म॒सुरा॑श्च मे प्रि॒यंग॑वश्च॒ मेऽण॑वश्च मे श्या॒माका॑श्च  
मे नी॒वारा॑श्च मे॥८॥

वि॒भु च॑ म॒सुराश्च॑तुर्दश च॥४॥ [४]

अश्मा॑ च मे॒ मृत्ति॑का च मे॒ गिर॑यश्च मे॒ पर्व॑ताश्च मे॒  
सिक्ता॑श्च मे॒ वन॑स्पतयश्च मे॒ हिर॑ण्यं च मे॒ऽय॑श्च मे॒ सीसं॑  
च मे॒ त्रपु॑श्च मे॒ श्यामं॑ च॒ मे लो॒हं च॑ मे॒ऽग्नि॑श्च म॒ आप॑श्च मे॒  
वीरु॑धश्च म॒ ओष॑धयश्च मे॒ कृष्ट॑प॒च्यं च॑॥९॥

मे॒ऽकृष्ट॑प॒च्यं च॑ मे॒ ग्राम्या॑श्च मे॒ प॒शव॑ आ॒रण्या॑श्च य॒ज्ञेन॑  
कल्प॑न्तां वि॒त्तं च॑ मे॒ वि॒त्ति॑श्च मे॒ भूतं॑ च॒ मे भू॑तिश्च मे॒ वसु॑  
च मे॒ वस॑तिश्च मे॒ कर्म॑ च मे॒ शक्ति॑श्च मे॒ऽर्थ॑श्च म॒ एम॑श्च म॒  
इति॑श्च मे॒ गति॑श्च मे॥१०॥

कृष्ट॑प॒च्यश्चाष्टा॑च॒त्वारि॑शच्च॥५॥ [५]

अ॒ग्निश्च॑ म॒ इन्द्र॑श्च मे॒ सोम॑श्च म॒ इन्द्र॑श्च मे॒ सवि॑ता च॒ म॒  
इन्द्र॑श्च मे॒ सर॑स्वती च॒ म॒ इन्द्र॑श्च मे॒ पूषा॑ च॒ म॒ इन्द्र॑श्च मे॒  
बृह॑स्पतिश्च म॒ इन्द्र॑श्च मे॒ मि॒त्रश्च॑ म॒ इन्द्र॑श्च मे॒ वरु॑णश्च म॒  
इन्द्र॑श्च मे॒ त्वष्टा॑ च॥११॥

म॒ इन्द्र॑श्च मे॒ धा॒ता च॑ म॒ इन्द्र॑श्च मे॒ विष्णु॑श्च म॒ इन्द्र॑श्च  
मे॒ऽश्विनौ॑ च॒ म॒ इन्द्र॑श्च मे॒ मरु॑तश्च म॒ इन्द्र॑श्च मे॒ विश्वे॑ च॒  
मे॒ दे॒वा इन्द्र॑श्च मे॒ पृथि॑वी च॒ म॒ इन्द्र॑श्च मे॒ऽन्तरि॑ख्यश्च म॒

इन्द्रश्च मे द्यौश्च म् इन्द्रश्च मे दिशश्च म् इन्द्रश्च मे मूर्धा च  
म् इन्द्रश्च मे प्रजापतिश्च म् इन्द्रश्च मे॥१२॥

त्वष्टा च द्यौश्च म् एकविंशतिश्च॥६॥ [६]

अ॒शुश्च मे र॒श्मिश्च मेऽदा॑भ्यश्च मेऽधि॑पतिश्च म  
उपा॒शुश्च मेऽन्तर्या॑मश्च म ऐन्द्रवाय॒वश्च मे मैत्रावरु॑णश्च  
म आ॒श्विनश्च मे प्रतिप्र॒स्थानश्च मे शुक्र॑श्च मे म॒न्थी च  
म आग्रय॑णश्च मे वैश्वदे॒वश्च मे ध्रुव॑श्च मे वैश्वान॒रश्च म  
ऋतु॒ग्रहाश्च॥१३॥

मेऽति॒ग्राह्या॑श्च म ऐन्द्रा॒ग्रश्च मे वैश्वदे॒वश्च मे मरु॑त्व॒तीया॑श्च  
मे माहेन्द्र॑श्च म आदित्य॑श्च मे सावि॒त्रश्च मे सार॑स्व॒तश्च मे  
पौष्ण॑श्च मे पालीव॒तश्च मे हारि॑योज॒नश्च मे॥१४॥

ऋतु॒ग्रहाश्च चतु॑स्त्रिंशच्च॥७॥ [७]

इ॒ध्मश्च मे ब॒र्हिश्च मे वेदि॑श्च मे धि॒ष्णि॒याश्च मे सु॒चश्च  
मे चम॑साश्च मे ग्रावा॑णश्च मे स्वर॑वश्च म उप॒रवा॑श्च मे-  
ऽधि॒षव॑णे च मे द्रोणक॒लशश्च मे वाय॑व्या॒नि च मे पू॒तभृ॑च्च  
म आध॑व॒नीय॑श्च म आ॒ग्नीध्रं च मे ह॒वि॒र्धानं च मे गृ॒हाश्च मे  
सद॑श्च मे पुरो॒डाशा॑श्च मे पच॒ताश्च मेऽव॑भृथश्च मे स्व॒गाका॑रश्च

मे॥१५॥

गृहाश्च षोडश च॥८॥ [८]

अ॒ग्निश्च॑ मे घ॒र्मश्च॑ मे॒ऽर्कश्च॑ मे॒ सूर्यश्च॑ मे प्रा॒णश्च॑ मे॒  
ऽश्वमे॑धश्च॑ मे पृथि॒वी च॑ मे॒ऽदिति॑श्च मे॒ दिति॑श्च मे॒ द्यौश्च॑ मे॒  
शक्वे॑रीर॒ङ्गुल॑यो दि॒शश्च॑ मे य॒ज्ञेन॑ कल्पन्ता॒मृक्च॑ मे॒ सामं॑ च मे॒  
स्तोमं॑श्च मे॒ यजु॑श्च मे दी॒र्खा च॑ मे॒ तप॑श्च म ऋ॒तुश्च॑ मे व्र॒तं च॑  
मे॒ऽहोरा॒त्रयो॑र्वृ॒ष्ट्या बृ॑ह॒द्रथ॑न्त॒रे च॑ मे य॒ज्ञेन॑ कल्पेताम्॥१६॥

दी॒र्खाऽष्टा॑दश च॥९॥ [९]

गर्भा॑श्च मे व॒त्साश्च॑ मे त्र्य॒विश्च॑ मे त्र्य॒वी च॑ मे दि॒त्यवा॑द्  
मे दि॒त्यौही॑ च॑ मे पश्चा॑विश्च मे पश्चा॑वी च॑ मे त्रि॒वत्स॑श्च मे॒  
त्रि॒वत्सा॑ च॑ मे तु॒र्यवा॑द् मे तु॒र्यौही॑ च॑ मे प॒ष्ठवा॑च्च॑ मे प॒ष्ठौही॑  
च॑ म उ॒र्खा च॑ मे व॒शा च॑ म ऋ॒षभ॑श्च॥१७॥

मे वे॒हच्च॑मे॒ऽनु॒द्वाश्च॑ मे धे॒नुश्च॑ म आ॒युर्य॑ज्ञेन॑ कल्पताम्प्रा॒णो  
य॒ज्ञेन॑ कल्पतामपा॒नो य॒ज्ञेन॑ कल्पता॒व्याँनो॑ य॒ज्ञेन॑  
कल्पता॒श्चख्यु॑र्य॒ज्ञेन॑ कल्पता॒ं श्रो॑त्रं य॒ज्ञेन॑ कल्पता॒म्मनो॑  
य॒ज्ञेन॑ कल्पतां वा॒ग्य॒ज्ञेन॑ कल्पतामा॒त्मा य॒ज्ञेन॑ कल्पतां  
य॒ज्ञो य॒ज्ञेन॑ कल्पताम्॥१८॥

ऋषभश्च चत्वारिंशच्च॥10॥ [१०]

एका च मे तिस्रश्च मे पञ्च च मे सप्त च मे नव च  
 म एकादश च मे त्रयोदश च मे पञ्चदश च मे सप्तदश  
 च मे नवदश च म एकविंशतिश्च मे त्रयोविंशतिश्च  
 मे पञ्चविंशतिश्च मे सप्तविंशतिश्च मे नवविंशतिश्च म  
 एकत्रिंशच्च मे त्रयस्त्रिंशच्च॥११॥

मे चतस्रश्च मेऽष्टौ च मे द्वादश च मे षोडश च  
 मे विंशतिश्च मे चतुर्विंशतिश्च मेऽष्टाविंशतिश्च  
 मे द्वात्रिंशच्च मे षट्त्रिंशच्च मे चत्वारिंशच्च  
 मे चतुश्चत्वारिंशच्च मेऽष्टाचत्वारिंशच्च मे वाजंश्च  
 प्रसवश्चापिजश्च ऋतुश्च सुवश्च मूर्धा च व्यश्रियश्चान्त्यायनश्चान्त्य  
 भौवनश्च भुवनश्चाधिपतिश्च॥२०॥

त्रयस्त्रिंशच्च व्यश्रिय एकादश च॥11॥ [११]

वाजो नः सप्त प्रदिशश्चतस्रो वा परावतः। वाजो नो  
 विश्वैर्देवैर्धनंसाताविहावतु। विश्वे अद्य मरुतो विश्वं ऊती  
 विश्वे भवन्त्वग्नयः समिद्धाः। विश्वे नो देवा अवसा गमन्तु  
 विश्वमस्तु द्रविणं वाजो अस्मे। वाजस्य प्रसवं देवा  
 रथैर्याता हिरण्ययैः। अग्निरिन्द्रो बृहस्पतिर्मरुतः सोमपीतये।

वाजैवाजेऽवत वाजिनो नो धनेषु॥२१॥

विप्रा अमृता ऋतज्ञाः। अस्य मध्वः पिबत मादयध्वं तृप्ता  
यात पृथिभिर्देवयानैः। वाजः पुरस्तादुत मध्यतो नो वाजो  
देवाः ऋतुभिः कल्पयाति। वाजस्य हि प्रसवो ननमीति  
विश्वा आशा वाजपतिर्भवेयम्। पयः पृथिव्याम्पय ओषधीषु  
पयो दिव्यन्तरिख्ये पयो धाम्। पयस्वतीः प्रदिशः सन्तु  
मह्यम्। सम्मा सृजामि पयसा घृतेन सम्मा सृजाम्यपः॥२२॥

ओषधीभिः। सोऽहं वाजः सनेयमग्ने। नक्तोषासा  
समनसा विरूपे धापयेते शिशुमेकः समीची। द्यावा  
ख्यामा रुक्मो अन्तर्वि भाति देवा अग्निं धारयन्द्रविणोदाः।  
समुद्रोऽसि नभस्वानार्द्रदानुः शम्भूर्मयोभूरभि मा वाहि  
स्वाहा मारुतोऽसि मरुता गणः शम्भूर्मयोभूरभि मा  
वाहि स्वाहावस्युरसि दुवस्वाञ्छुम्भूर्मयोभूरभि मा वाहि  
स्वाहा॥२३॥

धनैष्वपो दुवस्वाञ्छुम्भूर्मयोभूरभि मा द्वे च॥१२॥ [१२]

अग्निं युनज्मि शवसा घृतेन दिव्यः सुपर्ण वयसा  
बृहन्तम्। तेन वयम्पतेम ब्रध्नस्य विष्टपः सुवो रुहाणा

अधि॑ नाकं॑ उत्त॒मे। इ॒मौ ते॑ प॒र॒खाव॒जरौ॑ प॒त॒त्रि॒णो॒ याभ्या॑ ५  
 र॒खा १ स्य॒प॒ह ३ स्य॒ग्ने। ताभ्या॑ प॒तेम॑ सु॒कृता॑मु॒ लो॒कं यत्र॑ र्ष॒यः  
 प्रथ॑म॒जा ये पु॑रा॒णाः। चि॒द॒सि॒ समु॒द्रयो॑नि॒रिन्दु॑र्द॒खः श्ये॒न  
 ऋ॒तावा॑। हि॒र॒ण्य॒प॒र॒खः शकु॑नो भु॒र॒ण्यु॒र्म॒हान्त्स॒ध॒स्थे॑  
 ध्रु॒वः॥ २४॥

आ निष॑त्तः। नम॑स्ते अस्तु॒ मा मा॑ हि १ सी॒र्वि॒श्व॑स्य  
 मूर्ध॑न्नधि॑ तिष्ठ॒सि श्रि॑तः। स॒मु॒द्रे ते॒ हृद॑यम॒न्तरा॑यु॒र्द्यावा॑पृथि॒वी  
 भुव॑ने॒ष्वर्पि॑ते। उ॒द्रो द॑त्तो॒दधि॑म्भि॒न्त दि॒वः प॒र्जन्या॑द॒न्तरि॑खात्पृथि॒  
 नो वृ॑ष्ट्या॒वत। दि॒वो मूर्धा॑सि॑ पृथि॒व्या नाभि॑रू॒र्गपा॑मोष॒धीना॑म्।  
 वि॒श्वायुः॒ शर्म॑ स॒प्रथा॒ नम॑स्प॒थे। येन॑ र्ष॒यस्त॑प॒सा स॒त्रम्॥ २५॥

आस॑तेन्धा॒ना अ॒ग्निः सु॒व॒राभ॑रन्तः। तस्मि॑न्न॒हं नि॑ द॒धे  
 नाकं॑ अ॒ग्निमे॒तं यमा॑हुर्म॒नवः॑ स्ती॒र्णब॑र्हिषम्। तम्प॒त्नीभि॑रनु॒  
 गच्छे॑म॒ देवाः पु॒त्रैर्भ्रा॑तृभि॒रुत॑ वा॒ हि॒र॒ण्यैः। नाकं॑ गृह्णा॒नाः  
 सु॒कृ॒तस्य॑ लो॒के तृ॒तीयै॑ पृ॒ष्ठे अधि॑ रोच॒ने दि॒वः। आ वा॒चो  
 मध्य॑म॒रुह॑द्भु॒रण्यु॒रय॑म॒ग्निः स॒त्प॒तिश्चे॒कि॒तानः॑। पृ॒ष्ठे पृथि॑व्या  
 निहि॑तो॒ दवि॑द्युतदध॒स्पदं॑ कृ॒णु॒ते॥ २६॥

ये पृ॑त॒न्यवः॑। अ॒यम॒ग्निर्वी॑रत॒मो वयो॑धाः स॒हस्रि॑यो

दीप्यतामप्रयुच्छन्। विभ्राजमानः सरिरस्य मध्य उप प्र  
यात दिव्यानि धाम। सम्प्र च्यवध्वमनु सम्प्र याताग्ने पथो  
देवयानान्कृणुध्वम्। अस्मिन्धसधस्थे अध्युत्तरस्मिन्विश्वे देवा  
यजमानश्च सीदत। येना सहस्रं वहसि येनाग्ने सर्ववेदसम्।  
तेनेमं यज्ञं नो वह देवयानो यः॥२७॥

उत्तमः। उद्धृध्यस्वाग्ने प्रति जागृह्येनमिष्टापूर्ते  
सः सृजेथामयं च। पुनः कृण्वः स्त्वा पितरं युवानमन्वाताः सीत  
त्वयि तन्तुमेतम्। अयं ते योनिर्ऋत्वियो यतो जातो  
अरोचथाः। तं जानन्नग्र आ रोहाथा नो वर्धया रयिम्॥२८॥

ध्रुवः सूत्रङ्कुणुते यः सूत्रत्रिंशच्च॥१३॥ [१३]

ममाग्ने वर्चो विह्वेष्वस्तु वयं त्वेन्धानास्तनुवम्पुषेम।  
मह्यं नमन्ताम्प्रदिशश्चतस्रस्त्वयाध्यर्ख्येण पृतना जयेम।  
मम देवा विह्वे सन्तु सर्व इन्द्रावन्तो मरुतो विष्णुरग्निः।  
ममान्तरिख्यमुरु गोपमस्तु मह्यं वातः पवतां कामे अस्मिन्।  
मयि देवा द्रविणमा यजन्ताम्मय्याशीरस्तु मयि देवहूतिः।  
दैव्या होतांरा वनिषन्त॥२९॥

पूर्वेऽरिष्टाः स्याम तनुवा सुवीराः। मह्यं यजन्तु मम



यानि हव्याकूतिः सत्या मनसो मे अस्तु। एनो मा नि  
गां कतमच्चनाहं विश्वे देवासो अधि वोचता मे। देवीः  
षडुर्वीरुरु णः कृणोत विश्वे देवास इह वीरयध्वम्। मा  
हास्महि प्रजया मा तनूभिर्मा रंधाम द्विषते सोम राजन्।  
अग्निर्मन्युम्रतिनुदन्पुरस्तात्॥३०॥

अदब्धो गोपाः परि पाहि नस्त्वम्। प्रत्यञ्चो यन्तु निगुतः  
पुनस्तेऽमैषां चित्तम्प्रबुधा वि नेशत्। धाता धातृणाम्भुवनस्य  
यस्पतिर्देवः सवितारमभिमातिषाहम्। इमं यज्ञमश्विनोभा  
बृहस्पतिर्देवाः पान्तु यजमानं न्यर्थात्। उरुव्यचा नो महिषः  
शर्म यः सदस्मिन् हवे पुरुहूतः पुरुष्यु। स नः प्रजायै हर्यश्व  
मृडयेन्द्र मा॥३१॥

नो रीरिषो मा परा दाः। ये नः सपत्ना अप ते  
भवन्त्विन्द्राग्निभ्यामव बाधामहे तान्। वसवो रुद्रा आदित्या  
उपरिस्पृशम्मोग्रं चेत्तारमधिराजमक्रन्। अर्वाश्चमिन्द्रममुतो  
हवामहे यो गोजिद्धनजिदश्वजिद्यः। इमं नो यज्ञं विह्वे  
जुषस्वास्य कुर्मो हरिवो मेदिनं त्वा॥३२॥

अ॒ग्ने॒र्मन्वे॑ प्रथ॒मस्य॑ प्रचै॑तसो यम्पाञ्च॑जन्यम्ब॒हवः॑  
 समि॒न्धते॑। वि॒श्व॑स्यां वि॒शि प्र॑विवि॒शिवा॑समीमहे स नो  
 मुञ्च॒त्व॑ह॒सः। यस्ये॒दम्प्रा॑णन्नि॒मिष॑द्यदेज॒ति यस्य॑ जा॒तं  
 जने॑मानं च॒ के॒वलम्। स्तो॒म्य॒ग्निं ना॑थि॒तो जो॑ह॒वीमि॑  
 स नो॑ मुञ्च॒त्व॑ह॒सः। इन्द्र॑स्य म॒न्ये प्रथ॑मस्य प्रचै॑तसो  
 वृ॒त्रघ्नः॑ स्तोमा॒ उप॒ मामु॑पागुः। यो दा॒शुषः॑ सु॒कृतो॑ हव॒मुप॑  
 गन्ता॑॥ ३३॥

स नो॑ मुञ्च॒त्व॑ह॒सः। यः संग्रा॒मं नय॑ति सं व॒शी यु॒धे यः  
 पु॒ष्टानि॑ स॒सृज॑ति त्र॒याणि॑। स्तो॒मीन्द्र॑ नाथि॒तो जो॑ह॒वीमि॑  
 स नो॑ मुञ्च॒त्व॑ह॒सः। म॒न्वे वा॑मि॒त्रावरु॑णा तस्य॑ वि॒त्त॑  
 सत्यौ॑जसा दृ॒हणा॒ यं नु॑देथै। या राजा॑न॒स्रथ॑ याथ उ॒ग्रा  
 ता नो॑ मुञ्च॒त॒माग॑सः। यो वा॒स्रथ॑ ऋ॒जुर॑श्मिः स॒त्यध॑र्मा  
 मिथु॑श्चर॒न्तमु॑पयाति दूषयन्। स्तो॒मि॑॥ ३४॥

मि॒त्रावरु॑णा नाथि॒तो जो॑ह॒वीमि॑ तौ नो॑ मुञ्च॒त॒माग॑सः।  
 वा॒योः संवि॑तुर्वि॒दथा॑नि म॒न्महे॑ यावा॑त्म॒न्वद्वि॑भृ॒तो यौ च॑  
 र॒ख्यतः॑। यौ वि॒श्व॑स्य परि॒भू ब॑भूवतुस्तौ नो॑ मुञ्च॒त॒माग॑सः।  
 उप॒ श्रेष्ठा॑ न आ॒शिषो॑ दे॒वयो॑र्ध॒मे अ॑स्थिरन्। स्तो॒मि॑ वा॒यु॑

संवि॒तारं॑ नाथि॒तो जो॑हवीमि॒ तौ नो॑ मुञ्चत॒माग॑सः। रथी॒तमौ॑  
रथी॒नाम॑ह ऊ॒तये॒ शुभं॑ गमि॒ष्ठौ सु॒यमे॑भि॒रश्वैः॑। ययोः॑॥३५॥

वां दे॒वौ दे॒वेष्वनि॑शितमोज॒स्तौ नो॑ मुञ्चत॒माग॑सः।  
यदया॑तं वह॒तुः सूर्या॑या॒स्त्रिच॑क्रेण॑ स॒सद॑मिच्छ॒मानौ॑।  
स्तौमि॑ दे॒वाव॒श्विनौ॑ नाथि॒तो जो॑हवीमि॒ तौ नो॑ मुञ्चत॒माग॑सः।  
म॒रुता॑म्मन्वे॒ अधि॑ नो ब्रुवन्तु॒ प्रेमां॑ वाचं॒ विश्वा॑मवन्तु॒ विश्वे॑।  
आ॒शून् हु॑वे सु॒यमा॑नूतये॒ ते नो॑ मुञ्च॒न्त्वेन॑सः। ति॒ग्ममा॑युधं  
वी॒डित॑ः सह॒स्वद्वि॒व्यः शर्धः॑॥३६॥

पृ॒तना॑सु जि॒ष्णु। स्तौमि॑ दे॒वान्म॒रुतो॑ नाथि॒तो जो॑हवीमि॒  
ते नो॑ मुञ्च॒न्त्वेन॑सः। दे॒वाना॑म्मन्वे॒ अधि॑ नो ब्रुवन्तु॒ प्रेमां॑  
वाचं॒ विश्वा॑मवन्तु॒ विश्वे॑। आ॒शून् हु॑वे सु॒यमा॑नूतये॒ ते नो॑  
मुञ्च॒न्त्वेन॑सः। यदि॒दम्मा॑भि॒शोच॑ति॒ पौरु॑षेयेण॒ दैव्ये॑न। स्तौमि॑  
वि॒श्वां दे॒वान्ना॑थि॒तो जो॑हवीमि॒ ते नो॑ मुञ्च॒न्त्वेन॑सः। अनु॑ नो-  
ऽद्या॑नु॒मति॑रनु॒॥३७॥

इद॑नुमते॒ त्वं वै॑श्वान॒रो न॑ ऊ॒त्या पृ॒ष्ठो दि॒वि। ये  
अप्र॑थेता॒ममि॑तेभि॒रोजो॑भिर्ये॒ प्रति॑ष्ठे अ॒भ॒वतां॑ वसू॒नाम्। स्तौमि॑  
द्या॒वापृ॑थि॒वी ना॑थि॒तो जो॑हवीमि॒ ते नो॑ मुञ्चत॒मः॒हसः॑।

उर्वी रोदसी वरिवः कृणोतं ख्वेत्रस्य पत्नी अधि नो  
 ब्रूयातम्। स्तौमि द्यावापृथिवी नाथितो जोहवीमि ते नो  
 मुञ्चतमं हंसः। यत्ते वयम्पुरुषत्रा यविष्ठाविद्वांसश्चकृमा  
 कच्चन॥३८॥

आगः। कृधी स्वस्मांसं अदितेरनागा व्येनांसि शिश्रथो  
 विष्वगग्ने। यथा ह तद्वसवो गौर्यं चित्पदि पिताममुञ्चता  
 यजत्राः। एवा त्वमस्मत्प्र मुञ्चा व्यंहः प्रातार्यग्ने प्रतरां न  
 आयुः॥३९॥

गन्तां दूषयन्स्तौमि ययोः शर्धोऽनुमतिरनुं चन चतुस्त्रिंशच्च॥15॥—————[१५]

अग्निष्ठां वामश्चो द्विचत्वारिंशच्च॥11॥—————[१६]